

NCHAA SÁ NĬ XINÍ TÉ JUÀÁ NDĬHI NCHAA SÁ NĬ TECÚ DÓHO-DE

Xítóhó Jesucrístú xáhaⁿ-gã xii té Juàá nchaa nàcuáa cada-xi ñuyíú

¹ Te Yá Ndiõxí ní xáhaⁿ-gã xii Xítóhó Jesucrístú nchaa sá tá cùyatni vií-nă cada-xi ñuyíú-a cuendá sá cũñaha-gã xii cue tée xìnu cuechi núú-gã, te Xítóhó Jesucrístú ní tendaha-gã ìⁿ espíritú xínú cuèchi núú-gã ní quixi-xi ní cachí tnúhu-xi nchaa tnúhu-áⁿ xii yúhú té Juàá tée xìnu cuechi núú-gã, te nchaa tnúhu-áⁿ ndèé núú tütú-a. ² Te yúhú càhí tnúhu ndáá-í xii-ndo nàcuáa ní cáháⁿ Yă Ndiõxí, te càháⁿ ndáá tucu-í cuendá Xítóhó Jesucrístú, ndihi cuendá nchaa sá nĬ xiní-í.

³ Te váha táhú ñăyiu dàcuaha nchaa tnúhu ndèé núú tütú-a, te váha tucu táhú ñăyiu ndèdóho, te váha tucu táhú nchaa ñăyiu tñì nacuáa càháⁿ-xi, chi sa ta cùyatni vií-nă nduu càda-xi nchaa nacuáa càháⁿ-xi.

Té Juàá cádũha-dé tutú quíhíⁿ ndaha ndi ùsá xichi cue ñăyiu ndècu ichi Yá Ndiõxí

⁴ Te yúhú té Juàá cádũha-í tutú daquixi-í ndi ùsá xichi núú ndécú nchòhó ñăyiu ndècu ichi Yá Ndiõxí ndécú d̀istritú Àsiá. Te mee-gã ná chindee chitúu ñaha-gã xii-ndo, te ío váha cuu iní-ndó c̀unde-cu-ndo. Te cuèi ndèé sanaha d̀iu-ni-gá ndécú, te d̀iu-ni-gá ndécú cuèi vitna, te ducaⁿ-ni

cùndecu-gá cuèi ndéé núú cuàháⁿ núú vëxi, te ðiu-ni ðucaⁿ ïo na çhìndee chitúu ñaha ndì usá cue espíritú ndécú núú-gá xii-ndo, te ïo váha cuu iní-ndó cùndecu-ndo. ⁵ Te ðiu-ni ðucaⁿ na càda tucu Xítohó Jesucristú, te ðiu-gá cúú-gá Yaá càháⁿ ndáá, te ðiu-ni-gá ní xíhí-gá te díhna-gá ní ndoto, te dǎtnùní ndéé cuèé-gá te ndoto cue ñáyiú ní xíhí, te ðiu-ni-gá táxí tnùnì-gá nchaa cue téé yìndaha ñaha xii ñáyiú ndècu ñuyíú-a. Te ïo cùu iní ñáhá-gá xii-o, te mee-gá ní sati níñí-gá te ní xíhí-gá núú cùrúxí sá cuèndá nchaa sá cuèhé sá dúhá quide-o, te ní ndada ndoo ní ndada nine-gá iní-ó, ⁶ te vitna ní quide ñaha-gá xii-o dàtná cue téé yìndaha ñáyiú, te ní quide ñaha tùcu-gá xii-o dàtná cue dútú xínú cuèchi-o núú Tǎtá-gá Dútú Ndiöxí. Te vitna nchaa-o çhí ná càchí-ó sǎ ïo càhnu cuu Xítohó Jesucristú, te ïo cùnuu-gá, te ðucaⁿ-ni na cùnuu-gá ni caa ni quíhíⁿ. Te ðucaⁿ na cùnduu.

⁷ ;Te cundehe-ndo àndiu! Chi ichi xití vícò quixi Xítohó Jesucristú, te nchaa ñáyiú ndècu ñuyíú-a quini ñáhǎ-yu xii-gá, te tnàhá nchaa ñáyiú ìⁿ-ni cùu ndìhì ñáyiú ní dánìcuèhé ñáhá xii-gá quini ñáhǎ-yu, te nchaa ñáyiú xìndecu ni hìí ñuyíú, ñáyiú ñá túú cùu váha iní ñáhá xii-gá ndíhú iní-yu òré quini ñáhǎ-yu xii-gá, te ndáá sá dúcáⁿ càda-xi.

⁸ Te Yá Ndiöxí càchí-gá: “Yúhú ïo cùnuu-í chi ðiu-í sa ndècu ndéé cútnàhá ní ngáva ñuyíú, te ðiu-ni-í cundecu ndéé ná sáá nduu nàa-xi ndìhì nchaa sá ìó, chi yúhú cundecu-í ni caa ni quíhíⁿ”, duha càchí Yá Ndiöxí Yaá ndácú quide nchaandi túhú sá vǎha. Chi ðiu-ni-gá sa ndècu ndéé cútnàhá ní ngáva ñuyíú, te ðiu-ni-gá ndécú-gá vitna, te

ducaⁿ-ni cùndecu-gá ñi caa ñi quíhíⁿ.

Té Juàá ní xiní-dé Xítóhó Jesucristú Yáá ío cùnnuu

⁹ Te yúhú té Juàá téé ndècu ndihí-ndo ichi Xítóhó Jesucristú, tnàhá-í ndóhò-í cuèndá-gá dàtná ndóhó-ndó, te tnàhá-í nduu táhù-í cundecu ndihí ñaha-í xii-ndo núú ndécú Yá Ndiöxí táxí tnùní-gá. Te ío quide cahnu iní-ó cuèi náandi yáha-o ndècu-o sá cuèndá Xítóhó Jesucristú. Te yúhú ní ngava-í vecaá ñⁿ ñúú nání Pătmós, te ñúú-áⁿ cáá xití ndute lâmár. Te ducaⁿ ñi cuu cuèndá sá càháⁿ-í tnúhu Yá Ndiöxí, te càháⁿ váha-í cuèndá Xítóhó Jesucristú.

¹⁰ Te ñⁿ nduu ndumìngú nduu nàtacá-ó chìñuhu-o Yá Ndiöxí ní quide ñaha Espiritú-gá xii-í nàcuáa càchí iní-xi, te ní tecú dóho-í níhi ní càháⁿ ñⁿ sá ñí càháⁿ ndàa sátà-í te dàtná níhi càháⁿ ñⁿ cútú ducaⁿ níhi ní càháⁿ-xi. ¹¹ Te càchí sá càháⁿ-áⁿ:

—Yúhú sa ndècu-í ndéé cútnàhá ní ngáva ñuyíú, te diu-ni-í cundecu-í ndéé ná sàá nduu nàa-xi ndihí nchaa sá ío, te chido tnùní-n ñⁿ núú tütú sá ná dènehé núú ñáhà-í xii-n, te daquihíⁿ-n tütú-áⁿ ndi úsá xichi núú xíndecu cue ñáyiú ndècu ichi Yá Ndiöxí xíndecu distritú Àsiá, ndaha ñáyiú ñúú Éfesú, ndaha ñáyiú ñúú Èsmirná, ndaha ñáyiú ñúú Përgamú, ndaha ñáyiú ñúú Tiàtirá, ndaha ñáyiú ñúú Sărdís, ndaha ñáyiú ñúú Filàdelfiá, ndaha ñáyiú ñúú Laodiceá, nchaa ñáyiú ñúú-áⁿ daquihíⁿ-n tütú-áⁿ ndahá-yu —càchí sá càháⁿ-áⁿ.

¹² Te ní nchócuñhu-í ndéhè-í núu ná cúú sá càháⁿ-áⁿ, te ní xiní-í xínutñí úsá tnàhá sá ñí cuáha mee-ni dǐhúⁿ cuàáⁿ sá ndéé dité-xi, te núú dité-xi-áⁿ yíndòdo ñⁿ caa candíl. ¹³ Te cuádava tnuú nchaa xíáⁿ ní xiní-í nútnñí Yáá cáá dàtná cáá nchàa

nchoo ñáyiú ndècu ñuyíú-a, te ñihnu-gá ìⁿ dóó cání cãa-xi ndéé núú sàhá-gá, te yìdúcúⁿnuu ìⁿ sìrchú ní cuáha mee-ni dǐhúⁿ cuàáⁿ pèchú-gá. ¹⁴ Te idi díquí-gã cuìxíⁿ quiyí dàtná cuìxíⁿ idi dava mběé, àdi yúhá sá quée òré quidé vǐxiⁿ-xi, te tinùu-gá quidé-xí dàtná quidé-xí òré sàá itá ñuhú. ¹⁵ Te sáhá-gã súúní dàtásaⁿ-xi dàtná dátãsaⁿ sá nání bròncé òré càyú-xi ducaⁿ dàtásaⁿ-xi sáhá-gã, te dõndaha tnúhu cãháⁿ-gá quidé-xí dàtná quidé-xí dõndaha titní víhí yũte. ¹⁶ Te xio ndaha cùha-gá núndàha-gá úsá tnahá chódíní, te mei yùhu-gá quéné ìⁿ yuchí cáhnú ndéé úú xio núú-xi, te núú-gã quidé-xí dàtná quidé-xí núú nchǐcanchii òré súúní ngòyo cahni.

¹⁷ Te sá dúcáⁿ cãa Yaá-áⁿ ñǐ xiní-í nũu xǐáⁿ ní yùhú-í ní nduá-í núú-gã, te ní cuu-í dàtná ìⁿ téé ní xíhí sá dúcáⁿ ïo ní yùhú-í, dico mee-gã ní sacáⁿ ndodo-gá ndaha cùha-gá núú yiqui cùñú-í, te ní cachí-gá:

—Vá yùhú-n, chi ñiu-ni yùhú sa ndècu-í ndéé cùtnàhá ní ngáva ñuyíú, te ñiu-ni yùhú cundecu-í ndéé ná sàá nduu nàa-xi ndihí nchaa sá ïó. ¹⁸ Te yùhú cùu-í Yaá ní xíhí te ní ndoto-í, te vitna ndècu vívù-í, te ducaⁿ-ni cùndecu-í ñǐ caa ñǐ quíhíⁿ. Te yùhú cúnùu-í núú nchàa ñáyiú ní xíhí te ñiu-ni-í cúnùu-í núú ndécũ-yu. ¹⁹ Te chido tnùnì-n nchàa sá ñǐ xiní-n-áⁿ ìⁿ núú tütú, ndihí nchaa nàcuáa cùu vitna, ndihí nchaa sá cádá-xí ndéé núú cuáháⁿ núú vèxi-gá. ²⁰ Te na càhí tnúhu-í xii-n nàcuáa quèe-xi ndi usá chódíní ñǐ xiní-n yòtni-í xio ndaha cùha-í, ndihí nàcuáa quèe-xi ndi usá sá ñǐ cuáha mee-ni dǐhúⁿ cuàáⁿ, sá ndéé dité-xi te yìndodo ìⁿ caa candíl núú dité-xi-áⁿ. Te ndi ùsá chódíní-ãⁿ,

xíǎⁿ cúú-xí sǎ cútnùní iní-ó sǎ ndécú ùsá cue téé xìnu cuechi núú Yǎ Ndiǒxí, te ndì ùsá cue téé-áⁿ ndécú-güedě ndì ùsá xichi núú ndécú ñǎyiu ndècu ichi Yá Ndiǒxí. Te cuendá ndì ùsá sá ndèé díté-xi-áⁿ, xíǎⁿ cúú-xí sǎ cútnùní iní-ó sǎ ndécú ùsá xichi ñǎyiu ndècu ichi Yá Ndiǒxí —duha càchí Yaá càháⁿ-áⁿ.

2

Tnúhu sá cúú-xí ñǎyiu xǐndecu ichi Yá Ndiǒxí ndécú ñùú Éfesú

¹ Te ní cachí tucu Yaá càháⁿ-áⁿ xii-í sá chídó tnùn-í nchaa tnúhu sá vítná càháⁿ-gá ìⁿ núú tütú, te tendaha-í quíhíⁿ ndaha téé xìnu cuechi núú Yǎ Ndiǒxí ndécú ñùú Éfesú sá cúú-xí cuè ñǎyiu xǐndecu ichi-gá ndécú ñùú-áⁿ, te duha ní cachí-gá: “Yúhú cúú-í Yaá núndàha úsá chódíní xio ndaha cùha-í, te xìca cuu-í núú ndécú ndì usá sá ñǎ cuáha mee-ni díhúⁿ cuááⁿ, sá ndèé díté-xi te yǐndodo ìⁿ caa candíl núú díté-xi. ² Te yúhú xìn-í nchaa nàcuáa quìde nchohó ñǎyiu xǐndecu ichi Yá Ndiǒxí ndécú ñùú Éfesú, te xìn-í sá ìo ndùcu ndee-ndo quide chiuⁿ-ndo cuendá-gá, te ío quìde cahnu iní-ndó ndècu-ndo quide-ndo chiuⁿ-gá. Te xìn-í sá ñà túú tnàhí tnàhá iní-ndó nàcuáa quìde nchaa ñǎyiu ndècu ichi cuehé ichi duha. Te xìn-í tucu-í sá xító ndèé-ndó cuè téé càchí sá ñǎ tendaha-í véxi càháⁿ tnúhu-í te ñá ndàá sá càháⁿ-güedé tnúhu-í, te ducaⁿ te cùtnuní iní-ndó sǎ ñǎ ndàá sá càháⁿ-güedé tnúhu-í. ³ Te xìn-í tucu-í sá ìo ndòho-ndo quide-ndo chiuⁿ cuendá-í, te ducaⁿ ìo quìde cahnu iní-ndó cuèi nándì yǎha-ndo, te ñá túú cùu dusaⁿ-ndo quide-ndo chiuⁿ-áⁿ. ⁴ Dico ñá túú cùu váha iní-í chi nchòhó ñá túú-gǎ quídé-ndó dàtná ní xóo cada-ndo

cũtnàhá vitna cùu vií-ni ní sándáá iní ñáhá-ndó xii-í, chi vitna ñá túú-gă cùú iní ñáhá vihi-ndo datná ní xóo cada-ndo dàvâ-áⁿ. ⁵ Te chí dándàcu iní nàcuáa ní xóo cada-ndo cũtnàhá vitna cùu saa ní sándáá iní ñáhá-ndó xii-í, te ndixi cuéchi iní-ndó sã ñà túú-gă quidé vâha-ndo ndècu-ndo vitna, te nucuíta saa tucu-ndo cada-ndo datná ní xóo cada-ndo ndéé díhna. Te nchòhó cada iní-ndó sã ndécú ndih-ndo ìⁿ sá ñi cuáha mee-ni dǐhúⁿ cuááⁿ, sá ndéé dité-xi te yìndodo ìⁿ caa candíl núú dité-xi. Te núu vá ndíxí cuéchi iní-ndó nàcuáa quide-ndo ndecu-ndo ña, te quixi-í xocàni-í xǐáⁿ, te ducaⁿ sãtnahá-xi cada ñaha-í xii-ndo te núu vá ndíxí cuéchi iní-ndó nàcuáa quide-ndo ndecu-ndo, te ducaⁿ te vá yõo-gá nàtacá chiñuhu ñaha xii-í ñuú-ndó. ⁶ Dico quide váha-ndo ìⁿ xichi chi dàquee tihú-ndó nchaa sã quidé cué ñáyiu cùu nicolaitás, te yúhú tnàhá-í dáquèe tihù-í nchaa sá quidé ñáyiu-áⁿ. ⁷ Te nchòhó cada cuendá váha-ndo nàcuáa xãhaⁿ-í xii Espíritú Yá Ndiõxí xãhaⁿ-xi xii cue ñáyiu ndècu ichi-gá xĩndecu nchaa xichi. Te duha ndùu tnúhu xãhaⁿ-í xii Espíritú-gá xãhaⁿ-xi xii-yu: Cúñaha-n xii nchaa ñáyiu sá nõu na càda ndee iní-yu yáha-yu nándi sá ná yãha-yu sá cuendá-í, te yúhú cada-í te nduu táhũ-yu cundecu váha-yu núú ndécú Yá Ndiõxí, duha cãhí Yaá cãháⁿ-áⁿ. Te nchaa tnúhu-áⁿ ñi chídó tnùní-í sá cùú-xí ñáyiu xĩndecu ichi Yá Ndiõxí ndécú nõú Éfesú.

Tnúhu sá cùú-xí ñáyiu xĩndecu ichi Yá Ndiõxí ndécú nõú Èsmirná

⁸ Te ní cachí tucu Yaá cãháⁿ-áⁿ xii-í sá chídó tnùní-í nchaa tnúhu sá vítná cãháⁿ-gá ìⁿ núú tütú,

te tendaha-ĩ quíhíⁿ ndaha téé xìnu cuechi núú Yă Ndiõxí ndécú ñùú Èsmirná sá cúú-xí cuè ñáyíu xĩndecu ichi-gá ndécú ñùú-áⁿ, te duha càchí-gá: “Yúhú ndécù-í ndéé cútnàhá ní ngáva ñuyíú, te ñíu-ni-í cundecu-í ndéé ná sàá nduu nàa-xi ndíhi nchaa sá ìó, te ñíu-ni-í ní xíhí te ní ndoto-í ndécù-í vitna. ⁹ Te yúhú xìní-í nchaa nàcuáa quide nchohó ñáyíu ndècu ichi Yă Ndiõxí ndécú ñùú Èsmirná. Te xìní-í sá ìo ndòho-ndo ndecu-ndo sá cuendá-í, te xìní tucu-í sá ìo ndàhú-ndó dico cùu-ndo ñáyíu xĩndecu váha núú Yă Ndiõxí. Te xìní tucu-í sá ìo càháⁿ cuèhé ñáyíu isràél cuendá-ndó, dico ñá túú quidé-yu nàcuáa tàú-yu cadá-yu sá cúũ-yu ñáyíu isràél, chi cùú-yu ñáyíu xìnu cuechi mee-ni núú sàcuíhná. ¹⁰ Dico nchòhó vá yùhú-ndó cuèi nándi cùu nchaa sá ná ndòho-ndo cuendá-í, chi sàcuíhná cada-xi te ngava dava-ndo vècaá, te ducaⁿ càda-xi chi cuíní-xi coto ndéé ñáhá-xí xii-ndo núu ndisa sá vá ná túhú iní-ndó sá nchìcúⁿ nihnu-ndo ìchi Yă Ndiõxí. Te ndòho-ndo ùxí nduu dico vá dǎná ndèé-ndó cànchicúⁿ nihnu-ni-ndo ìchi-gá cuèi na cùú-ndó sǎ cuendá-gá, te yúhú cada-í te nduu táhú-ndó cùndecu-ndo ndíhi-gá ni caa ni quíhíⁿ. ¹¹ Te nchaa nchòhó cada cuendá váha-ndo nàcuáa xǎhaⁿ-ĩ xii Espíritú Yă Ndiõxí xǎhaⁿ-xi xii cue ñáyíu ndècu ichi-gá xĩndecu nchaa xichi, te duha nduu tnúhu xǎhaⁿ-ĩ xii Espíritú-gá xǎhaⁿ-xi xii-yu: Cúñaha-n xii nchaa ñáyíu sá nùu na cùndee iní-yu yáha-yu nándi sá ná yǎha-yu sá cuendá-í te vá cuíta nihnú-yu na sàá nduu cuíta nihnu nchaa dava-gá ñáyíu, duha xǎhaⁿ-ĩ xii Espíritú-gá cúu-xi ñáyíu”, duha ní cachí Yaá càháⁿ-áⁿ. Te nchaa tnúhu-áⁿ ní chídó tnùní-í sá cúú-xí ñáyíu xĩndecu ichi Yă Ndiõxí

ndécú ñùú Èsmirná.

Tnúhu sá cúú-xí ñǎyiu xǐndecu ichi Yá Ndiöxí ndécú ñùú Përgamú

¹² Te ní cachí tucu Yaá càháⁿ-áⁿ xii-í sá chídó tnùn-í nchaa tnúhu sá vítná càháⁿ-gá ñⁿ núú tütú, te tendaha-ǐ quíhíⁿ ndaha téé xínu cuechi núú Yá Ndiöxí ndécú ñùú Përgamú sá cúú-xí cuè ñáyiu xǐndecu ichi-gá ndécú ñùú-áⁿ, te duha càchí-gá: “Yúhú cúú-í Yaá néhé ñⁿ yuchí cání te ndèé úú xio núú-xi. ¹³ Te yúhú xìn-í nchaa nàcuáa quide nchohó cue ñáyiu xǐndecu ichi Yá Ndiöxí ndécú ñùú Përgamú, te xìní tucu-í sá ndécú-ndó núú ïo cùnuu yucu ñávãha, te ñá túú dàña ndeé-ndó nchìcúⁿ nihnu-ndo ìchi-í, te ducaⁿ ïo sàndáá iní ñáhá-ní-ndó xì-í, te ñu-ni ducaⁿ ñí quide-ndo cùtnàhá ní sahní-güedé té Àntipás núú ndécú-ndó ñu-ni núú dúcáⁿ ïo cùnuu yucu ñávãha. Te ndí-áⁿ ñí quide ndáá ndíí ní xǐndecu ndíí ichi-í chí ní càháⁿ váha ndíí cuèndá-í. ¹⁴ Dico ñá túú cùu váha iní-í cuèndá ñⁿ úú sá quidé-ndó, chí ndècu ndíhi-ndo ñáyiu nchìcúⁿ nihnu-ni nchaa nàcuáa ní càháⁿ ndíí Bàlaám. Chí ndí-áⁿ ñà túú ní quide váha ndíí chí ní dácáhu ìní ndíí ñngá téé ní xínani Bàlác nàcuáa cada-dé canu ichi-dé cue ñáyiu isràél ñngá ichi sá ñà túú vãha, chí ní xáhaⁿ tã Bàlác-áⁿ xii-yu sá cáxi-yu nchaa sá ndúú tãhú nchaa sá ñí cadúha cue téé ñuyú-a ñanani ñáyiu ndiöxí te ñá ndáá sá ndiöxí cúú-xí, te ní dácáhu ìní ñáhá-dë xii-yu sá cùndécú-yu ichi ñí ìní. ¹⁵ Te ndècu ndíhi tucu-ndo ñáyiu nchìcúⁿ nihnu sá dácúaha cue ñáyiu cùu nicolaitás. Te nchaa sá dácúaha ñáyiu-áⁿ dáquèè tíhù-í, ¹⁶ te nchòhó chí dándixi

cuéchi iní sá ñà túú quède váha-ndo ndècu-ndo, chi núu ñáhá te quixi-í nàá-í ndihí cue ñáyiú-án ndihí yuchí cání sǎ quéné yùhu-í. ¹⁷ Te nchaa nchòhó cada cuendá váha-ndo nàcuáa xǎhaⁿ-í xii Espíritú Yá Ndiǒxí xǎhaⁿ-xí xii cue ñáyiú ndècu ichi-gá xǐndecu nchaa xichi. Te duha ndùu tnúhu xǎhaⁿ-í xii Espíritú-gá xǎhaⁿ-xí xii-yu: Cúñaha-n xii nchaa ñáyiú sá núu na càda ndee iní-yu yáha-yu nándi sá ná yǎha-yu sá cuendá-í, te yúhú cuǎñaha-í sá ndúú yùhu xii-yu caxí-yu [¶] sá vátá quíní-gá-yu caxí-yu. Te xǎⁿ cúú-xí mànáá sá ñí xóo caxí cue ñáyiú ní xǐndecu ndéé sanaha, te cuǎñaha tùcu-í [¶] caa yúú cuixíⁿ xii-yu, te núu yúú-ǎⁿ cundeé [¶] diú saa. Te diú-án vǎ yǒo tnàhí xini chi [¶] diú díí-ni ñáyiú na quèheⁿ cuendá diú-án quíní-yu, duha xǎhaⁿ-í xii Espíritú-gá cúu-xí ñáyiú”, duha càchí Yaá càháⁿ-án. Te nchaa tnúhu-án ñí chídó tnùn-í sá cúú-xí ñáyiú xǐndecu ichi Yá Ndiǒxí ndécú ñùú Pèrgamú.

Tnúhu sá cúú-xí cuè ñáyiú xǐndecu ichi Yá Ndiǒxí ndécú ñùú Tiàtirá

¹⁸ Te ní cachí tucu Yaá càháⁿ-án xii-í sá chídó tnùn-í nchaa tnúhu sá vítná càháⁿ-gá [¶] núu tùtú, te tendaha-í quíhíⁿ ndaha tǎe xinu cuechi núu Yá Ndiǒxí ndécú ñùú Tiàtirá sá cúú-xí cuè ñáyiú xǐndecu ichi-gá ndécú ñùú-án, te duha càchí-gá: “Yúhú cúú-í Déhe Yá Ndiǒxí, te càa tinuu-í dàtná cáá itá ñuhú, te sáhà-í cáá dàtná cáá sǎ nání bróncé òré ñuhú-xí núú ñuhú càyú-xi. ¹⁹ Te yúhú xini-í nchaa nàcuáa quède nchohó ñáyiú xǐndecu ichi Yá Ndiǒxí ndécú ñùú Tiàtirá. Te xini tucu-í sá ïo cùu iní-ndó Yá Ndiǒxí te sàndáá iní-ndó-gǎ. Te xini tucu-í nàcuáa ndùu chiuⁿ quide-ndo sá

cúu-xí-gă. Te xìní tucu-í sá ïo quide cahnu iní-ndó cuëi nãndi cùu sá yăha-ndo ndècu-ndo. Te xìní tucu-í sá ïo-gá ndúcú ndèe-ndo quide váha-ndo vitna dacúúxí cùtnàhá vitna cùu saa ní sándáá iní-ndó Yă Ndiöxí. ²⁰ Dico ñá túú cùu váha iní-í cuëndá ìⁿ sá quidé-ndó, chi ñá túú tnàhí ná sání iní-ndó ndècu ndìhi-ni-ndo ñáyiú nchìcúⁿ nihnu nchaa nàcuáa dānehé ñáhá ñàha nani Jezabél. Te ñaha-áⁿ càchí-aⁿ sá càháⁿ-aⁿ tnúhu Yă Ndiöxí dico ñá ndáá sá càháⁿ-aⁿ tnúhu-gá, te cuáháⁿ-aⁿ dāndahú-aⁿ nchaa ñáyiú xínu cuechi núu-í ndìhi nchaa sá dānehé ñáhá-áⁿ cuëndá cundecú-yu ichi ðíⁿ iní, te caxí-yu nchaa sá ndúú tǎhú nchaa sá nǐ cadúha cue téé ñuyíú-a dānani ñáyiú ndiöxí te ñá ndáá sá ndiöxí cúú nchàa xǎⁿ. ²¹ Te ní cuu vǎi nduu ta dacaca-í ndécú-áⁿ cuëndá ndixi cuëchi iní-aⁿ sá ñà túú quide váha-aⁿ ndècu-aⁿ, te cuëi ducaⁿ quide-í dico ñá túú cuiní-aⁿ dañ-aⁿ nì ìⁿ sá cuèhé sá dúhá quide-aⁿ. ²² Te vitna yúhú ío dandòho-í-aⁿ chi tnì ñaha cuèhé xii-aⁿ, te ðiu-ni ducaⁿ ïo dandòho-í nchaa ñáyiú quide datná quidé-áⁿ te núu vá ndíxí cuëchi iní-yu sá ñà túú quide váha-yu ndécú-yu, te dàñá-yu nchaa sá cuèhé sá dúhá quidé-yu. ²³ Te nchaa ñáyiú cùndìhi ñaha xii ñaha-áⁿ cahni-í-yu, te ducaⁿ te nchòhó ndìhi dava-gá nchaa ñáyiú xǐndecu ichi Yă Ndiöxí ndécú nchàa xichi cutnuni iní-ndó ndìhí-yu sá yǔhú cùu-í Yaá xìní ndáá nchaa nàcuáa sàni iní ñáyiú, ndìhi nchaa nàcuáa quide-xi iní-yu. Te nchòhó nàcuáa ndùu sá quidé-ndó ìⁿ ìⁿ-ndo te ducaⁿ cùnduu sá táxì-í nduu táhú-ndó. ²⁴ Te dava nchòhó ñáyiú ndècu ñuú Tiàtirá, ñáyiú ñá túú nchìcúⁿ nihnu nàcuáa dānehé ñáhá ñàha nani Jezabél-áⁿ ñà túú xìní-ndó nǎ cúú sǎ càchí ñáyiú ndùu yuhu dacahu iní ñáhá yùcu ñávǎha.

Te nchòhó, ñá túú nǎgá cachí tnúhu-í xii-ndo càda-ndo ²⁵ diu-ná sá ïo nducu ndèe-ndo cada-ndo nchaa nacuáa càháⁿ tnúhu sá ndécú ndìhi-ndo, te ducaⁿ-ni càda-ndo ndéé òré quixi tucu-í. ²⁶ Te nchaa nchòhó ñáyiú na càda ndee iní yáha nándi sá ná yáha sá cuèndá-í, te núu na càda-ni-ndo nchaa nacuáa cuìní-í cada-ndo ndéé nduu vǎ cùndecu-gá-ndó ñùyíú-a, te yúhú taxi-í tnúhu ndee iní xii-ndo sǎ táxi tnùn-í-ndó nchàa ñáyiú ñuyíú ²⁷ dàtná ní quide mee Tǎtà-í Dútú Ndiǒxí ní taxi-gá tnúhu ndee iní ndécú ndìhi-í, te ducaⁿ càda ñaha-í xii-ndo tàxi-í tnúhu ndee iní xii-ndo cuèndá ío taxi tnùn-í-ndó, te cada iní-ndó sǎ cádá-ndó cuè ñáyiú dàtná quidé-xí ìⁿ quídi òré tàhú-xi càchi duuⁿ-xi, te ducaⁿ chi nchòhó cada-ndo sǎ ncháá ñáyiú ñá túú quide váha cuíta nihnú-yu. ²⁸ Te cada iní-ndó sǎ dàtná dáyèhé chódíní quiti quène oré sa ta tǔndaá-nǎ cuáháⁿ ducaⁿ càda-xi oré ná sàà nduu ngüita-xi cada váha-xi, te ducaⁿ chi yúhú cada-í nàcuáa nduu táhú-ndó cùndecu ndìhi ñaha-ndo xii-í núú ïo váha càa ndecu-í. ²⁹ Te nchaa nchòhó cada cuèndá váha-ndo nàcuáa xǎhaⁿ-í xii Espíritú Yǎ Ndiǒxí xǎhaⁿ-xi xii cue ñáyiú ndècu ichi-gá xǐndecu nchaa xichi”, duha càchí Yaá càháⁿ-án. Te nchaa tnúhu-án ñi chídó tnùn-í-í sá cúu-xí ñáyiú xǐndecu ichi Yá Ndiǒxí ndécú ñùú Tiàtirá.

3

Tnúhu sá cúu-xí ñáyiú xǐndecu ichi Yá Ndiǒxí ndécú ñùú Sǎrdís

¹ Te ní cachí tucu Yaá càháⁿ-án xii-í sá chídó tnùn-í-í nchaa tnúhu sá vítná càháⁿ-gá ìⁿ núú tütú, te tendaha-í quíhíⁿ ndaha téé xínu cuechi núú

Yă Ndiöxí ndécú ñùú Sărdís sá cúú-xí cuè ñáyiu xĩndecu ichi-gá ndécú ñùú-áⁿ te duha càchí-gá: “Yúhú cúù-í Yaá ndécú ndìhi ndi usá espíritú cúú cuendá Yă Ndiöxí, te ñu-ni-í cúù-í Yaá ndécú ndìhi ndi usá chódíní. Te yúhú xìní-í nchaa nàcuáa quide nchohó ñáyiu xĩndecu ichi Yă Ndiöxí ndécú ñùú Sărdís, te xìní-í sá cúú-ndó dàtná ñáyiu ní xíhí cuèi càchí ñáyiu sá ñháh. ² Te chí cuăha cuendá nàcuáa quide-ndo ndecu-ndo vitna, te nducu ndèe-ndo cada-ndo ñⁿ úú-gá nchaa sá văha nchícúⁿ nihnu-ndo vitna, chi sa ndètu víí-nă dañ-a-ndo nchàa-ndi túhú sá văha quide-ndo ni cuu, te quide cuendá-í sá ñà túú quide-ndo nchaa nacuáa cuení Yă Ndiöxí cada-ndo. ³ Te chí dándàcu iní nàcuáa càháⁿ tnúhu sá ñi xíndéohó-ndo cùtnáhá ní tuha-ndo ichi Yă Ndiöxí, te canchícúⁿ nihnu-ndo càda-ndo nacuáa càháⁿ tnúhu-áⁿ, te ndixi cuéchi iní-ndó să ñà túú quide váha-ndo ndècu-ndo, te núu vá nàcuăha-ndo cuendá nàcuáa quide-ndo ndecu-ndo ña, te cada-í dàtná quidé ñàdúhú, chi òré ñà túú nă yíhí iní-ndó quèxio-í núú ndécú-ndó. ⁴ Dico ndècu ndìhi-ndo ñⁿ úú ñáyiu càndoo caa nine iní-xi, chi ñáyiu-áⁿ ñi nduu táhú-yu cuihnú-yu dóó cuixíⁿ cuendá cundecu ndìhi-í-yu, te ducaⁿ chi cùdiú-yu núù-í. ⁵ Te nchaa ñáyiu na càda ndee iní-xi yáha nándi sá ná yăha sá cuendá-í, te ñáyiu-áⁿ nduu táhú-yu cuihnú-yu dóó cuixíⁿ, te vá náquète-í ñúú-yu núú tütú núú yódó tnùní cue ñáyiu ní nduu táhú cundecu ndìhi-í ni caa ñi quíhíⁿ, te cúñaha-í xii Tătà-í Dútú Ndiöxí ndìhi cue espíritú xínú cuèchi núù-í sá ñáyiu-áⁿ cúù-yu ñáyiu cùu cuendá-í. ⁶ Te nchaa nchòhó cada cuendá váha-ndo nàcuáa xáhaⁿ-í xii Espíritú Yă Ndiöxí xáhaⁿ-xi xii

cue ñáyiú ndècu ichi-gá xǐndecu nchaa xichi”, duha cächí Yaá càháⁿ-áⁿ. Te nchaa tnúhu-áⁿ ñǐ chídó tnùnǐ-í sá cúú-xí ñáyiú xǐndecu ichi Yá Ndiöxí ndécú ñùú Sárdís.

Tnúhu sá cúú-xí cuè ñáyiú xǐndecu ichi Yá Ndiöxí ndécú ñùú Filàdelfiá

7 Te ní cachí tucu Yaá càháⁿ-áⁿ xii-í sá chídó tnùnǐ-í nchaa tnúhu sá vítná cãháⁿ-gá ñⁿ núú tütú, te tendaha-ǐ quíhíⁿ ndaha téé xínu cuechi núú Yá Ndiöxí ndécú ñùú Filàdelfiá sá cúú-xí cuè ñáyiú xǐndecu ichi-gá ndécú ñùú-áⁿ, te duha cächí-gá: “Yúhú cúú-í Yaá ío váha quide ndáá te ñá túú tnàhí cuèchi-í. Te díhna-gá ndíí Dávíí ní taxi tnùnǐ ndíí ñáyiú, te vitna yúhú táxí tnùnǐ-í-yu, te yúhú cáháⁿ-í te núú ndëndida càa ñáyiú ndíhu ndaha-ǐ te ndëndida càa ñáyiú vá ndíhu ndaha-ǐ. 8 Te yúhú xíní-í nchaa nàcuáa quide nchohó ñáyiú xǐndecu ichi Yá Ndiöxí ndécú ñùú Filàdelfiá, te yúhú ní quide-í nàcuáa ní níhí-ndó ñⁿ ichi cahnu quide-ndo chiuⁿ-í, te vá yõo ñⁿ cada nàcuáa vá ñíhí-gá-ndó nàcuáa cada-ndo chiúⁿ-í. Te cuèi ñá túú ío ñíhí ndéé-ndó cùndecu-ndo ichi Yá Ndiöxí dico tní-ndo nchaa tnúhu cãháⁿ-í, te ñí ñⁿ xito ñá túú cãháⁿ-ndó sã ñá túú ndècu ndíhí ñaha-ndo xii-í. 9 Te nchaa ñáyiú quide nchaa nàcuáa cuíní yucu ñávãha, ñáyiú-áⁿ cúú-yu ñáyiú isràél, te cuèi cúú-yu ñáyiú isràél dico ñá túú quidé-yu nàcuáa tàú-yu cadá-yu, te yúhú cada-í sá ncháá ñáyiú-áⁿ canehé-yu sá yíñùhu núú-ndó, te cutnùnǐ ínǐ-yu sá yúhú ío cùu ínǐ ñáhà-í xii-ndo. 10 Te ío quide ndee-ni ínǐ-ndó nchìcúⁿ nihnu-ndo quide-ndo nchaa nàcuáa ní cáháⁿ-í, te xíáⁿ coto ñaha-ǐ xii-ndo ñá túú ñá

tnahá-ndó ndùu na quixi nchaa tnúndòho tnúhu ndàhú ñuyíú-a. Te òré quexìo nchaa tnúndòho-án ñuyíú-a te dàvá-án cutnùní nàcuáa ndùu sá quidé ìⁿ ìⁿ ñáyiu. ¹¹ Te ío ndìhi quixi tucu-í. Te vá dáñá ndéé-ndó càda-ndo nchaa sá yãha nchìcúⁿ nihnu-ndo quìde-ndo cuendá sá vã cuíta sá ñí cachí Yã Ndiõxí nduu táhú-ndó. ¹² Te nchaa nchòhó ñáyiu na càda ndee iní yáha nándì sá ná yãha sá cuendá-í, te yúhú cada-í sá nchòhó ío cuu càhnu-ndo cundecu-ndo núú ndécú Tàtá-í Dútú Ndiõxí, te vá ìⁿ ndùu-gá xocuiñí-ndó núú ndécú-gã. Te cada iní-ndó sã dàtná sá chídó tnùnì-í dìu Tàtá-í Dútú Ndiõxí ñì-ndo chi ducaⁿ-ni cundecu-ndo ndìhi-gá, te cada tucu iní-ndó sã dàtná sá chídó tnùnì-í nàcuáa nàni ñuú-gá ñì-ndo, chi dìu ñuú-gá-án cundecu-ndo, te ñuú-án nánì-xí Jèrusalén Sáá, duha nàni ñuú-gá. Te ñuú-án quee-xi andìu núú ndécú Yã Ndiõxí Yaá cúu Tàtá-í quée-xi ñuyíú. Te cada tucu iní-ndó sã dàtná sá chídó tnùnì-í dìu mee-í ñì-ndo, te xíⁿ cúu-xí ìⁿ dìu saa, te ducaⁿ càda iní-ndó chi cundecu ndìhi ñaha-ndo xii-í. ¹³ Te nchaa nchòhó cada cuendá váha-ndo nàcuáa xãhaⁿ-í xii Espiritú Yã Ndiõxí xãhaⁿ-xi xii cue ñáyiu ndècu ichi-gá xĩndecu nchaa xichi”, duha càchí Yaá càháⁿ-án. Te nchaa tnúhu-án ñí chídó tnùnì-í sá cúu-xí ñáyiu xĩndecu ichi Yá Ndiõxí ndécú ñuú Filadelfiá.

Tnúhu sá cúu-xí ñáyiu xĩndecu ichi Yá Ndiõxí ndécú ñuú Laodiceá

¹⁴ Te càchí tucu Yaá càháⁿ-án xii-í sá chídó tnùnì-í nchaa tnúhu sá vítná càháⁿ-gá ìⁿ núú tütú, te tendaha-ĩ quíhíⁿ ndaha téé xínu cuechi núú Yã Ndiõxí ndécú ñuú Laodiceá sá cúu-xí cue ñáyiu

xĩndecu ichi-gá ndécú ñùú-án, te duha càchí-gá: “Yúhú cùú-í Yaá quidé nũú Yă Ndiõxí, te cùu-í Yaá quidé ndáá chi càháⁿ ndáá cuiti-í nàcuáa càháⁿ Yă Ndiõxí. Te yúhú cùú-í Yaá ní quide ní ngúndecu nchaa sá ñĩ cadúha Yá Ndiõxí. ¹⁵ Te yúhú xìní-í nchaa nàcuáa quide nchohó ñáyiú xĩndecu ichi Yá Ndiõxí ndécú ñùú Laodiceá, te xìní-í sá ñã túú cuìní-ndó càncicúⁿ nihnu-ndo nchàa nacuáa càháⁿ-í, te ni ñã túú cuìní-ndó ãña duuⁿ-ndo. Te váha-gá sá dúúⁿ dùuⁿ cada-ndo nchaa nacuáa càháⁿ-í àdi núu ñáhá te duuⁿ duuⁿ ãña-ndo. ¹⁶ Te sá dúcáⁿ quide-ndo ñã túú cuìní-ndó dùuⁿ duuⁿ-ni cada-ndo nàcuáa càháⁿ-í, te ni ñã túú cuìní-ndó dùuⁿ duuⁿ-ni ãña-ndo te sáá nduu vă cùndèe-gá iní-í cuèndá nchaa sá quidé-ndó-ãⁿ, te daquèe tíhú ñáhà-í xii-ndo. ¹⁷ Te càchí-ndó sã cuicá-ndó, te ío váha ta yăha-ndo nchàa nduu cuáháⁿ, te ñã túú tnàhí ná cúmăní xii-ndo, te ñã túú cùtnuní iní-ndó sã cúú-ndó ãtná cue ñáyiú ío ndàhú yăha, te cùu-ndo ãtná ñáyiú ndàhú, ñáyiú ío cùndahú iní ñáhá tnàha ñáyiú-xí, te cùu-ndo ãtná cue ñáyiú cuáá, te cùu tucu-ndo ãtná cue ñáyiú ndàhú ñã túú tnàhí dóó-xi. ¹⁸ Te na càchí tnúhu-í xii-ndo sã cáda-ndó ãtná xĩquide cue ñáyiú sàaⁿ ìⁿ sá ñĩ cuáha mee-ni dĩhúⁿ cuáaⁿ sá ío váha càa, te ducaⁿ quidé-yu te ío-gá cúú cuicá-yu. Te cada tucu-ndo ãtná xĩquide cue ñáyiú sàaⁿ dóó cuixíⁿ sácũihnu-yu cuèndá sá vă cúũ-yu ãtná ñáyiú ndàhú ñã túú dõó-xi, te cada tucu-ndo ãtná quidé cue ñáyiú sàaⁿ yúcu quèe núú-xi nàcuáa cutnùní váha núũ-yu, te duha càháⁿ-í xăhaⁿ-ĩ xii-ndo chi cuìní-í sá nàtuha ñaha-ndo xii-í, te ío váha cundecu-ndo sã cúú-xí Yă Ndiõxí. ¹⁹ Te càháⁿ-í dóho nchaa ñáyiú cùu iní-í òré ñã túú quide ndáá-yu, te ãndoho-í-yu, núu xíãⁿ

cuìní-í sá nchòhó ndixi cuéchi iní-ndó sã ñà túú quide váha-ndo ndècu-ndo. ²⁰ Te na càchí tnúhu-í xii-ndo sã yúhú cúu-í dàtná ìⁿ téé nùtníi yuyèhe ndaa quehé te càháⁿ-í ñáyiu yìhi xití vehe, te núu na càda cuendá-yu sá càháⁿ-í te nacaáⁿ-yu yuyèhe te quíhu-í xití vehe cudìni-í ndihí-yu, te duha càháⁿ-í chi cuìní-í cundecu ndihí ñaha-í xii-ndo. ²¹ Te nchaa nchòhó ñáyiu na càda ndee iní-xi yáha nándi sá ná yáha sá cuendá-í, te yúhú taxi-í xii-ndo ìⁿ xichi núú ndécù-í cundecu-ndo te cunu-ndo tnàhá-ndó dàtná cúnùu-í, chi yúhú ducaⁿ ñí quide ndee iní-í ní yáha-í nándi sá ñí yáha-í te vitna ní nduu táhù-í ndécù-í núú ndécú Tàtà-í Dútú Ndiòxí cúnùu-í. ²² Te nchaa nchòhó cada cuendá váha-ndo nàcuáa càháⁿ Espiritú Yá Ndiòxí xáhaⁿ-xi xii cue ñáyiu ndècu ichi-gá xíndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ñí chidó tnùn-í sá cúu-xí ñáyiu xíndecu ichi Yá Ndiòxí ndécú ñúú Laodiceá.

4

Nàcuáa chĩñuhu ñáyiu Yá Ndiòxí andiu

¹ Te sátá ñí yáha ducaⁿ ñí cuu te ní xiní-í nchii andiu, te ní cáháⁿ tucu Yaá ní cáháⁿ ndihí ñaha xii-í díhna, te Yaá-áⁿ ñí cáháⁿ níhi-gá dàtná càháⁿ níhi ìⁿ cútú, te ní cachí-gá xii-í:

—Taquène iha te na dànehé ñáhà-í xii-n nchaa nacuáa cada-xi ndéé núú cuàháⁿ núú vèxi — càchí-gá.

² Te òré-ni-áⁿ ñí quide ñaha tùcu Espiritú Yá Ndiòxí xii-í nàcuáa càchí iní-xi, te diu-ni òré-áⁿ ñí xiní-í nùtníi ìⁿ xilé váha andiu te cà datná cáá xilé sácõo nchihí cue ñáyiu ío cunu, te núú xilé

váha-áⁿ núcõo Yaá táxí tnùnì. ³ Te Yaá-áⁿ cáá-gã dàtná cáá yũú chàhnchí yúú vãha sá nání jãspé, te càa tucu-gá dàtná cáá yũú vãha sá nání cõrnalíná, te ñùhu doco ñaha ìⁿ cóó yáhnchí xii-gá, te tãsaⁿ-dì dàtná tãsaⁿ ìⁿ yúú vãha sá nání èsmeraldá. ⁴ Te ní xíní tucu-í nútn̄ òcò cùmí xilé váha ñi càndéé núú núcõo-gá, te núú xilé-áⁿ xĩnucóo òcò cùmí cue téé cùu sacuéhé te xĩxĩnu-güedé mee-ni dõó cuixíⁿ, te ìⁿ caa coròná sá ñi cuáha mee-ni dĩhúⁿ cuááⁿ xĩxúhuⁿ díquí-güedě. ⁵ Te núú núcõo Yaá táxí tnùnì-áⁿ sàá ndúté, te càháⁿ ñúhu te xica chĩhi-xi dõndaha, te càyú úsá iti núú núcõo-gá, te sá ùsá iti-áⁿ xĩãⁿ cútnùnì sá ndécú ùsá espíritú cúú cuendá-gá. ⁶ Te ndècu ìⁿ sá ndécú ndàa núú-gã te xĩãⁿ cáá dàtná cáá làmár, te dàtná cáá vidiú cáá ñihí.

Te ñi càndéé d̄ĩñi Yaá núcõo-áⁿ xĩnutn̄ cùmí quiti te titní víhí tĩnuu-güedi ndeé ndàa sátá-güedi ndihí ndàa núú-güedi. ⁷ Te quiti díhna nuu càa-dì datná cáá ndicaha, te quiti cùu uú cáá-dí dàtná cáá ndicutu, te quiti cùu uní néhé-dí nũú t̄e, te quiti cùu cumí cáá-dí dàtná cáá yàcolo oré cuáháⁿ-dì núú tàchí. ⁸ Te ndi cùmí quiti-áⁿ ndèé íñú ndíxíⁿ-güedi ìⁿ ìⁿ-güedi, te ñihí xití ndíxíⁿ-güedi ndihí ndàa sátá ndíxíⁿ-güedi ndèé tĩnuu-güedi, te nduu nũú chíñùhu-güedi Yá Ndiõxí, te xãhaⁿ-güedi xii-gá:

Yòhó Dútú Ndiõxí ducaⁿ-ni ta quide ndáá-n v̄xi, te
 ducaⁿ-ni quide ndáá-n cuẽi vitna, te ñi-ni
 ducaⁿ càda ndáá-n nũú cuáháⁿ núú v̄xi,
 te cùu-n Yaá quidé nchàa-ndi túhú sá vãha,
 te ñi-ni-n sà ndecu-n ndéé cútnàhá ní cuáha
 ñuyíú,

te diu-ni-n ndècu-n cuéi vitna, te diu-ni-n
 cùndecu-n cuéi ndéé núú cuàháⁿ núú vëxi.
 Duha xăhaⁿ cuè quiti-áⁿ xii Yaá núcõo núú xilé
 váha-áⁿ chíñùhu ñaha-güedi.

⁹ Te cue quiti-áⁿ ïo ndàcáⁿ táhú-güedi núú Yàá
 núcõo núú xilé váha-áⁿ cuendá nchaa sá quidé-gă.
 Te Yaá-áⁿ cúú-gă Yaá ndécú nchàa nduu nchaa
 quíú. Te cue quiti-áⁿ cāhí-güedi sá ïo cāhnu
 cuu-gá te nèhe-güedi sá yíñùhu núú-gă. Te ndi
 tnahá òré ducaⁿ cāháⁿ-güedi, ¹⁰ te ndi òcó cúmí
 cue tée cùu sacuéhé xīnucóo-áⁿ ngüèñí xítí-güedě
 núú Yàá núcõo-áⁿ, chi diu-gá cúú-gă Yaá ndécú
 nchàa nduu nchaa quíú te chíñuhu ñaha-güedé
 xii-gá, te tàva-güedé coróná ñúhú dǐquí-güedě te
 tàxi ndecu-güedé núú-gă, te xăhaⁿ-güedě xii-gá:

¹¹ Yòhó cúú-n Dǔtú Ndiǒxí Yaá cúú cuendá ñáhá
 xì-ndí,
 te ío cāhnu cuu-n, te ío váha quide-n,
 te nèhe-ndí sá yíñùhu núú-n, chi ducaⁿ tàú-xi
 cada-ndí,
 chi yòhó cúú-n Yàá ní cadúha nchaandi túhú sá ío,
 te ducaⁿ ñí ngúndecu nchaa xíⁿ chi mee-n dùcaⁿ ní
 sani iní-n càda-n.

5

*Cuendá Yaá cáá dàtná cáá ñⁿ mbéé quiti ní
 dánicuéhè-güedé ndihí cuendá ñⁿ tutú*

¹ Te ní xiní tucu-í sá Yàá núcõo núú xilé váha-áⁿ
 núndàha-gá ñⁿ tutú ní nacaúnuu xio ndaha cùha-gá,
 te ndéé lètrá ndàa sátá-xi ndihí ndàa xítí-xi, te
 úsá tnahá tutú lǐhli ñùhu seyú ndéé sátá tütú-áⁿ
 cuendá sá vǎ dáñá-xí nàcaá. ² Te ní xiní-í ñⁿ espíritú

xínú cuèchi núú Yă Ndiöxí, te ndee vîhi-xi te níhi càháⁿ-xi, te cächí-xi:

—¿Yoo tàú-xi xocàni nchaa tutú lîhli ñùhu seyú ndèé sátá tütú-a te nadacàá-xi? —cächí espíritú-áⁿ.

³ Dico ni àndïu, te ni núú ñùyíú-a, te ni ndàa xítí ñùhu ñá túú ìⁿ ñáyíu tàú-xi nadacàá tutú-áⁿ te cundèhé-yu. ⁴ Te yúhú ní ngüíta-í ndàhyú vîhì-í cuendá sá ñà túú ñì ìⁿ ñáyíu tàú-xi nadacàá tutú-áⁿ cundèhé-yu. ⁵ Te ìⁿ cue téé cùu sacuéhé xîncóo xíaⁿ ñí cachí-güedé xii-í:

—Vá ndàhyú-gá-n, te cada cuendá-n chi Yaá ío cùnuu cuu ndi mee cue ñáyíu cùu ñàní tnáhá ndîi Jüdá, ñi-ni Yaá cúú ñàní tnáhá ndîi Dàvíí, Yaá-áⁿ cúú-gă Yaá ní ndacu ní yáha nchaa nándi sá ñí yáha, núú xíaⁿ ñi-ni gá tàú-gă xocàni-gă nchaa tutú lîhli ñùhu seyú ndèé sátá tütú-áⁿ te nadacàá-gă —duha cächí téé cùu sacuéhé-áⁿ.

⁶ Te tnuú ndi òcó cúmí cue téé cùu sacuéhé xîncóo-áⁿ, ndihî tnuú ndi cúmí quitî xînutní-áⁿ, ndihî núú núcóo Yaá táxí tnùnî-áⁿ ñí xini-í nútñî ìⁿ Yaá cáá dàtná cáá ìⁿ mbéé quitî ní dánîcuèhé-güedé te ní xihî-di ni cùu te ní ndoto-di, te ndèé úsá ndiqui-di, te ndèé úsá tinùu-di, te sá úsá tinùu-di-áⁿ cútnùnî sá ndécú úsá espíritú cúú cuendá Yă Ndiöxí, ducaⁿ càa Yaá-áⁿ ñí xini-í. Te cue espíritú-áⁿ ñí tendaha-gă xícá cùu-xi ni caa xico ñuyíú. ⁷ Te Yaá cáá dàtná cáá ìⁿ mbéé quitî ní dánîcuèhé-güedé-áⁿ ñí sáháⁿ-gă núú Yáá núcóo núú xilé váha-áⁿ. ⁸ Te òré ní queheⁿ-gă tutú-áⁿ te ndi cúmí quitî xînutní xíaⁿ ñí ngüíñî xítî-güedî núú-gă, te ducaⁿ ñí ngüíñî xítî tûcu ndi òcó cúmí cue téé cùu sacuéhé xîncóo-áⁿ, te ndi díⁿ núú-güedě xînehe-güedé yaá sá nánî àrpá,

te xĩnehe tucu-güedé ndí dííⁿ nũú-güedě ìⁿ caa tĩcùú ní cuáha mee-ni dǐhúⁿ cuàáⁿ, te chitu dũsa sá sàháⁿ tnámí. Te ñúhmá dũsa sá sàháⁿ tnámí-ǎⁿ cúú-xí dàtná nchaa tnúhu càháⁿ nchaa ñáyiú ndècu ichi Yá Ndiõxí òré càháⁿ ndihì ñàhá-yu xii-gá. ⁹ Te xìta-güedé ìⁿ ndudú sáá ndihì cue quitì-áⁿ chíñùhu ñaha-güedé xii-gá, te càchí-güedé ndihì cue quitì-áⁿ: Yòhó tàú-n quèheⁿ-n tutú-a te xocàni-n nchaa tutú lĩhli ñùhu seyú ndèé sátá-xi,

chi yòhó ní sati níñí-n te ní xíhí-n,
te cuèndá xíǎⁿ ní nduu cuèndá Yá Ndiõxí cue ñáyiú ìⁿ ìⁿ nàción, ndihì ñáyiú xĩndecu ìⁿ ìⁿ ñuú, ndihì ñáyiú càháⁿ ndí dííⁿ ndí dííⁿ nũú tnúhu, ndihì ñáyiú xĩndecu ìⁿ ìⁿ xichi.

¹⁰ Te ní quidé-n-yu dàtná cue téé yìndaha ñáyiú, te ní quide túcú-n-yu dàtná cue dútú sǎ cúú-xí Yá Ndiõxí.

Te sáá nduu te taxi tnùnì-yu ñuyíú-a.
Duha càháⁿ cue téé-áⁿ ndihì cue quitì-áⁿ chíñùhu-güedé ndihì-güedé Yaá-áⁿ.

¹¹ Te sátá dúcáⁿ te ní tecú dóho-í ní cáháⁿ cuéhé víhí espíritú xínú cuèchi ñi candéé núú núcõo Yaá táxí tnùnì-áⁿ, ndihì núú xĩnutnì ndí cùmí cue quitì-áⁿ, ndihì núú xĩnucóo cue téé cùu sacuéhé-ǎⁿ, te ní xiní-í sá sũúnì cuéhé víhí espíritú-áⁿ xĩndecu xíáⁿ, ¹² te níhi ní cáháⁿ cue espíritú-áⁿ, te càchí-xi:

Yòhó Yaá cáá dàtná cáá ìⁿ mbéé quitì ní dánĩcuèhé-güedé te ní xíhí ní cùu te ní ndoto, te yòhó ío càhnu cuu-n, te ndècu ndihì-n nchaandi túhú,
te ío ndècu ndihì-n sá xìnì tnùnì-n,
te ndàcu-n quide-n nchaa sá cuìnì-n,

te nèhe-ndí sá yíñùhu núú-n, te ío váha quide-n,
 te chĩñuhu ñaha-ndí xii-n, chi ducaⁿ tàú-ndí
 cada-ndí chi ío càhnu cuu-n.
 Duha càchí nchaa cue espíritú-áⁿ xǎhaⁿ-xi xì-gá
 chíñùhu ñaha-xi.

¹³ Te ní tecú dóho-í ní cáháⁿ nchaandi túhú sá
 ñí cadúha Yá Ndiǒxí ndécú àndiú, ndihí nchaa sá
 ndécú ñùyíú, ndihí nchaa sá ndécú xítí ñuhu, ndihí
 nchaa sá ñúhú xítí ndute làmár, te xĩcachí-xi:

Yòhó Yaá núcǒo núú xilé váha, ndihí yòhó Yaá cáá
 dàtná cáá ìⁿ mbéé qui^{ti} ní dánicuèhé-güedé
 táxí tnùní-ndó, te nèhe-ndí sá yíñùhu
 núú-ndó,

te ducaⁿ ìo ndàcáⁿ táhú-ndí núú-ndó, chi ío váha
 quide-ndo te ío cùnuu-ndo,

te diu-ni duha cáháⁿ váha-ndí cuendá-ndó ñí caa ñí
 qui^{ti}.

Duha càchí nchaa sá ñí cadúha Yá Ndiǒxí.

¹⁴ Te ndí cùmí cue qui^{ti} xĩnutní-áⁿ càchí-güedi:

—jDucaⁿ na cùnduu! —cachí-güedi.

Te ndí òcó cùmí cue téé cùu sacuéhé xĩndecu-áⁿ ñí
 ngüñí xítí-güedé chíñùhu-güedé Yaá ndécú nchaa
 nduu nchaa quiú.

6

Cuendá úsá tutú lĩhli ñùhu seyú

¹ Te sátá dúcáⁿ te ní xiní-í sá Yàá cáá dàtná cáá
 ìⁿ mbéé qui^{ti} ní dánicuèhé-güedé-áⁿ ñí xócání-gǎ ìⁿ
 tutú lĩhli ñùhu seyú ndèé sátá tütú sá ñí nadúcúⁿ
 nuu-áⁿ, te ní tecú dóho-í ní cáháⁿ ìⁿ qui^{ti} cùmí
 xĩnutní-áⁿ, te níhi ní cáháⁿ-di dàtná càháⁿ ñúhu, te
 càchí-di:

—¡Taquìxi cundehe-n! —cachí-di.

² Te òré-ni-án ñĩ xiní-í ìñ cuàyú cuìxíⁿ yódó ñàha ìñ sá yódó ñàha xii-di, te sá yódó ñàha xii-di-án néhé-xí ìñ arcú sá cúú tnùxí-xi, te ní nduu táhú-xi ìñ coróná, te ní ndacu-xi ní cunuu-xi te ducaⁿ-ni ta cùnⁿuu-xi cuáháⁿ.

³ Te òré ní xócání-gă tutú lĩhli cùu uú ñúhú sèyú ndèé sátá tütú sá ñĩ nadúcúⁿ nuu-áⁿ, te ní tecú dóho-í ní cáháⁿ tucu ingá quiti cùu uú xĩnutnĩ-áⁿ, te cächí-di:

—¡Taquìxi cundehe-n! —cachí-di.

⁴ Te òré-ni-án ñĩ xiní tucu-í ìñ cuàyú tícuèhé ní quee-di cuáháⁿ-di, te yòdo ñàha ìñ sá yódó ñàha xii-di, te sá yódó ñàha xii-di-án ñĩ níhí-xi tnúhu ndee ìní sá dáticánuu-xi ñáyiu vá cúndècu ndĩhi tnaⁿha váha-gá-yu, te ngúita ñáyiu cahni tnàhá-yu, te ní nduu táhú-xi ìñ yuchí cáhnú vèhi.

⁵ Te òré ní xócání tucu Yaa-áⁿ ingá tutú lĩhli cùu uní ñúhú sèyú ndèé sátá tütú sá ñĩ nadúcúⁿ nuu-áⁿ, te ní tecú dóho-í ní cáháⁿ quiti cùu uní xĩnutnĩ xíaⁿ, te cächí-di:

—¡Taquìxi cundehe-n! —cachí-di.

Te òré-ni-án ñĩ xiní tucu-í ìñ cuàyú tnúú te yòdo ñàha tucu ìñ sá yódó ñàha xii-di, te sá yódó ñàha-án núnⁿdàha-xi úú yaxiⁿ libre. ⁶ Te ní tecú dóho-í ní cáháⁿ ìñ sá ñĩ cáháⁿ tnuú cue quiti xĩnutnĩ-áⁿ, te cächí-xi:

—Ìñ cuàrtú-nă triú níhí-ndó sã ìñ dĩhúⁿ denàriú, te uní cuàrtú-nă cebàdá níhí-ndó sã ìñ tucu dĩhúⁿ denàriú, dico acití ndĩhi ndudí ndéhé yoho yàha stilé chi vá ndĩhí nìhnu —duha cächí sá càháⁿ-áⁿ.

⁷ Te òré ní xócání tucu Yaa-áⁿ tutú lĩhli cùu cumí ñúhú sèyú ndèé sátá tütú sá ñĩ nadúcúⁿ nuu-áⁿ,

te ní tecú tucu dóho-í ní cáháⁿ tucu ìngá quìti cùu cumí xĩnutnĩ-áⁿ, te càchí-di:

—¡Taquìxi cundehe-n! —cachí-di.

⁸ Te òré-ni-áⁿ nĩ xini tucu-í ìⁿ cuàyú yàhá, te yòdo ñaha tucu ìⁿ sá yódó ñaha xii-di, te sá yódó ñaha xii-di-áⁿ nání-xí Sǎ xìhí, te xǎⁿ sáhní-xí ñǎyiu, te sátá xǎⁿ nchìcúⁿ sá nèhé núú ndécú ñǎyiu ní xíhí. Te cúmí xichi cùu ñuyíú, te sá sáhní ñaha xii ñáyiu-áⁿ nĩ níhí-xi tnúhu ndee ìní danàa-xi ñáyiu ìⁿ xichi ñuyíú, te davá-yu cahni ñaha-xi ndìhi yuchí, te cada-xi sá cóo tnámá te cuú-yu, te cada tucu-xi sá cóo cuèhé cahni-xi ñáyiu, te diu-ni tucu-xi cada sá ncháá quìti dééⁿ cahni-di ñáyiu.

⁹ Te òré ní xócání tucu Yaá-áⁿ tutú lĩhli cùu uhúⁿ ñúhú sèyú ndéé sátá tutú sá nĩ nadúcúⁿnuu-áⁿ, te òré-áⁿ nĩ xini-í nútñĩ ìⁿ núú sácòdó sǎ ndúú tǎhú Yǎ Ndiǒxí, te ndàa caha xǎⁿ ní xini-í xĩndecu nchaa àlmá ñáyiu ní sahní-güedé núú ñuyíú sǎ cuendá tnúhu Yá Ndiǒxí, ndìhi sá cuendá sá nĩ cáháⁿ váha-yu cuendá-gá. ¹⁰ Te nchaa àlmá-áⁿ nĩhi xícáháⁿ-xi, te xǎhaⁿ-xi xii Yá Ndiǒxí:

—Yòhó Dútú Ndiǒxí cúú-n Yàá ñǎ túú tnàhí cuéchi-xi, te ñǎ túú tnàhí quée cáva-n quide-n ìⁿ sá càháⁿ-n. ¿Te ná ndéé ama dandòho-n ñáyiu ndècu ñuyíú nachinaa-n cuendá sá nĩ quide ñàhá-yu xii-ndí-i? —càchí cue àlmá-áⁿ xǎhaⁿ-xi xii-gá.

¹¹ Te sátá dúcáⁿ te nchaa cue àlmá ñáyiu-áⁿ nĩ níhí-xi dóo cuìxíⁿ ní quée cuíhnu-xi, te ní xitnũhu ñaha xii-xi sá ná ndètatú-xi te cundetú tnaa-xi ndéé ná xĩnu cava cuú ñáyiu nàcuáa ndéé tnuní dàtná ní xíhí cue ñáyiu dii àlmá-xi cùu-xi. Te ñáyiu sa ní xíhí-áⁿ ìⁿ-ni cùú-yu ndìhi ñáyiu vitna cuú-áⁿ chi

mee-ni chiùⁿ Xítóhó Jesucristú quídě-yu, te diu-ni ichi-gá ndécǔ-yu.

¹² Te òré ní xócání tùcu Yaá-áⁿ tutú lǐhli cùu iñú ñúhú sèyú ndée sátá tütú sá ñí nadúcúⁿ nuu-áⁿ, te ní xiní-í sùúni ñíhi ní quidi-xi ñuyíú, te ní cutnuu ñíhií núú nchǐcanchii dàtná ìⁿ dóó tnuú, te ní cuu ticuèhé níñí ñíhii núú yǒó. ¹³ Te ní xiní-í ní ngoyo chódíní ñuyíú-a dàtná ngóyó ngǔxí yíhí òré quéné tǎchí ñíhi. ¹⁴ Te ní xiní-í ní nadúcúⁿnuu andiu dàtná nádúcúⁿnuu ìⁿ tutú te ní ndóñúhú-xí, te nchaa tindúú ñí xica ndehe-xi núú ndécú-xí, te ducaⁿ ñí xica ndehe tucu nchaa tindúú yìchí ndécú xítí ndute làmár. ¹⁵ Te nchaa cue téé yìndaha ñáyiu ní nguívǎha-güedé, ndíhi nchaa dava-gá cue téé ío tàxi tnuní, ndíhi nchaa ñáyiu cuica, ndíhi nchaa cue téé tàxi tnuní sandàdú, ndíhi cue sandàdú cue téé ío váha sáá díquí-xi nàcuáa cada-güedé nàá-güedé, ndíhi nchaa ñáyiu ñá túú tñàhí dàñá quee núú chíúⁿ pàtróóⁿ-xi, ndíhi nchaa ñáyiu dàñá queé núú chiùⁿ patróóⁿ-xi. Te dava ñáyiu-áⁿ ñí nguívǎha-yu xítí yaú, te davá-yu ní nguívǎha-yu nchaa tnuú cava. ¹⁶ Te xǎhǎⁿ-yu nchaa tindúú ndíhi nchaa cava:

—Chí tácuuⁿ chiyáha ñaha-ndo xii-ndí cuendá sá vǎ quíni ñáhá Yaá ío tàxi tnuní núcǒo núú xilé váha, ndíhi cuendá sá vǎ dándòho ñaha Yaá cáá dàtná cáá ìⁿ mbéé quití ní dánǐcuèhé-güedé, chí Yaá-áⁿ ïo cùdééⁿ-gǎ núú-ndí —duha càchí nchaa ñáyiu-áⁿ xǎhǎⁿ-yu xii nchaa tindúú-ǎⁿ ndíhi nchaa cava-áⁿ.

¹⁷ Te vitna ní sáá nduu ío cùu cahnu nduu tñúndòho tñúhu ndàhú, te vá yǒo ìⁿ cundee ìní-xi yáha nchaa tñúndòho-a.

7

Ñáyiú isràél ñáyiú naníhí tàhú

¹ Te sátá xǎⁿ te ní xiní-í cùmí tnàhá espíritú xínú cuèchi núú Yǎ Ndiǒxí xǐnutnǐ-xi ndi cùmí xio ñuyíú, te cue espíritú-áⁿ ní ngani-xi táchí cuendá sá vǎ cuícó-gǎ-xi ni làmár, te ni dǐquí yutnu, te ni ìⁿ xichi ñuyíú vǎ cuícó-gǎ-xi. ² Te cue espíritú-áⁿ ndécú ndìh-xi tnúhu ndee ìní danàa-xi sá íó làmár ndìh sá íó ñuhu yìchí, te ní xiní tucu-í ingá espíritú xínú cuèchi núú Yǎ Ndiǒxí ní quee nchita-xi ndàa nacuáa quène nchícanhii, te nùndaha-xi seyú Yǎ Ndiǒxí Yaá ndécú nchàa nduu nchaa quíú, te níhi ní cáháⁿ-xi xǎhaⁿ-xi xì ndi cumí cue espíritú-áⁿ:

³ —Vá dánàa-ndo sá íó làmár, te ni vǎ dánàa-ndo yutnu, te ni ìⁿ sá íó ñuyíú vǎ dánàa-ndo, chi cundetú-ndo ndèé ná tàxi ndecu-ndí ìⁿ sèñá tneé nchaa ñáyiú xínu cuechi núú Tǎtá-ó Dùtú Ndiǒxí — duha càchí espíritú-áⁿ xǎhaⁿ-xi xì ndi cumí espíritú xǐnutnǐ ndi cùmí xichi ñuyíú.

⁴ Te ní tecú dóho-í ní cáháⁿ ìⁿ sá nǐ cáháⁿ, te ní cachí-xi sá núú ndí ùxúú xichi cue ñáyiú isràél te ní xínu ìⁿ cièndú údico cùmí mǐl-yu ní ngúndecu sèñá tneé-yu. ⁵ Te núú ìⁿ cièndú údico cùmí mǐl ñáyiú-áⁿ, te ní xínu ùxúú mǐl cue ñaní tnàhá ndíi Jùdá ní ngúndecu sèñá tneé-yu, te ùxúú mǐl cue ñaní tnàhá ndíi Rùbén, te ùxúú mǐl cue ñaní tnàhá ndíi Gǎd, ⁶ te ùxúú mǐl cue ñaní tnàhá ndíi Àsér, te ùxúú mǐl cue ñaní tnàhá ndíi Neflálí, te ùxúú mǐl cue ñaní tnàhá ndíi Manàsés, ⁷ te ùxúú mǐl cue ñaní tnàhá ndíi Mìó, te ùxúú mǐl cue ñaní tnàhá ndíi Lèví, te ùxúú mǐl cue ñaní tnàhá ndíi Isàcár, ⁸ te ùxúú mǐl cue ñaní tnàhá ndíi Zabùlón, te ùxúú mǐl cue ñaní tnàhá ndíi

Chèé, te úxúú mǐl cue ñaní tnáhá ndǐ Benjàmín,
nchaandi túhú ñáyiu-áⁿ ñǐ ngúndecu sèñá tneé-yu.

Cuéhé víhí ñáyiu ñǐhnu dóó cuixíⁿ

⁹ Te sátá xǎⁿ te ní xiní-í cuéhé víhí ñáyiu, ñáyiu
ǐⁿ ǐⁿ nacióⁿ, ndǐhí ñáyiu ǐⁿ ǐⁿ ñuú, ndǐhí ñáyiu càháⁿ
ndǐ dǐⁿ ndǐ dǐⁿ núú tnǔhu, ndǐhí ñáyiu ní xíndecu
ǐⁿ ǐⁿ xichi, te nchaa ñáyiu-áⁿ xǐnutnǐⁿ-yu ndàa núú
Yàá táxí tnùnǐ núcǔo núú xilé váha, ndǐhí núú Yàá
cáá dàtná cáá ǐⁿ mbéé quǐti ní dánǐcuèhé-güedé,
te vá yǔo ǐⁿ ndàcu cahú ñaha xǐⁿ-yu chí cuéhé
víhǐ-yu, te nchaá-yu xǐxǐhnu-yu mee-ni dóó cuixíⁿ,
te nùndahá-yu nchaá-yu ǐⁿ caa ndàha yutnu ñúú.

¹⁰ Te nchaá-yu níhí xǐcáháⁿ-yu, te càchí-yu:

Yaá táxí tnùnǐ núcǔo núú xilé váha cùu-gá Ndiǔxí-ó,
te diu-gá ndǐhí Yaá cáá dàtná cáá ǐⁿ mbéé quǐti
ní dánǐcuèhé-güedé ní dácǎcu ñǐhnu ñaha-gǎ
xii-o núú ùhú núú ndàhú.

Duha càchí nchaa ñáyiu-áⁿ. ¹¹ Te nchaa espíritú
xínú cuèchi núú Yǎ Ndiǔxí ní nadúcúⁿndèe-xi
xǐnutnǐⁿ-xi ñǐ càndéé núú núcǔo Yaá núcǔo núú xilé
váha, ndǐhí núú xǐnucóo cue téé cùu sacuéhé, ndǐhí
cue ndǐ cùmí quǐti xǐnutnǐⁿ-áⁿ, te nchaa-xi ní ngüǐñǐ
xítí-xí te ní ngúnu ndeyi-xi núú Yàá núcǔo núú xilé
váha-áⁿ, te nchaa-xi ní ngüíta-xi chíñuhu ñaha-xi
xii-gá, ¹² te càchí-xi:

Na càháⁿ ndáá-ndǐ núú yòhó Tǎtá-ndǐ Dútú Ndiǔxí
sá ïo càhnu cuu-n, te ndàcu-n guide-n nchaa
sá vǎha cuǐní-n, te ïo váha guide-n, te ndècu
ndǐhí-n nchaa sá xìnǐ tnùnǐ-n,

te chiñuhu ñaha-ndí xii-n, te ducaⁿ ndàcáⁿ táhú-ndí
núú-n cuèndá nchaa sá quidé-n, te nèhe-ndí
sá yíñuhu núú-n,

te tnúhu càháⁿ-ndí-a cùu-xi tnúhu ndáá, te ñiu-ni
duha cáháⁿ-ndí ndéé núú cuàháⁿ núú vëxi.
Duha càchí nchaa cue espíritú-áⁿ xáhaⁿ-xi xii Yaá
núcõo núú xilé váha-áⁿ.

¹³ Te ñⁿ cue téé cùu sacuéhé xĩndecu-áⁿ ñí xicáⁿ
tnúhú-dë núú-í, te càchí-dé:

—¿Yóndi cùu ñáyiú dàcáⁿ xíxíhnu dóó cuixíⁿ-áⁿ, te
ndèé véxi-yu núú dàcáⁿ xĩndáá-yu-i? —càchí-dé.

¹⁴ Te yúhú ní xáhaⁿ-í:

—Tátá, ñá túú xini-í, dico mee-n xini-n —duha ní
xáhaⁿ-í xii-dé.

Te dàtnúni ní cachí tnúhu-dé xii-í ná cúú
ñáyiú-áⁿ, te càchí-dé:

—Nchaa ñáyiú-a cúú-yu ñáyiú ní quee núú ió
víhí tnúhu ndóho tnúhu ndàhú sá vã cúndèe iní-ó
te véxi-yu iha, te cúú-yu ñáyiú sa ní nduu ndoo
ní nduu nine iní-xi cuèndá sá ñí sati níñí Yàa
cáá dàtná cáá ñⁿ mbéé quiti ní dánicuèhé-güedé,
cuèndá xíãⁿ vitna ní ndihí-yu ní nduu cuixíⁿ dóó
xíxíhnu-yu. ¹⁵ Te núú xíãⁿ vitna ní nduu táhú-yu
ndécú-yu núú ndécú Yã Ndiõxí Yaá táxí tnúni
núcõo núú xilé váha, te cuèi nduu cuèi niú xínú
cuèchí-yu núú-gã vitna, te ñiu-gá xító ñàha-gá
xií-yu. ¹⁶ Te vitna ní sáá-yu núú-gã cundecú-yu
te vá ndóhó-gã-yu docó, te ni vã quini-gá-yu
ndohó-yu yíhí-yu ndute, te ni vã quini-gá-yu
ndohó-yu cahni nchíanchii, te ñá túú-gã ná cahni
ndohó-yu. ¹⁷ Te ducaⁿ chi Yaá cáá dàtná cáá ñⁿ
mbéé quiti ní dánicuèhé-güedé ndécú-gã núú nútní
xilé váha núcõo Yá Ndiõxí Yaá táxí tnúni, Yaá-áⁿ

coto ñaha-gă xií-yu dàtná quidé ìⁿ toli oré xító-dě mběé-dě, te candeca ñaha-gă xií-yu quíhíⁿ núú tǒo ndute, te ndute-áⁿ cúú-xí ndùte candeca iní-yu, te Yá Ndiǒxí cada-gá sá vǎ quìní-gá-yu tnúhu ndàhyú —duha ní cachí tnúhu tée cùu sacuéhé-ǎⁿ xii-í.

8

Cuèndá tǐcùú sá ñǐ cuáha mee-ni dǐhúⁿ cuááⁿ

¹ Te sátá dúcáⁿ te Yaá cáá dàtná cáá ìⁿ mbéé quiti ní dánícuéhé-güedé ní xócání-gă tutú líhli cùu usá ñúhú sèyú ndéé sátá tütú sá ñǐ nadúcúⁿnuu-áⁿ, te òré-áⁿ ñǐ cunahi sǔúní nàvíí-nǎ ní cuu andiú dàtná cuádava òré. ² Te ní xiní-í úsá tnàhá espíritú xínú cuèchi núú Yǎ Ndiǒxí xǐnutnǐ-xi núú núcǒo-gá, te ní níhí-xi ìⁿ caa cǔtú xǐnehe-xi. ³ Te dǎtnùní ní xiní tucu-í ingá espíritú xínú cuèchi núú-gă ní quexio-xi nehe-xi ìⁿ tǐcùú ní cuáha mee-ni dǐhúⁿ cuááⁿ te ñúhu vai dúsa sá sàháⁿ tnámí, te ní ngúnutnǐ espíritú-áⁿ núú ndécú sǎ ñǐ cuáha mee-ni dǐhúⁿ cuááⁿ núú sácǒdó sǎ ndúú tǎhú Yǎ Ndiǒxí, te xiǎⁿ nútnǐ-xi ndàa núú-gă, te dúsa sá sàháⁿ tnámí-áⁿ cahmi espíritú-áⁿ núú sácǒdó sǎ ndúú tǎhú-gă-áⁿ cuèndá ñúhmá dǔsa-áⁿ cundihí-xi nchaa tnúhu càháⁿ ñáyíu càháⁿ ndihí ñaha xì-gá, nchaa ñáyíu cùu cuendá-gá. ⁴ Te nùndaha espíritú-áⁿ tǐcùú ñúhú dǔsa sá sàháⁿ tnámí càyú, te quène ñúhmá nútnǐ-xi núú Yǎ Ndiǒxí, te ñúhmá-ǎⁿ cundihí-xi nchaa tnúhu càháⁿ ñáyíu càháⁿ ndihí ñaha xì-gá, nchaa ñáyíu cùu cuendá-gá. ⁵ Te ní queheⁿ espíritú-áⁿ tǐcùú te ní dáchítú-xi ñuhú yódó núú sácǒdó sǎ ndúú tǎhú Yǎ Ndiǒxí, te ní xíténuu-xi ñuyíú, te òré ducaⁿ

nĩ quide-xi te ní cáháⁿ víhí ñũhu, te ío dusaⁿ nĩ quide-xi ñuyíú, te ní sáá ndúté, te níhi víhi ní tnáa.

Ndi ùsá espíritú ní tiú-xi ìⁿ caa cútú xĩnehe-xi

⁶ Te ndi ùsá cue espíritú xĩnehe ìⁿ caa cútú-áⁿ nĩ ngúndecu túha-xi cuèndá tiú-xi.

⁷ Te espíritú díhna nuu nĩ tiú-xi cútú néhé-xí, te ñuyíú-a ní ngoyo ñĩñi dàcánuu-xi ndihí ñuhú ndihí níñí, te luha-ná te cuu dava ñuyíú nĩ cáyú, te luha-ná te cuu dava tucu nchaa yutnu ío ñuyíú nĩ cáyú, te luha-ná te cuu dava tucu nchaa cùhú ío ñuyíú nĩ cáyú.

⁸ Te espíritú cúú ùú ní tiú-xi cútú néhé-xí, te dàtná cáá ìⁿ tĩndúú cáá ìⁿ sá nĩ ngava xití làmár te nchìcúⁿ ñuhú, te luha-ná te cuu dava ndute làmár-áⁿ nĩ nduu-xi níñí. ⁹ Te luha-ná te cuu dava nchaa quití xixúhuⁿ xití làmár-áⁿ nĩ xihí-güedi, te luha-ná te cuu dava nchaa bàrcú ní quée naa-xi xití ndute.

¹⁰ Te espíritú cúú ùní ní tiú-xi cútú néhé-xí, te ní ngava ìⁿ chódíní cáhnú ndèé andiu ñuyíú te nchìcúⁿ ñuhú-dí, te ñuhú-áⁿ cáá dàtná cáá ñuhú ití. Te luha-ná te cuu dava nchaa yúte ní ngava chódíní-áⁿ, te luha-ná te cuu dava tucu nchaa núú quènihni ndute ní ngava-dí. ¹¹ Te chódíní-áⁿ nání-dí: Yúcú Ùá. Te ndute xica nchaa yúte-áⁿ ndihí nchaa ndute quènihni-áⁿ nĩ cuu úá-xi dàtná yúcú úá, te ío cuéhé ñayiu ní xihí sá dúcáⁿ nĩ cuu úá ndute-áⁿ.

¹² Te espíritú cúú cùmí ní dácàháⁿ-xi cútú néhé-xí, te luha-ná te cuu dava nchícanhii ñá túú ní dàyehé-xi, te ducaⁿ lùha-ná tucu cuu dava yóó ñà túú ní dàyehé-dí, te ducaⁿ lùha-ná te cuu

dava tucu nchaa chódíní ñà túú ní dàyehé-güedi, te luha-ná te cuu dava nduu ñà túú ní dàyehé nchícanhii, te ducaⁿ lùha-ná te cuu dava niú ñá túú ní dàyehé yóó ndihí nchaa chódíní.

¹³ Te sátá dúcáⁿ te ní xiní-í xícó ìⁿ espíritú xínú cuèchi núú Yă Ndiöxí núú tàchí, te ní tecú dóho-í níhi càháⁿ-xi, te càchí-xi:

—Íó ndàhú ndoho nchaa ñáyiu xĩndecu ñuyúú òré ná dàcaháⁿ úní-gá cue espíritú cúmăní cútú xĩnehe-xi, chi sa xĩndecu túha-ná-xi sá dácàháⁿ-xi!— duha càchí espíritú-áⁿ.

9

¹ Te espíritú cúú ùhúⁿ ní tíú-xi cútú néhé-xí, te òré-áⁿ ñí xiní-í ní queue ìⁿ espíritú andíu te càa-xi datná cáá ìⁿ chódíní, te ní ngava-xi ñuyúú, te ní níhi-xi ìⁿ ndacaá néhé-xí cuendá nacaáⁿ-xi yuyèhe yaú cùnú víhí. ² Te ní nacaáⁿ-xi yaú-áⁿ te ní ngüíta-xi ní quene ñúhmá dàtná quéné ñúhmá ìⁿ xítnú cáhnú vìhi, te ní quene táchí ñí xítenuu-xi ñúhmá-ăⁿ te ní sadí-xi núú nchícanhii, te ní cunee ñuyúú. ³ Te xití ñúhmá-ăⁿ ñí quene tíca làngóstá, te ní xítenuu-di ñuyúú, te dééⁿ-güedi dàtná dééⁿ nchacua. ⁴ Te ní ngúndecu ndihí-güedi tnúhu ndee ìní cuendá sá dándòho-güedi mee-ni ñáyiu ñá túú ndée señá Yă Ndiöxí tneé-xi, te ñá túú ñá cada-di nchaa yutnu ndihí nchaa cúhú. ⁵ Te ñá túú tnúhu ndee ìní ndécú ndihí-güedi sá cáhní-güedi ñáyiu, chi mee-ni sá dándòho ñaha-güedi xií-yu úhúⁿ yóó. Te òré ní ngüíta-güedi dándoho ñaha-güedi xií-yu te tàhú tnúhú núú dáquëe-güedi iñu-güedi dàtná quídé-xí núú dáquëe nchacua iñu-güedi. ⁶ Te

ñáyiú-áⁿ xicáⁿ táhŭ-yú sá ndĩhi cuú-yú cuèndá sá ïo ndòhó-yú dàquée ñaha nchàa quiti-áⁿ iñu-di xií-yú te ñá cuìní-xi cuú-yú, te ìⁿ nduu ìⁿ nduu sàni iní-yú cuú-yú te ñá túú cuìní-xi cuú-yú chi ñá túú tnũhu xihí sá cúú-xĩ-yú.

7 Te nchaa tíca lànghostá-áⁿ xĩndáa-güedi dàtná ndáa nchaa cuàyú cue téé cuáháⁿ nàá, te díquí-güedi ñũhu ìⁿ sá cáá dàtná cáá còroná ní cuáha mee-ni dĩhúⁿ cuááⁿ, te núú-güedi càa datná cáá núú cuè téé. 8 Te idi díquí-güedi càa datná cáá ìdi díquí ñáyiú dĩhí, te núhu-güedi càa datná cáá núhu ndicaha. 9 Te yidúcúⁿnuu-güedi ìⁿ sá cáá dàtná cáá càá, te ndíxíⁿ-güedi quide-xi datná quidé-xi núú vèxi cuéhé víhí càrretá sá táñũhu cuayú cuáháⁿ-güedé ndĩhi-güedi núú nàá-güedé. 10 Te ndéé iñu núú lùhmá-güedi dàtná ndéé iñu núú lùhmá nchacua, te iñu núú lùhmá-güedi-áⁿ dáquëe-güedi ñáyiú dàndoho ñaha-güedi xií-yú, te ducaⁿ-ni càda-güedi dandoho ñaha-güedi xií-yú ndéé xínu úhúⁿ yóó. 11 Te nchaa tíca lànghostá-áⁿ táxi tnùní ñáhá espíritú sá táxi tnùní yaú cùnú víhí, te espíritú-áⁿ nání-xi Àbadón tnũhu hèbreú, te tnũhu griégú nání-xi Àpoliòn, te ndi ndúú tnũhu-áⁿ quée-xi: Sá dánàa ñáyiú.

12 Te tnúndòho-a cuu-xi tnúndòho díhna nuu, te vitna cùmání ùú-gá.

13 Te espíritú cúú iñú ní tiú-xi cútú néhé-xi. Te núú Yã Ndiõxí núnñi ìⁿ sá ñi cuáha mee-ni dĩhúⁿ cuááⁿ núú sácódó sá ndúú táhú-gã, te ndi cùmí xíquí-xi xĩndecu ìⁿ caa ndiqui, te ní tecú dóho-í ní cáháⁿ ìⁿ sá ñi cáháⁿ nihnu ndi cùmí ndiqui-áⁿ. 14 Te

sá càháⁿ nihnu ndiqui-áⁿ xăhaⁿ-xi xîi espíritú cúú ñnú sá ñî tîú cútú-ăⁿ:

—Cuàháⁿ nandaxi-n ndî cumí espíritú ndútú ndècu yúte càhnu nani Eúfratés —càchí sá càháⁿ-áⁿ xăhaⁿ-xi xîi espíritú-áⁿ.

¹⁵ Te sátá dúcáⁿ te ní nandáxí ndî cùmí cue espíritú-áⁿ cuendá cahni-xi cuéhé víhí ñăyiu, te sa yatni dàtná cuádava ñăyiu xîndecu ñuyúú cahni-xi, te ducaⁿ chi sa ndècu túha tnàhí cue espíritú-áⁿ ndétú-xí sàá òré, àdi nduu, àdi yóó, àdi cuíá ducaⁿ càda-xi cahni-xi ñăyiu. ¹⁶ Te ní xiní-í nchaa cue sandàdú cúndîhi-xi xixódó-güedě cuàyú, te ní níhî-í tnúhu sá xînu úú ciendú millón-güedě.

¹⁷ Te duha xîndáa cue cuàyú-áⁿ ndîhi cue téé yòdo ñaha-áⁿ ñî xiní-í: Te cue téé-áⁿ yídúcúⁿ nuu ìⁿ sá yídúcúⁿnuu pèchú-güedě, te luha ticuèhé te luha cuì datná cuì andîu, te luha cuááⁿ, te nchaa cuàyú-áⁿ cáá dîquí-güedi dàtná cáá dîquí ndicaha, te yuhu-güedi quène ñuhú ndîhi ñúhmá, ndîhi àzufré nchìcúⁿ ñuhú. ¹⁸ Te ío cuéhé ñăyiu ñuyúú ñî xîhí chi luha-ná te cudavá-yu ní xîhí sá cuendá ñuhú-áⁿ ndîhi ñúhmá-ăⁿ ndîhi àzufré-áⁿ. ¹⁹ Te ndîhi núú lúhmá-güedi ndîhi yuhu-güedi dândoho-güedi ñăyiu, te núú lúhmá-güedi nèhe-xi dîquí còó, te dîu-ni dàtná cáá còó cáá ñîhî lúhmá-güedi.

²⁰ Te nchaa dava-gá ñăyiu ní cácu ñá túú ñî xîhí núú nchàa tnúndòho-áⁿ ñà túú ní cuìní-yu dàñá-yu ichi cuèhé ichi duha ndècú-yu, chi quède cahnu-ní-yu nchaa espíritú cúndîhi yucu ñávăha, ndîhi nchaa sá càchí-yu cùu ndióxí ní cadúha cue téé ñuyúú-a, te dava xîăⁿ ní cuáha mee-ni dîhúⁿ cuááⁿ, te dava ní cuáha mee-ni dîhúⁿ cuixíⁿ, te dava

ní cuáha sá nání bròncé, te dava ní cuáha mee-ni yúú, te dava ní cuáha mee-ni yùtnu, te nchaa xiáⁿ ñá túú cùtnuní núú-xi, te ni ñá túú tècú dóho-xi, te ni ñă ndácú-xi càca-xi. ²¹ Te ni sã sáhní tnahá-yu, te ni sã sáhní ndùu tnahá-yu, te ni sã ndécũ-yu ichi díí ìní, te ni sà dúhú ndàchiuⁿ tnahá-yu ñá túú ní cuíní-yu dàñá-yu.

10

Èⁿ espíritú xínú cuèchi núú Yă Ndiöxí néhé-xí ìⁿ librú

¹ Te sátá dúcáⁿ te ní xiní tucu-í ìⁿ espíritú cúnùu xinu cuechi núú Yă Ndiöxí ní quee-xi andiù, te yìhi-xi xití vícò cuãnguee-xi ñuyíú te ndàa díquí-xi ndècu ìⁿ cóó yáhnchí, te núú-xi súúní chàhnchí dàtná chàhnchí núú nchĩcanchii, te ndi ndùú díhíⁿ-xi càa datná cáá itá ñuhú. ² Te nùndaha-xi ìⁿ librú líhli ní nandicá, te sáhá cùha-xi ní sani-xi núú ndute làmár, te sáhá dàtni-xi ní sani-xi núú ñuhu yìchí. ³ Te espíritú-áⁿ ñhi vèhi ní cáháⁿ-xi, te ní quide-xi dàtná quidé ìⁿ ndicaha oré cánásàa-di, te òré ducaⁿ ñhi vèhi ní cáháⁿ-xi te úsá xito ní cáháⁿ ñuhu. ⁴ Te sátá ñ yáha ní cáháⁿ ñuhu-áⁿ úsá xito, te chido tnùní-í ìⁿ núú tütú nàcuáa ní cáháⁿ-xi ní cùu, te mei òré-áⁿ ñ tecú dóho-í ní cáháⁿ ìⁿ sá ñ cáháⁿ andiù te càchí-xi:

—Vá chídó tnùní-n nàcuáa ní cáháⁿ ñuhu-áⁿ, iní mée-ní-n ná cùhuⁿ —duha càchí sá ñ cáháⁿ-áⁿ.

⁵ Te espíritú sá nútñí ìⁿ xio sáhá-xi núú ndute làmár-áⁿ ndihí ingá xio sáhá-xi núú ñuhu yìchí-áⁿ ñ xiní-í ní ndonehe-xi ndaha cùha-xi, ⁶ te càchí-xi:

—Yá Ndiöxí Yaá ndécú nchàa nduu nchaa quíú Yaá ní cadúha ñuyíú, ndihí andiù, ndihí làmár,

ndihì nchaa sá ìó, Yaa-áⁿ náhá ndää-gá sá yǔhú cǎháⁿ ndáá-í, te vá cúyàa vihi ⁷ te cada-xi nchaa nàcuáa ndùu tnúhu ndùu yuhu ní cǎháⁿ-gá, tnúhu ní xáhaⁿ-gǎ xii cue tée ní xinu cuechì nǔú-gǎ, cue tée ní xóo cǎháⁿ tnúhu-gá ndéé sanaha, chi òré ná tiú espíritú cúú ùsá cútú néhé-xí, te òré-áⁿ cada-xi nchaa nàcuáa ndùu tnúhu ndùu yuhu sá ñí xáhaⁿ-gǎ xii nchaa cue tée-áⁿ —duha cǎchí espíritú-áⁿ.

⁸ Te sátá dúcáⁿ te ní tecú tucu dóho-í ní cǎháⁿ tucu sá ñí cǎháⁿ andiú-áⁿ, te cǎchí-xi xii-í:

—Cuàháⁿ te queheⁿ-n lìbrú lìhli sá ñí nàndicá nùndàha espíritú-áⁿ, espíritú sá nútñí ñⁿ xio sáhá-xi núú ndute làmár, te ñⁿ xio sáhá-xi núú ñuhu yìchí — duha cǎchí sá ñí cǎháⁿ-áⁿ.

⁹ Te yúhú ní sáháⁿ-í núú ndécú espíritú-áⁿ xicáⁿ-í lìbrú lìhli nèhe-xi-áⁿ, te ní cachí-xi:

—Iha te caxi-n, te cuvídí yuhu-n dàtná cúvídí òré xíhí-n ndùdí ñúñú, dico xití-n chi cada úa-xi — cǎchí-xi.

¹⁰ Te ní queheⁿ-í lìbrú lìhli nùndaha espíritú-áⁿ ñí xexi-í, te yuhu-í ní quide vídí-xi dàtná vídí ndudí ñúñú, dico sátá ñí ngava-xi xití-í te ní quide úa-xi.

¹¹ Te ní cachí tucu espíritú-áⁿ xii-í:

—Dacuítí cǎháⁿ tucu-n nàcuáa cǎchí Yǎ Ndiǒxí cuèndá ñáyiu titní víhí nàcióⁿ, ndihì cuèndá ñáyiu titní víhí ñúú, ndihì cuèndá ñáyiu cǎháⁿ ndí dííⁿ ndí dííⁿ núú tnúhu, ndihì cuèndá cue tée yìndaha ñáyiu.

11

Cuèndá úú cue tée cǎháⁿ nàcuáa cǎchí Yǎ Ndiǒxí

¹ Te ní níhí-í ìḡⁿ tnuyoo nàcuáa chicùhá-í ìḡⁿ sá chicùhá-í, te ní cáháⁿ ìḡⁿ sá ñí cáháⁿ, te càchí-xi:

—Ndacuíñí te chicùhá-n vèhe Yá Ndiöxí, te chicùhá tucu-n núú sácòdó sá ndúú tǎhú-gǎ, te cahu-n nǎ daha tnàhá ñáyiu chìñuhu ñaha xii-gá xĩndecu. ² Dico vá chicùhá-n ndàa quehé vehe-gá, chi xíaⁿ ñí nduu cuendá cue ñáyiu ñá túú cùu ñáyiu isràèl, te ñáyiu-áⁿ nduu nuu-nǎ-yu núú ñí cuu ñuú-gá, te cadá-yu dàtná càchí iní méè-yu, te údico úú yóó ducaⁿ càdá-yu. ³ Te yúhú tendaha-í úú tnàhá cue téé cáháⁿ yuhu-í nàcuáa càchí Yǎ Ndiöxí, te úxúú cièndú únídico nduu ducaⁿ cǎháⁿ-güedé yuhu-í cada-güedé núù-í, te cuihnu-güedé dóó tnúú sǎ sácuihnu cue ñáyiu ndìhú iní-xi —duha càchí sá càháⁿ-áⁿ.

⁴ Te ndì ndúú cue téé-áⁿ cúú-güedé dàtná úú yutnu òlívú sá xĩnutnì núú Yǎ Ndiöxí, ndìhì dàtná úú sá ndèè dité-xi, sá yíndòdo ìḡⁿ caa candíl núú dité-xi ndècu tucu núú-gǎ, te diu-gá cúú-gǎ Yaá yíndàha ñuyíú. ⁵ Te ñáyiu na càni iní-xi ná cada ñaha xii-güedé te yuhu-güedé quene ñuhú cahmi ñaha-xi xii-yu, te ducaⁿ càda-güedé cahni-güedé nchaa ñáyiu na cùu úhú iní ñáhá xii-güedé. ⁶ Te ndì ndúú-güedé ndécú ndìhì-güedé tnúhu ndee iní cada-güedé sá vǎ cúúⁿ dǎú, te ducaⁿ càda-güedé ñini cǎháⁿ-güedé nàcuáa càchí Yǎ Ndiöxí, te ndacu-güedé nadatìu-güedé ndute nduu-xi níñí, te ndacu-güedé dandòho-güedé nchaa ñáyiu titní núú tnúhu ndòho, te ducaⁿ càda-güedé ná daha xito càchí iní méé-güedé. ⁷ Te nà yáha sá cǎháⁿ-güedé nàcuáa ní cachí Yǎ Ndiöxí, te dàvá-áⁿ quene ìḡⁿ quitì dééⁿ yàú cùnú víhí sǎ ìo nèhé cáá, te quitì-áⁿ

ngüita-di nàá-di ndihi ndi ndùú cue téé-án te cahni ñaha-di xii-güedé. ⁸ Te yiqui cùñú cue téé-án cautùu-xi ñⁿ tnuú ñúú cáhnú nùu ní sahani-güedé Xítoho Jesucristú núú cùrúxí, te ñiu Yaá-án cúú Xítoho-ó ndihi-güedé, te cächí ñáyiú sá ñúú-án cúú-xí dàtná ñúú Sòdomá ndihi nàcióⁿ Ègiptú. ⁹ Te úní nduu dava cautùu yiqui cuñú-güedé xíáⁿ, te ñáyiú nchaa nàcióⁿ, ndihi ñáyiú nchaa ñúú, ndihi ñáyiú cáháⁿ ndí ñⁿ ndí ñⁿ núú tnùhu, ndihi ñáyiú xíndecu nchaa xichi quiní-yu yiqui cùñú-güedé, te vá dáñá-yu nguindüxi. ¹⁰ Te nchaa ñáyiú-án nduu vétú iní-yu sá dúcáⁿ cùú cue téé cáháⁿ nàcuáa cächí Yá Ndiöxí-án, te ío cudíⁿ iní-yu, te nándi sá cuáha táhú tnáhá-yu sá cúdíⁿ iní-yu sá dúcáⁿ ní xíhí-güedé, te ducaⁿ chi ñiu-güedé ní quide ío ní ndohó-yu. ¹¹ Te sátá ná yáhá úní nduu dava sá dúcáⁿ cùú-güedé te Yá Ndiöxí dandòto ñaha-gá xii-güedé, te ndacóo-güedé, te nchaa ñáyiú na quini sá ndótó-güedé te yùhú víhí-yu. ¹² Te ndi ndùú cue téé-án tecú dóho-güedé cáháⁿ ñⁿ sá cáháⁿ ndéé andiu, te cúñaha-xi xii-güedé:

—Chí táquène iha —duha cúñaha sá cáháⁿ-án xii-güedé.

Te cue téé-án quíhu-güedé ñⁿ xití vícò caa-güedé andiu, te nchaa ñáyiú cùu úhú iní ñáhá xii-güedé quiní ñáhá-yu xii-güedé caa-güedé andiu. ¹³ Te òré-án níhi víhi tnáa ñuyíú, te úxí xichi cùu-xi ñúú núú cùndècu-güedé-án te ñⁿ xichi ñúú-án naa, te cuú úsá mǐl ñáyiú, te nchaa dava-gá ñáyiú cácu vá cùú yùhú víhí-yu, te cachí-yu sá ío cànnu cuu Yá Ndiöxí Yaá ndécú àndiu.

14 Te tnúndòho-a cuu-xi tnúndòho cuu úú yáha, te vitna sa ndètu vií-nă tucu sáá tnúndòho cuu uní.

Espíritú cúú ùsá tíú-xi cútú néhé-xí

15 Te espíritú cúú ùsá ní tíú-xi cútú néhé-xí, te òré-án nǐ tecú níhi ní cáháⁿ títní sá nǐ cáháⁿ andiu, te cǎchí-xi:

Nchaa sá cúú cuendá nchaa ñáyiu ñuyíú táxí
tnùní-yu ni cùu ní nduu cuendá Tǎtá-ó Dútú
Ndiǒxí táxí tnùní-gá,

Te tnàhá Yaá ní tendaha-gǎ ní sáháⁿ ñuyíú táxí
tnùní-gá nchaa xǎáⁿ,

te ðiu-gá taxi tnùní-gá ni caa ni quíhíⁿ.

Duha ní cáháⁿ nchaa sá nǐ cáháⁿ-án. 16 Te ndi
òcó cúmí cue téé sacuéhé xǎnucóo núú xilé váha
ní ngüíñí xítí-güedě núú Yǎ Ndiǒxí, te ní nuu
núú-güedě ndǎa núú ñúhú te ní ngüíta-güedé
chíñúhu ñaha-güedé xii-gá, 17 te cǎchí-güedé:

Ío ndàcáⁿ táhú-ndǐ núú yòhó Dútú Ndiǒxí,

Yaá ndácú quide nchaandi túhú sá vǎha,

te ðiu-ni-n ndècu-n ndéé cútnàhá ní ngáva ñuyíú,
te ðiu-ni-n ndècu-n vitna, te ðiu-ni-n
cùndecu-n ndéé núú cuàháⁿ núú vǎxi,

te ío cǎhnu cuu-n te ní ngüíta-n ïo-gá táxí tnùní-n.

18 Te nchaa ñáyiu xǎndecu ñuyíú xǎcudéⁿ-yu núú-n,
te vitna ní sáá nduu dǎndohó-n-yu chi ñǎ túú cùu
váha iní-n nǎy-yu,

te cada ndáá-n cuèchi nchaa ñáyiu sa ní xíhí,

te ní sáá tucu nduu cuǎñaha-n sǎ ndúú tǎhú nchaa
ñáyiu ní xinu cuechi núú-n ní cáháⁿ-yu
tnúhu-n, ndihí nchaa dava-gá ñáyiu cùu
cuendá-n, chi ñáyiu-án néhě-yu sá yíñúhu
núú-n,

te cuëi ñáyiú cùnúú ndìhi ñáyiú ñá túú cùnúú
 cuáñaha-n sǎ ndúú tǎhǔ-yu,
 te ní sǎá tucu nduu dànaa-n nchaa ñáyiú sàhni
 tnaha ñáyiú-xi.

Duha càchí ndi òcò cùmí cue téé sacuéhé-ǎⁿ
 xǎhaⁿ-güedě xii Yá Ndiǒxí.

¹⁹ Te ní xiní-í ní nacaⁿ yuyèhe vehe Yá Ndiǒxí
 andiú, te xití vehe-gá-áⁿ ní xiní-í ndécú càjá ñúhú
 sǎ yódó tnùnì nàcuáa ní cundáá cada-gá sá cúú-xí
 ñáyiú, te òré-áⁿ ní xiní-í ní sǎá ndúté, te ní cáháⁿ
 ñúhu te ío dusaⁿ ní quide-xi, te níhi vìhi ní tnáa, te
 súúní càhnu dáú ñíñí ní cuuⁿ.

12

*Cuèndá ìⁿ ñadìhí ndìhi cuèndá ìⁿ quitì dééⁿ nání
 dràgón*

¹ Te ío vìhi ní quide-xi ìⁿ sá ní quide-xi andiú, te
 ní xiní-í ìⁿ ñadìhí te dóó níhnú-áⁿ quide-xi datná
 quidé-xí nùú nchǐcanchii, te ndàa núú sàhá-aⁿ
 quide-xi datná quidé-xí nùú yǒó, te ñúhu ìⁿ coroná
 díquí-aⁿ te ndèé úxúú chódíní. ² Te ñúhu déhe-aⁿ te
 càna saa-aⁿ sá quidé ùhú ñáhá-xí xii-aⁿ chi sa ndètu
 ví-nǎ cacu déhe-aⁿ. ³ Te dàtnùnì ní quide tucu-xi
 sá ní quide-xi andiú, te ní xiní-í ìⁿ quitì càhnu
 quitì ticuehé, quitì dééⁿ nání dràgón, te ndèé úsá
 díquí-di ndìhi úxí ndiqui-di, te ìⁿ caa coróná ñúhú
 ìⁿ caa díquí-di-áⁿ. ⁴ Te quitì-áⁿ luha-ná te cuu dava
 nchaa chódíní dǎngòyo-di ñuyúú ndìhi lúhmá-di,
 te quitì-áⁿ nì ngúnu tníi-di núú ñaha ndètu ví-nǎ
 cacu déhe-xi-áⁿ cuèndá caxi-di déhe-aⁿ òré cacu ni
 cùu. ⁵ Te ñaha-áⁿ ní cacu déhe-aⁿ te téé cùu-dé, te
 té lǐhli-áⁿ ìo cunuu-dě taxi tnùnì-dé nchaa ñáyiú

ñuyíú, te mee Yă Ndiöxí ní nacuaca ñaha-gă xii té lĩhli-án cuendá cundecu ndihî ñaha-dě xii-gá núú ndécú-gă táxí tnùnî-gá. ⁶ Te ñadhî-án ñi xinu-aⁿ cuáháⁿ-aⁿ xití yucu núú ñi quide túha Yá Ndiöxí cundecu-aⁿ cuendá xiáⁿ ñihî-aⁿ caxi-aⁿ, te ducaⁿ ñihî-aⁿ sá caxí-áⁿ ùxúú ciëndú únídico nduu chi ducaⁿ nduu cundecu-aⁿ xiáⁿ.

⁷ Te sátá dúcáⁿ te andiú ñi xinî-í espíritú cúnúu xinu cuechi núú Yă Ndiöxí nání Miguél, ndihî nchaa dava-gá espíritú cundihî-xi, te nchaa espíritú-án nâá-xi ndihî quitî dééⁿ nání drágón ndihî nchaa espíritú cundihî-di. ⁸ Te quitî-án ñâ túú ní ndàcu-di ndihî nchaa espíritú cundihî-di, te ñâ túú ní ñihî-gă-di núú cundècu-di andiú ndihî nchaa espíritú cundihî-di-áⁿ. ⁹ Te cue espíritú xínú cuèchi núú Yă Ndiöxí-án ñi dângává-xí quitî dééⁿ nání drágón-án ndihî nchaa espíritú cundihî-di ñuyíú, te quitî-án cúú-dí mèi sâcuíhná àdi sá càchî-ó cùu yucu ñávãha, te diú xiãⁿ ní dândàhú-xi ñáyîu ñihî ñuyíú, te diú-ni xiãⁿ ní nduu-xi cóó ñi dândàhú-xi ñáyîu ndéé sanaha.

¹⁰ Te ní tecú dóho-í níhi ní cáháⁿ tucu ïⁿ sá ñi cáháⁿ andiú, te càchî-xi:

—Vitna te Yá Ndiöxí ní quide-gá ní ngúndecu ñáyîu ndihî-gá, te ío càhnu cuu-gá, te ío tàxi tnùnî-gá, te tnàhá Crìstú Yaá ní tendaha Yă Ndiöxí ní quixi ñuyíú-a ío tàxi tnùnî-gá, te ducaⁿ chi sa ní xócuíñî sâcuíhná sã sũúnî núnúu sacáⁿ cuèchi núú Tâtá-ó Dütú Ndiöxí cuendá nchaa ñáyîu ndècu ndihî-o ichi-gá, te nduu niú ducaⁿ sàcáⁿ cuèchi-xi núú-gă cuendá-yu ni cùu. ¹¹ Dico ní ndacú-yu ní cunúú-yu núú sâcuíhná sã dúcáⁿ sàcáⁿ

cuéchi cuèndá-yu-áⁿ ní cùu, te ducaⁿ ñĩ cunùú-yu sá cuèndá Yaá cáá dàtná cáá ñⁿ mbéé quiti ní dánĩcuèhé-güedé, chi Yaá-áⁿ ñĩ sati níñĩ-gã te ní xíhí-gá sá cuèndá-yu, te ducaⁿ ñĩ cunuu tùcú-yu sá cuèndá sá sàndáá iní ñáhã-yu xii Yaá-áⁿ, te ñá túú ní yùhú-yu cuú-yu sá cuèndá-gá. ¹² Te vitna ío chí cúdĩ iní nchaa nchòhó espíritú xínú cuèchi núú Yã Ndiõxí, ndihí nchaa nchòhó ñáyiu ndècu andiu, dico ñndàhú ní cuu nchaa ñáyiu xĩndecu ñihí ñuyú! Chi súúni cùdééⁿ sàcuíhná ñĩ ngava-xi te nándi cada ñaha-xi xii-yu, te ducaⁿ chi cùtnuní iní-xi sá sàcú duha-ná nduu cudíi-xi cundecu-xi —duha càchí sá ñĩ cáháⁿ andiu.

¹³ Te sátá ñĩ quee quiti dééⁿ nání dràgón-áⁿ andiu ñĩ ngava-di ñuyú quiti cùu mei sàcuíhná-ãⁿ, te quiti-áⁿ ñĩ chinchícúⁿ-di ñadìhí ñaha ní cacu déhe téé-xi-áⁿ. ¹⁴ Te ñadìhí-áⁿ ñĩ nduu táhú-aⁿ ní quene úú ndíxí-aⁿ, te càa datná cáá ndíxíⁿ ñⁿ yacòlo cahnu vihi cuendá ndava-aⁿ núhú-aⁿ yucu núú ñĩ cachí Yã Ndiõxí cundecu-aⁿ, te yàcáⁿ cundecu-aⁿ úní cuíá dava cuèndá sá vã ñihí ñáhá quiti dééⁿ quiti nàni dragón-áⁿ te xíáⁿ ñihí-aⁿ sá cáxí-áⁿ, te quiti-áⁿ cúú tùcu-di datná ñⁿ cóó dēéⁿ. ¹⁵ Te quiti-áⁿ ñĩ quene cuéhé ndute yuhu-di, te ndute ní quene yuhu-di-áⁿ ñĩ cuu-xi ñⁿ yúte, te ducaⁿ ñĩ quide-di cuèndá ndute-áⁿ cuido-xi ñadìhí-áⁿ ní cùu. ¹⁶ Te ñuhu yìchí ní chindee-xi ñadìhí-áⁿ, chi ní ndátá te ní queé naa-ni ndute ní quene yuhu quiti-áⁿ. ¹⁷ Te sá dúcáⁿ ñĩ quide-xi xíáⁿ ní cudééⁿ víhí quiti-áⁿ núú ñadìhí-áⁿ, te ní xica-di cuáháⁿ-di núú xĩndecu nchaa dava-gá cue déhe ñadìhí-áⁿ cuèndá nàá ndihí

ñaha-di, te ñáyiú-án cúŷ-yu ñáyiú tn̄i nchaa tnúhu cãháⁿ Yã Ndiõxí, te nchìcúⁿ nihnú-yu nchaa tnúhu sá cãháⁿ váha cuendá Xítóhó Jesucristú.

13

Cuendá úú quiti

¹ Te yúhú ní ngúnu tn̄i-í yuhu làmár, te ní xiní-í ní quene ìⁿ quiti te ndée úsá díquí-di te úxí ndiqui-di, te núú ìⁿ ìⁿ ndiqui-di-án ndécú ìⁿ caa coroná. Te ìⁿ ìⁿ díquí-di-án ndée tnúhu sá cãháⁿ úhú-xi cuendá Yã Ndiõxí. ² Te quiti-án cáá-dí dàtná cáá cuiñí, te sáhá-di càa datná cáá sãhá òso, te yuhu-di càa datná cáá yùhu ndicaha. Te quiti dééⁿ nání dragón ní sãñaha-di tnúhu ndee ìní xii quiti-án cuendá taxi tnùní víhí-dí, te dragón-án ñí sãñaha-di nũú ndécú-dí tàxi tnuní-di xii quiti ní quene xití làmár-án, te ducaⁿ ñí quide-di cuendá sá ñihí ndée quiti-án cunuu-di. ³ Te ìⁿ díquí quiti ní quene xití làmár-án cãhú víhí càa ní nícuèhé, te sa ndètu víí-ñã cuú-di sànuu dico ní ndúha-di, te ñihí ñuyúú ñí ñihí ñáyiú tnúhu sá dúcáⁿ ñí cuu, te ío ní cuñúhu-yu te ní tuhá-yu quiti-án. ⁴ Te nchaa ñáyiú-án ñí cachí-yu sá ïo cãhnu cuu quiti dééⁿ quiti nàni dragón-án cuendá sá ñí sãñaha-di tnúhu ndee ìní sá táxí tnùní quiti ní quene xití làmár-án, te ní ngúta-yu ní chiñuhú-yu quiti ní quene xití làmár-án, te cãhí-yu:

—Vá yõo ìⁿ nũtnahá ñáhá xii quiti-a, te ñí vã yõo ìⁿ ndacu nãá ndihí ñaha xii-di —cachí-yu.

⁵ Te ní ñihí-di tnúhu ndee ìní sá cãháⁿ úhú-di Yã Ndiõxí, te cada cãhnu-di mee-di, te údico úú yóo ducaⁿ ñí ñihí-di tnúhu ndee ìní-án cunuu-di. ⁶ Te

ducaⁿ ñi quide-di ní cáháⁿ úhú-di Yá Ndiöxí ndihi cuendá nchaa sá quidé-gă, te diu-ni ducaⁿ ñi cáháⁿ úhú-di núu ndécú-gă, te ní cáháⁿ úhú tucu-di nchaa ñáyiu ndècu ndihi-gá andiu. ⁷ Te ducaⁿ ñi níhí-di tnúhu ndee ìní sá nàá-di ndihi nchaa ñáyiu cùu cuendá Yă Ndiöxí, te ducaⁿ nàá ndihi ñaha-di xii-yu ndée òré vá ndácú-gă-yu nàá ndihi ñàhá-yu xii-di, te tnàhá ní ngúndecu ndihi-di tnúhu ndee ìní sá táxí tnùní-di ñáyiu nchaa nàcióⁿ, ndihi ñáyiu nchaa ñuú, ndihi nchaa ñáyiu càháⁿ ndí dííⁿ ndí dííⁿ núu tnúhu, ndihi ñáyiu xĩndecu nchaa xichi. ⁸ Te cue ñáyiu ñihí ñuyíú ñi cachí-yu sá ïo càhnu cuu quiti-áⁿ, te ñáyiu-áⁿ cúy-yu ñáyiu ñá túú yòdo tnuní núu tütú Yaá cáá dàtná cáá ìíⁿ mbéé quiti ní dánicuehé-güedé Yaá ní xihí ní cùu te ní ndoto. Te ndée cùtnàhá ní ngáva ñuyíú sa yòdo tnuní ñáyiu naníhí tãhú, dico ñáyiu càhí sá ïo càhnu cuu quiti-áⁿ ñà túú yòdo tnuní-yu núu tütú-gá.

⁹ Te nchaa nchòhó ñáyiu xĩndedóho chí cùndedóho váha nchaa nàcuáa cuáháⁿ tnúhu-áⁿ. ¹⁰ Te nchaa ñáyiu na chíhi tñaha ñáyiu-xi vecaá te sáá nduu te quíhíⁿ-yu tnàhá-yu vecaá, te nchaa ñáyiu sàhni tñaha ñáyiu-xi ndihi yuchí te diu-ni ndihi yuchí cuú-yu tnàhá-yu, te xíáⁿ núu ïo xini ñuhu-xi sá ncháá ñáyiu cùu cuendá Yă Ndiöxí cunduu càhnu ìní-yu, te quĩndáá ìní ñáhã-yu xii-gá.

¹¹ Te ní xiní tucu-í ingá quiti ní quene-di núu ñuhu yìchí, te ndée úu ndiqui-di te càa datná cáá ndiqui canerú, te càháⁿ-di dàtná càháⁿ quiti dééⁿ nání dràgón. ¹² Te dàtná ndécú ndihi quiti ní quene xití làmár-áⁿ tnúhu ndee ìní sá táxí tnùní-di ducaⁿ

ndècu ndihi quitì ní quene ñuhu yìchí-áⁿ tnùhu ndee ìní taxi tnùnì-dì cada-dì núú quitì ní quene xití làmár-áⁿ, te quitì ní quene ñuhu yìchí-áⁿ ñí quide yica-dì sǎ ncháá ñǎyiu xǎndecu ñihì ñuyíú chiñuhú-yu quitì ní quene xití làmár-áⁿ, quitì càhú víhí ñí tnahá ní nícuèhé te ní ndúha-dì. ¹³ Te quitì ní quene xití ñuhu yìchí-áⁿ ñí quide-dì titní núú sǎ vǎ yǒo tnàhí ndàcu cada, te nchaa ñáyiu ní xiní-yu sá ndèé andiu ñí dǎngóyó-dí ñùhú ñuyíú. ¹⁴ Te sá dúcáⁿ ñí ngúndecu ndihi-dì tnúhu ndee ìní ní quide-dì nchaa xǎⁿ ní quide-dì núú quitì ní quene xití làmár-áⁿ, te sá dúcáⁿ ñí quide-dì te xǎⁿ ní dándàhú-dì nchaa ñáyiu xǎndecu ñihì ñuyíú, te ní xáhaⁿ-dì xǐ-yu sá ndúcǔ-yu ñí sá cǎdúha-yu nǎcuáa-ní cǎa nacuáa-ní ndùu quitì ní quene xití làmár-áⁿ, quitì càhú víhí ñí tnahá ní nícuèhé díquí-xi-áⁿ ñí quée machití te ñá túú ní xǐhí-dì chi ní xǎndecu-ni-dì. ¹⁵ Te quitì ní quene xití ñuhu yìchí ní ngúndecu ndihi tucu-dì tnúhu ndee ìní sá chíhí-dí ìní sá ñí cadúha-yu-áⁿ, sá ñí natavá-yu dàtná cáá quitì ní quene xití làmár-áⁿ, te ducaⁿ ñí quide quitì-áⁿ cuèndá cáháⁿ sá ñí cadúha-yu-áⁿ, te xǎⁿ cada-xi cuú nchaa ñáyiu ñá túú ní cuìní chiñuhu ñaha xii-dì. ¹⁶ Te quitì ní quene xití ñuhu-áⁿ quidé-dí sǎ ncháá ñáyiu ngúndéé ñí tnuní ndaha cùhá-yu àdì tneé-yu, te ducaⁿ ñí quide-dì cuèi ñáyiu cùnuu te cuèi ñáyiu ñá túú cùnuu, te cuèi ñáyiu cuica te cuèi ñáyiu ndàhú, te cuèi ñáyiu ñá túú dàñá quee núú chíúⁿ pàtróóⁿ-xi, te cuèi nchaa ñáyiu dàñá quée núú chíúⁿ pàtróóⁿ-xi ncháá-yu

ducaⁿ ñí ngúndeé tnuní ñíí-yu. ¹⁷ Te ní quide-di sá ncháá ñǎyiu ñá túú ndèé tnuní ñíí-xi vá cúú cuááⁿ-yu sá cǎchí iní-yu te ni vǎ cúú ñicó-yu ñⁿ sá cuení-yu ñicó-yu, te tnuní-áⁿ cúú-xí ñiú qui^{ti} ní quene xití lámár-áⁿ àdi númerú-di. ¹⁸ Te xini ñuhu-xi sá ncháá ñǎyiu ío váha cùtnuní iní-xi ío váha cuáha-yu cuendá ñàcuáa quèe-xi númerú qui^{ti}-áⁿ, te númerú-áⁿ cúú-xí ñíú cièndú únídico ñíú, te cùu-xi cuendá ñⁿ ñǎyiu ñuyíú.

14

Cuendá ñⁿ cièndú údico cúmí mǐl ñǎyiu

¹ Te sátá dúcáⁿ te ní xiní-í Yáa cáa ñatná cáa ñⁿ mbéé qui^{ti} ní dánícuèhé-güedé nútníí-gǎ ñⁿ yucu ñúú nání Sión ndécú àndiú, te nutníí-gǎ ndi^{hi} ñⁿ cièndú údico cúmí mǐl ñǎyiu, te tneé-yu ndèé ñiú-gǎ ndi^{hi} ñiú tátá-gǎ Dútú Ndiöxí. ² Te ní tecú dóho-í ní quide-xi andiú ñatná quidé-xí núú xíca cuèhé víhí ndùte, te quide tucu-xi ñatná quidé-xí ñóré níhi víhi caháⁿ ñíúhu, te quide tucu-xi ñatná quidé-xí ñóré cuèhé víhí ñǎyiu cǎní-yu àrpá. ³ Te ní tecú dóho-í xíxita yuhu sǎ xítá yùhu núú Yáa núcõo núú xilé váha, ndi^{hi} núú ndi cùmí cue qui^{ti} xínutníí-áⁿ, ndi^{hi} núú ncháa cue téé cùu sacuéhé xíñucóo-áⁿ, te xíxita-xi ñⁿ ndudú sáá. Te mee-ni cuè ñǎyiu ñⁿ cièndú údico cúmí mǐl-áⁿ quèe díquí-yu ndudú-áⁿ, te ñǎyiu-áⁿ cúú-yu ñǎyiu ní dácǎcu ni-hnu ñaha Yáa cáa ñatná cáa ñⁿ mbéé qui^{ti} ní dánícuèhé-güedé núú ñǎyiu ndècu ichi cuèhé ichi duha xíñdecu ñuyíú, te vá yõo ñⁿ-gǎ quèe díquí-xi ndudú sáá-ǎⁿ chí mee-ni ñǎyiu ní cǎcu ni-hnu-áⁿ

quëe díquǐ-yu. ⁴ Te ñáyiu ní cácu nihnu-áⁿ cúǔ-yu ñáyiu ñá túú ní xǐndecu ichi díí ìní, te cùú-yu ñáyiu càndoo canine iní-xi, te ndèni ní cuu cuáháⁿ Yaá cáá dàtná cáá ìⁿ mbéé quiti ní nícuèhé-áⁿ, te ducaⁿ-ni ndëndaha ñàhá-yu xii-gá cuáháⁿ, te ñáyiu-áⁿ ñí cácu nihnú-yu núú nchàa ñáyiu ñuyíú, ñáyiu ndècu ichi cuehé ichi duha, te ñáyiu ní cácu nihnu-áⁿ cúǔ-yu ñáyiu díhna nuu ñí nduu táhú Yă Ndiǒxí cuu cuèndá-gá ndihì Yaá cáá dàtná cáá ìⁿ mbéé quiti ní dánícuèhé-güedé. ⁵ Te cùú-yu ñáyiu ñá túú càháⁿ ni ìⁿ tnúhu ndehnde, te càndoo canine iní-yu ndècú-yu núú núcõo Yă Ndiǒxí táxí tnùnì-gá.

Cuèndá únì cue espíritú xínú cuèchi núú Yă Ndiǒxí

⁶ Te sátá dúcáⁿ te ní xiní-í ìⁿ espíritú xínú cuèchi núú Yă Ndiǒxí xícó-xí cuådava andiù, te ndècu ndihì-xi tnúhu sá càháⁿ nàcuáa naníhí tàhú-ó, tnúhu sá ñà túú tnàhí ndihì nihnu te tnúhu-áⁿ danèhé espíritú-aⁿ nchaa ñáyiu ndècu ñuyíú, ñáyiu nchaa nacióⁿ, ndihì ñáyiu nchaa ñuú, ndihì nchaa ñáyiu càháⁿ ndí dííⁿ ndí dííⁿ núú tnúhu, ndihì ñáyiu xǐndecu nchaa xichi. ⁷ Te níhi ní cáháⁿ-xi te càchì-xi:

—Nchaa nchòhó ñáyiu ndècu ñuyíú canehe-ndo sã yíñùhu núú Yă Ndiǒxí, te cachí-ndó sã ìo càhnu cuu-gá chi sa ní sáá nduu càda ndáá-gá nchaa cuèchi-ndo, te chiñuhu-ndo-gã chi diu-gá ní cadúha-gá andiù, ndihì ñuhu yìchì, ndihì làmár, ndihì nchaa ndóhyo —duha càchì espíritú-áⁿ.

⁸ Te nchìcúⁿ tucu ìngá espíritú xínú cuèchi núú Yă Ndiǒxí, te càchì-xi:

—Vitna ní naa ñuú Babiloniá ñuú ìo cùnnu, te ducaⁿ ñí naa chi cue ñáyiu ñuú-áⁿ ñí quidé-yu ní xíta nihnu nchaa ñáyiu ñihì ñuyíú, chi ní sanu

ichi ñàhá-yu ichi cuèhé ichi duha —duha càchí espíritú-áⁿ.

⁹ Te nchìcúⁿ tucu ìngá espíritú xínú cuèchi núú Yă Ndiöxí te níhi càháⁿ-xi, te càchí-xi:

—Nchaa ñáyíu chìñuhu ñaha xii quiti ní quene xítí làmár, ndihi sá ñí natava ñàhá-yu nàcuáa càa-di-áⁿ, ñáyíu ní dáñá mèe-xi ní ngúndeé tnuní ndahá-yu àdi tneé-yu, ¹⁰ ñáyíu-áⁿ sũúni dândoho ñaha Yă Ndiöxí xií-yu chi ío cùdééⁿ-gă, te ducaⁿ ïo dandòho ñaha-gá xií-yu chi daquihíⁿ ñàhá-gă xií-yu núú ñùhú núú ñùhú àzufré càyú-xi, te núú cuè espíritú xínú cuèchi núú-gă ducaⁿ dândoho ñaha-gá xií-yu, ndihi núú Yàá cáá dàtná cáá ìⁿ mbéé quiti ní dánícuèhé-güedé. ¹¹ Te ni caa ni quíhíⁿ quene ñúhmá núú dúcáⁿ cùndecú-yu ndohó-yu-áⁿ, te cuèi nduu cuèi niú ducaⁿ ndòhó-yu. Te ducaⁿ ndòho nchaa ñáyíu chìñuhu ñaha xii quiti ní quene xítí làmár, ndihi sá ñí natava ñàhá-yu nàcuáa càa-di-áⁿ, te diu-ni ñáyíu-áⁿ cúú-yu ñáyíu ní ngúndeé tnuní ndaha-xi àdi tneé-xi —duha càchí espíritú-áⁿ.

¹² Te xíăⁿ xíní ñùhu-xi sá ncháá ñáyíu cùu cuendá Yă Ndiöxí cunduu càhnu iní-yu, chi diu-ní-yu cùú-yu ñáyíu tnèi nchaa tnúhu càháⁿ-gá, te ni yùhu ni iní-yu sàndáá iní-yu Xítohó Jesucrístú.

¹³ Te sátá dúcáⁿ te ní tecú dóho-í ní cáháⁿ ìⁿ sá ñí cáháⁿ andíu, te càchí-xi:

—Chido tnùnì-n ìⁿ núú tütú nàcuáa na càháⁿ-í-a. “Není vitna ío váha táhú nchaa ñáyíu sàndáá iní tnúhu Xítohó Jesucrístú te xihí-yu” —duha càchí sá ñí cáháⁿ-áⁿ.

Te Espíritú Yă Ndiöxí ní cáháⁿ-xi, te càchí-xi:

—Ndáá, chi ndetatú-yu chi ñá túú-gă nágá chiuⁿ ndohó-yu cadá-yu, te Yá Ndiöxí sa nàha-gá nchaa nàcuáa ndùu chiuⁿ ní quidé-yu —duha càchí Espíritú-gá.

Nchaa sá cúú nǔú ñúhú

¹⁴ Te sátá dúcáⁿ te dǎtnùní ní xiní-í ìⁿ vícò cuèxíⁿ, te núú vícò-ǎⁿ ñí xiní-í núcòo ìⁿ Yaá, te càa-gá dǎtná cáá ìⁿ tée ñuyúú, te díquí-gă ñúhú ìⁿ coroná ní cuáha mee-ní dǐhúⁿ cuááⁿ, te nùndaha-gá ìⁿ yuchí ndíquí te sùúní dǎéⁿ. ¹⁵ Te ní xiní-í ìⁿ espíritú xínú cuèchi núú Yá Ndiöxí ní quee-xi xití vehe-gá, te níhi ní cáháⁿ-xi xǎhaⁿ-xi xì Yaá núcòo núú vícò-ǎⁿ:

—Sa ní cuu nàquehndé-n nchàa sá ñí cuu ñuyúú ndìhi yuchí ndíquí-n, chi sa ní cuu núcòo tnàha-xi —duha càchí espíritú-áⁿ xǎhaⁿ-xi xì Yaá-áⁿ.

¹⁶ Te Yaá núcòo núú vícò-ǎⁿ ñí dáyǎha ndodo-gá yuchí ndíquí-gă núú ñuyúú ñí nataxi tnàha-gá nchaa sá ñí cuu.

¹⁷ Te ní xiní tucu-í ìngá espíritú xínú cuèchi núú Yá Ndiöxí ní quee-xi xití vehe-gá sá cáá àndiù, te nùndaha-xi tnahá-xi ìⁿ yuchí ndíquí dǎéⁿ. ¹⁸ Te ní xiní tucu-í ní quee tucu ìngá espíritú xínú cuèchi núú Yá Ndiöxí núú nùtnǐ núú sácòdó sǎ ndúú tǎhú-gă, te ndècu ndìhi-xi tnúhu ndee ìní táxí tnùní-xi ñuhú, te espíritú-áⁿ ñíhi ní cáháⁿ-xi xǎhaⁿ-xi xì espíritú néhé yùchí ndíquí dǎéⁿ-áⁿ:

—Ngüíta naquehndé-n ndìhi yuchí ndíquí-n ndǎhé yoho yàha stilé sá ió ñuyúú chi sa ní cuu nàtehndé —duha càchí espíritú-áⁿ xǎhaⁿ-xi xì espíritú néhé yùchí ndíquí-ǎⁿ.

19 Te espíritú néhé yùchí ndíquí-ǎⁿ nǐ dáyǎha ndodo-xi yuchí ndíquí-xí nǔú ñùyíú nǐ nàquehdé-xi nchaa ndéhé yoho yàha stilé, te ní chihi-xi ìⁿ xichi núú nǐ chihi-xi cuèndá xíaⁿ quihni-xi quee ndudí-xi, te sá dúcáⁿ nǐ quide-xi xíaⁿ cútnùní iní-ó sǎ ìo cùdéeⁿ Yǎ Ndiǒxí núú ñǎyiu ñuyíú. 20 Te ndéhé yoho yàha stilé-áⁿ nǐ quihni-xi ìⁿ xio yuhu ñúú, te ndudí ndéhé yoho yàha stilé-áⁿ nǐ nduu-xi níñí te ní quee-xi núú quíhni ñihnu espíritú-áⁿ. Te úní cièndú mǐl mètrú ní xica níñí-ǎⁿ, te dàtná ìⁿ mètrú dava ní sáá cuehnu níñí-ǎⁿ nǐ xica-xi.

15

Úsá tnúndòho

1 Te ío vìhi ní quide-xi ìⁿ sá nǐ quide-xi andiú te ní cuñúhu vìhi-í, te ní xiní-í úsá tnàhá espíritú xínú cuèchi núú Yǎ Ndiǒxí, te ìⁿ ìⁿ cue espíritú-áⁿ ndécú ndìhi-xi tnúhu ndee iní dandòho-xi ñáyiu ñuyíú, te nà yáha nchaa tnúndòho-áⁿ, te vá cùdéeⁿ-gǎ Yǎ Ndiǒxí núú-yu dándoho ñaha-gá xií-yu.

2 Te ní xiní-í ìⁿ làmár te ndute làmár-áⁿ cáá dàtná cáá vìdriú, te dácánuu-xi ndìhi ñuhú, te yuhu làmár-áⁿ xǐnutnìi nchaa ñáyiu ní ndacu ní dáquée tíhú ñàhá xì quiti ní quene xití làmár-áⁿ, te ducaⁿ nǐ ndacú-yu ní dáquée tíhú-yu sá nǐ natava ñàhá-yu nàcuáa càa-di-áⁿ, te ducaⁿ nǐ ndacu tucú-yu ní dáquée tíhú tucú-yu númerú-di sá cúú dàtná diú-di, te nchaa ñáyiu-áⁿ nǐ nduu táhú-yu núú Yǎ Ndiǒxí àrpá xǐnehé-yu cuèndá caní-yu. 3 Te xixitá-yu ndudú sá nǐ xita ndí Moisés ndí ní xinu cuechi núú Yǎ Ndiǒxí ndée sanaha, te xita

tucú-yu ndudú Yaá cáá dàtná cáá ìⁿ mbéé quiiti ní dánċuèhé-güedé, te càchí-yu:

Yòhó Dútú Ndiõxí ío càhnu cuu-n, chi quide-n nchaa sá vǎ yõ tnàhí ndàcu cada, te cùu-n Yaá ndácú quide nchaandi túhú sá vǎha, te ío ndáá quidé-n te ío ndáá càháⁿ-n, te yìndaha-n nchaa ñáyiú nihì ñuyíú.

⁴ Te nchaa ñáyiú nèhé-yu sá yíñùhu núú-n, te ncháá-yu càchí-yu sá ïo càhnu cuu-n, chi ìⁿdìi díi-ni yòhó cúú-n Yàá ío váha quide ndáá, te nchaa ñáyiú nihì ñuyíú natacá-yu chiñuhu ñàhá-yu xii-n, te ducaⁿ càdá-yu chi ndèhé-yu nchaa sá vǎha quide-n.

Duha càchí ñáyiú-áⁿ xíxitá-yu.

⁵ Te sátá dúcáⁿ te ní xiní-í ní nacaáⁿ yuyèhe vehe Yá Ndiõxí andiú, te xití vehe-gá-áⁿ ndécú sǎ ndèé tnúhu-gá. ⁶ Te xití vehe-gá-áⁿ ñi quee úsá tnàhá espíritú xínú cuèchi núú-gǎ, te ìⁿ ìⁿ-xi ndècu ndihí-xi tnúhu ndee ìní dandòho-xi ñáyiú, te xíxíhnu-xi mee-ni dǒó vǎha, te súúni vǎha càndoo, te chàhnchí, te yidúcúⁿnuu cìrchú ní cuáha mee-ni dǐhúⁿ cuàáⁿ pèchú ndi úsá cue espíritú-áⁿ. ⁷ Te ìⁿ quiiti cúmí xínutnǐ núú nútnǐ xilé váha ní sǎñaha-di ìⁿ caa sá nàhá tícùú ní cuáha mee-ni dǐhúⁿ cuàáⁿ xii ìⁿ ìⁿ espíritú-áⁿ, te xití nchaa tícùú-áⁿ ñúhú ìⁿ sá ñúhú te xǐáⁿ cútnùní sá Yá Ndiõxí dandòho-gá ñáyiú ñuyíú, te diu-gá cúú-gǎ Yaá ndécú nchaa nduu nchaa quíú. ⁸ Te xití vehe-gá-áⁿ ñi chítú ñúhmá, te ducaⁿ ñi quide-gá cuendá cutnùní ìní ñáyiú sá ïo càhnu cuu-gá táxí tnùní-gá, te vá yõ ìⁿ cuu quíhu

xítí vehe-gá-áⁿ ndèé ndihì ndì ùsá tnúndòho cada ndì usá cue espíritú-áⁿ ñuyíú.

16

Tnúndòho cada-xi ñuyíú

¹ Te sáta dúcáⁿ te ní tecú dóho-í níhi ní cáháⁿ ìⁿ sá ñí cáháⁿ xítí vehe Yá Ndiǒxí, te xǎhaⁿ-xi xìi ndì usá cue espíritú-áⁿ:

—Chí cuàháⁿ coyo-ndo sǎ ñúhú xítí nchaa tícùú néhé-ndó-ǎⁿ nǔú ñùyíú, chí sá ñúhú-ǎⁿ cúú-xí tnúndòho tendaha Yá Ndiǒxí sá cúú-xí nchàa ñáyíu ñuyíú —duha càchí sá càháⁿ-áⁿ.

² Te espíritú díhna ní sáháⁿ-xi ní coyo-xi sá ñúhú xítí tícùú néhé-xí-ǎⁿ ñuyíú, te nchaa ñáyíu ñùhu tnuní quitì ní quene xítí làmár ñáyíu ní chiñuhu sá ñí natava ñàhá-yu xii-di, nchaa ñáyíu-áⁿ ñí quené-yu ndíhyì tèhyú te súúni dàndoho ñaha-xi xii-yu.

³ Te espíritú cúú ùú ní coyo-xi sá ñúhú xítí tícùú néhé-xí nǔú làmár, te ndute làmár-áⁿ ñí nduu-xi níñí te càa-xi datná cáá ñíñí ñáyíu sa ní xíhí, te nchaa quitì ñùhu xítí làmár-áⁿ ñí xíhí-güedi.

⁴ Te espíritú cúú ùní ní coyo-xi sá ñúhú xítí tícùú néhé-xí nchàa yúte ndihì nchaa núú quènihni ndute, te ndute nchaa yúte-áⁿ ndihì nchaa ndute quènihni-áⁿ ñí nduu-xi níñí. ⁵ Te sáta dúcáⁿ te ní tecú dóho-í ní cáháⁿ ìⁿ espíritú xínú cuèchi núú Yá Ndiǒxí, espíritú yíndàha ndute, te xǎhaⁿ-xi xìi Yá Ndiǒxí:

—Yòhó Dútú Ndiǒxí cúú-n Yàá quidé ndáá cui^{tì} núu duha quíde-n tendaha-n tnúndòho-a,

te diu-ni-n cùu-n Yaá ndécú ndéé cútnàhá ní ngáva ñuyíú, te diu-ni-n cùu-n Yaá ndécú vitna te ñá túú tnàhí cuéchi-n. ⁶ Chi cue ñáyiu ñuyíú ñí dácácă-yu níñí nchaa ñáyiu ní cáháⁿ tnúhu-n ndihi nchaa dava-gá ñáyiu cùu cuendá-n, te ní sahní-yu nchaa ñáyiu-áⁿ, te vitna ní dátíú-n ndùte ní nduu-xi níñí te ducaⁿ-ni càa ndute-áⁿ xíhŷ-yu, te ducaⁿ tàú-xi ndohó-yu cuendá sá ñí sahní-yu cue ñáyiu cùu cuendá-n —duha càchí espíritú-áⁿ xăhaⁿ-xi xì-gá.

⁷ Te ní təcú tucu dóho-í ní cáháⁿ ìⁿ sá ñí cáháⁿ núú nútñî núú sácödó să ndúú tăhú Yă Ndiöxí, te xăhaⁿ-xi xì-gá:

—Ndáá sá yòhó Dútú Ndiöxí Yaá ndácú quide nchaandi túhú sá văha dândoho-n ñáyiu năcuáa tàú-xi cunduu —duha càchí sá càháⁿ-áⁿ xăhaⁿ-xi xì-gá.

⁸ Te espíritú cúú cùmí ní coyo-xi sá ñúhú xítí tícùú néhé-xí nŷú nchĭcanchii cuendá nchĭcanchii-áⁿ cahmi-xi nchaa ñáyiu ñuyíú. ⁹ Te nchaá-yu ní ndoho vîhí-yu ní cáyú-yu, te cuēi ducaⁿ ñí ndohó-yu dico ñá túú ní cuiní-yu ndixi cuéchi iní-yu cuendá nchaa sá ñà túú văha quidé-yu, te ni ñà túú ní càchí-yu sá ïo càhnu cuu Yă Ndiöxí chi da ní cáháⁿ úhú-yu cuendá-gá, te diu-gá cúú-gă Yaá ducaⁿ ñí tendaha tnündòho-áⁿ să cúú-xĭ-yu.

¹⁰ Te espíritú cúú ùhúⁿ ní coyo-xi sá ñúhú xítí tícùú néhé-xí nŷú ndécú quiti ní quene xítí làmár-áⁿ táxí tnùnĭ-dĭ, te nchaa núú táxí tnùnĭ-dĭ ní cuu nee, te nchaa ñáyiu ñuyíú ndéé yàá-ná-yu năcaxi nihnú-yu sá ndóhŷ-yu. ¹¹ Dico ni dùcaⁿ ñá túú ní cuiní-yu dàñá-yu ni ìⁿ sá cuèhé sá dúhá quidé-yu, chi da ní cáháⁿ úhú-yu cuendá Yă Ndiöxí

Yaá ndécú àndiù sá cuèndá sá dándòho ñaha ndíhyi tèhyú ndèé-yu-áⁿ ndihi nchaa dava-gá sá yãha-yu.

¹² Te espíritú cúú iñú ní coyo-xi sá ñúhú xítí tícúú néhé-xí xítí yúte càhnu nani Eúfratés, te ndute yúte-áⁿ ñí yíchí cuèndá yãha cue téé yìndaha ñáyiù xĩndecu ndàa xio nacuáa quène nchícanchii.

¹³ Te ní xiní-í ní quee ìⁿ espíritú cúndìhi yucu ñávãha yuhu quiti dééⁿ nání dràgón, te ní xiní tucu-í ní quee tucu ingá espíritú cúndìhi yucu ñávãha yuhu quiti ní quene xítí làmár, te ní xiní tucu-í ní quee tucu ingá espíritú cúndìhi yucu ñávãha yuhu téé dándahú ñáyiù càchí sá càháⁿ tnúhu Yá Ndiöxí te ñá ndàá, te ndi nùní espíritú-áⁿ xĩndáa-xi dàtná cáá làhvá. ¹⁴ Te ndi nùní espíritú-áⁿ quidé-xí sã vã yõo tnàhí ndàcu cada, te xica dat-acá-xi nchaa cue téé yìndaha ñaha xii ñáyiù xĩndecu ñihí ñuyíú cuèndá nàá-güedé mei ndùu cachí Yá Ndiöxí coo tnúndòho cahnu vihi-gá, te ðiù mee Yá Ndiöxí cúú-gã Yaá ío càhnu cuu. ¹⁵ Te Yaá cúú Xìtohó-ó ñí cachí-gá: “Cunaha-ndo chi nduu ñà túú yìhi iní-ndó quixi-í núú ndécú-ndó, te cada-í dàtná quidé ñàdúhú. Te váha táhú nchaa nchòhó ñáyiù xĩndecu túha, chi cùu-ndo datná cue ñáyiù xĩndecu túha xixíhnu-ni dóó-xi cuèndá sá vã cúcàhaⁿ núù-yu dàtná cúcàhaⁿ núú cuè ñáyiù ñá túú ñìhnu dóó-xi, te ðuha càháⁿ-í cuèndá sá nchòhó cundecu túha-ndo òré quexio-í”, ðuha càchí-gá. ¹⁶ Te ndi nùní cue espíritú cúndìhi yucu ñávãha-áⁿ ñí dátàcá-xi nchaa cue téé yìndaha ñaha xii ñáyiù, te ní taxi ndecu ñaha-xi ìⁿ xichi núú nání Àrmagedón, ðuha nàni xíaⁿ tnúhu hèbreú.

17 Te espíritú cúú ùsá ní coyo-xi sá ñúhú xítí tícùú néhé-xí núú tàchí, te ní tecú dóho-í níhi ní cáháⁿ Yaá núcõo núú xilé váha xítí vehe-gá, te càchí-gá:

—Xéhé-ñă cúmăní te xínu cava nchaa tnúndòho tnúhu ndàhú —duha càchí-gá.

18 Te sátá dúcáⁿ te ní sáá ndúté te ní cáháⁿ ñúhu, te súúní dùsaⁿ ní quide-xi, te níhi vìhi ní tnáa ñuyíú, te ndéé cútnàhá ní ngúndecu ñáyíu ñuyíú te vátá ííⁿ xító-gá níhi tnáa dàtná ní quide-xi. 19 Te ñúú cáhnú ïo cùnuu nani Babiloniá ní quée dava-xi ní cuu-xi úní xichi, te nchaa ñúú cáá ñìhí ñuyíú ñí ngoyo nchaa vehe, chi Yá Ndiõxí ní ndacu iní-gá nchaa sá cuèhé sá dúhá quide nchaa ñáyíu ñúú Babiloniá-án, te ducaⁿ ñí quide ñaha-gă xí-yu chi ío cùdééⁿ-gă núú-yu. 20 Te nchaa tindúú ñí ndóñúhú-xí cuèí nchaa tindúú ñuhu yìchí ndécú xítí làmár. 21 Te ní xiní-í ní cuuⁿ ñiñi ñàhnu vihi ní ngaundodo-xi cue ñáyíu ñuyíú, te nchaa ñiñi-án vëe-xi dàtná údico kílú, te cue ñáyíu ñuyíú ñí cáháⁿ úhú-yu cuèndá Yă Ndiõxí sá dúcáⁿ ñí dácúúⁿ-gă ñiñi ñàhnu vihi-án, chi ní cuu-xi ííⁿ tnúndòho cahnu vihi sá cúú-xí-yu.

17

Ñàdìhí ndécú ìchi dǐí ìní

1 Te núú ùsá espíritú néhé tícùú-án, te ííⁿ-xi ní quixi-xi núú ndécú-í, te càchí-xi xii-í:

—Néhé ná quìhíⁿ-ó dànehé ñàhà-í xii-n nchàa tnúndòho sá ndóhó ñàdìhí ñaha ndècu ìchi dǐí ìní, te ñaha-án cúnù-aⁿ núcóo-aⁿ núú ñúhú vìhi ndute. 2 Te ñaha-án ndécú dǐí ìní-aⁿ ndìhí nchaa cue téé yìndaha ñaha xii ñáyíu xǐndecu ñìhí ñuyíú, te nchaa dava-gá ñáyíu ñuyíú ío ìní-yu nchìcúⁿ ñihnú-yu

quidé-yu nchaa nàcuáa quide ñaha-án —duha càchí espíritú-án.

³ Te òré ducaⁿ quide ñaha Espíritú Yă Ndiöxí xii-í nàcuáa càchí iní-xi, te ñⁿ espíritú xínú cuèchi núú-gă ndécá ñaha-xi xii-í cuáháⁿ ñⁿ xití yucu, te xití yucu-án ñⁿ xiní-í ñⁿ ñadìhí yódó-án ñⁿ quiti ticuehé, te ndèé úsá díquí-di te úxí ndiqui-di, te ñihí-di ndèé tnuní-di mee-ni tnùhu sá càháⁿ úhú cuendá Yă Ndiöxí. ⁴ Te ñadìhí-án níhnú-án dǒó muradú ndihí dóó tícuèhé, te mee-ni sǎ ñⁿ cuáha díhúⁿ cuááⁿ, ndihí yúú vǎha sá nání pǎrlá, ndihí nchaa dava-gá núú yúú vǎha, mee-ni nchaa xǎⁿ ní cuáha sá yíhí lõho-aⁿ, ndihí sá ñúhú dǔcúⁿ-aⁿ, ndihí sá ñúhú dǔcúⁿ ndáhá-án, te nùndaha-aⁿ ñⁿ tícuú ní cuáha mee-ni díhúⁿ cuááⁿ te ñùhu mee-ni sá cuèhé sá dúhá, te xǎⁿ cútñuní iní-ó sǎ cúú-án ñⁿ ñadìhí ñaha ndècu ichi cuehé ichi duha. ⁵ Te tneé-aⁿ ndèé tnuní ñⁿ tnúhu, te càchí-xi: “Ñúú Babiloniá ñúú ío cùnuu, cada iní-ndó sá cúú-xí mèi ñadìhí-a, te diu ñadìhí-a cùu-aⁿ ñaha sanu ichi ñaha xii nchaa ñáyiu dìhí ñáyiu ndècu ichi díí ñⁿ iní, te nándi-gá nchaa sá cuèhé sá dúhá sànu ichi-aⁿ nchaa ñáyiu cadá-yu”, duha càháⁿ tnúhu ndèé tnuní tneé ñadìhí-án. Te vá yǒo tècú tnùní ná cuendá ducaⁿ càháⁿ tnúhu-án.

⁶ Te ní cutñuní iní-í sá díú ñaha-án ñⁿ dácácá-án ñⁿ ñáyiu cùu cuendá Yă Ndiöxí ní sahní ñaha-aⁿ xii-yu, te ñáyiu ní xíhí-án cúú-yu ñáyiu ní càháⁿ vǎha cuendá Xítóhó Jesucrístú, te sá dúcáⁿ ñⁿ quide-aⁿ te ní nduu-aⁿ dàtná ñⁿ ñáyiu quihu. Te ío ní cuñúhu-í sá dúcáⁿ ñⁿ cuu ní xiní-í. ⁷ Te sátá dúcáⁿ te espíritú xínú cuèchi núú Yă Ndiöxí-án càchí tucu-xi xii-í:

—Vá ndèé dúcáⁿ cùñúhu-n, chi vitna na càchí

tnúhu-í xii-n nàcuáa quèe-xi cuendá quiti ndèé úsá díquí-xi ndihí úxí ndiqui-xi-án, ndihí nàcuáa quèe-xi cuendá ñadìhí ñaha yòdo ñaha xii-di-án. ⁸ Te quiti ní xiní-n-ǎⁿ cúú-dí ìⁿ quiti sa ní xíndecu te vitna ñá túú-gǎ-di ndècu, te sáá nduu te quene-di yaú cùnú víhí sǎ ìo nèhé cáá, te dǎtnùní sáá nduu te quíhíⁿ-di núú ùhú núú ndàhú ñi caa ñi quíhíⁿ, te cue ñáyiu xíndecu ñuyíú cuñúhu vèhí-yu quiti-ánⁿ chí cùu-di ìⁿ quiti sa ní xíndecu ñi cùu te sáá nduu cùndecu tucu-di, te ñáyiu ducaⁿ cùñúhu ñaha xì-di-ánⁿ ñà túú yòdo tnuní-yu núú tütú núú yódó tnùní cue ñáyiu naníhí tàhú, chí ndéé cùtnàhá vátá ngǎva-gá ñuyíú ducaⁿ sa yòdo tnuní cue ñáyiu naníhí tàhú.

⁹ Te nchaa ñáyiu tècú tnùní xini ñuhu-xi cani váha iní-yu cuendá tnúhu-a. Te ndi ùsá díquí quiti-ánⁿ cada iní-ó sǎ cúú-xí ùsá tǐndúú nùú núcõ ñadìhí-ánⁿ. ¹⁰ Te ndi ùsá díquí quiti-ánⁿ cada iní-ó sǎ cúú-xí ùsá tnàhá cue téé yíndaha ñaha xii ñáyiu, te úhúⁿ cue téé-ánⁿ ñà túú-gǎ cùnùu-güedé vitna, te ìⁿ téé-ánⁿ cùnùu-dé vitna te ìngá-dé vátá sàá-gá nduu cùnùu-dé, te na sàá nduu dùcaⁿ cunuu-dé te sacú-ñi nduu cunuu-dě. ¹¹ Te quiti ní xíndecu ñi cùu te ñá túú-gǎ-di ndècu vitna, cùu-di datná téé cùu uná yíndaha ñaha xii ñáyiu, te ìⁿ-ni cùu-di ndihí cue téé úsá yíndaha ñáyiu-ánⁿ, te quiti-ánⁿ sáá nduu cuíta nihnu-di quíhíⁿ-di núú ùhú núú ndàhú ñi caa ñi quíhíⁿ.

¹² Te ndi ùxí ndiqui quiti-ánⁿ cada iní-n sǎ cúú-xí ùxí tnàhá cue téé quíndaha ñaha xii ñáyiu, dico vátá sàá-gá nduu cùnùu-güedé quíndaha

ñaha-güedé xii-yu. Te cue téé-án ñihí-güedě tnúhu ndee ìní taxi tnùní-güedé ndihí quiti-án, dico tnaa-ni taxi tnùní-güedé ndihí quiti-án. ¹³ Te ndi ùxí cue téé-án cuu ìⁿnuu-güedě taxi tnùní-güedé, te chindee-güedě quiti-án cuendá cuu ìⁿnuu-güedě ndihí-di cuendá taxi tnùní-gá-di. ¹⁴ Te cue téé-án nàá-güedé ndihí Yaá cáá dàtná cáá ìⁿ mbéé quiti ní dánícuèhé-güedé dico vá ndácú-güedě nàá-güedé ndihí-gá chi cuíta-güedé. Te diu-gá cúú-gă Yaá ío cùnuu taxi tnuní cuèi nchaa téé yìndaha ñaha xii ñáyiú, te ducaⁿ-ni tàxi tnuní-gá cuèi nchaa dava-gá-yu. Te mee Yă Ndiöxí ní cachí-gá nándi cùu nchaa ñáyiú cundecu ndihí Yaá cáá dàtná cáá ìⁿ mbéé quiti ní dánícuèhé-güedé-án, te diu-ni ñáyiú-án cúú-yu ñáyiú ní cáháⁿ-gá te cùú-yu ñáyiú quide ndáá ndécú ìchi-gá —duha càchí espíritú xínú cuèchi núú-gă.

¹⁵ Te ní cachí tucu espíritú-án xii-í:

—Ndute ñùhu núú núcõo ñadhí ñaha ndècu ichi díí ìní-án, ndute-án cada ìní-n sã cúú-xí ñáyiú nchaa nàcióⁿ, ndihí ñáyiú nchaa ñuú, ndihí ñáyiú xĩndecu nchaa xichi, ndihí ñáyiú càháⁿ ndí dííⁿ ndí dííⁿ núú tnùhu. ¹⁶ Te dàtná ní cachí-í sá ndè uxí ndiqui quiti ní xíní-n-ăⁿ cúú-xí ùxí tnàhá cue téé quindaha ñaha xii ñáyiú, te cue téé-án cuu úhú ìní-güedé ñadhí ñaha ndècu ichi díí ìní-án, te ni vã cádá cuendá ñáhá-gă-güedé xii-aⁿ, te ndada ndàhú ñáhá-güedě, te dacàchi ñaha-güedé xii-aⁿ, te cahmi ñaha-güedě. ¹⁷ Te mee Yă Ndiöxí ducaⁿ dàcaháⁿ-gá ìní cue téé-án cuendá cada-güedé nàcuáa cuìní méé-gă, te xíáⁿ núu cuu ìⁿnuu-güedě cuendá cúñaha-güedě xii quiti-án

cada-di núú-güedě taxi tnùní-di, te ducaⁿ-ni càda-di núú-güedě taxi tnùní-di ndéé ná sàá nduu càda Yá Ndiõxí nàcuáa ní cachí-gá. ¹⁸ Te ñadihí ñaha ní xiní-n-ãⁿ cada iní-n sã cúú-áⁿ ñùú cáhnú ñùú ío cùnuu, te ñuú-áⁿ ndécú tée ío-gá cùnùu taxi tnuní nchaa cue tée yìndaha ñaha xii ñáyiú xĩndecu ñuyíú —duha ní cachí espíritú xínú cuèchi núú Yá Ndiõxí xii-í.

18

Ní naa ñuú Babiloniá

¹ Te ducaⁿ te dătnùní ní xiní tucu-í ingá espíritú xínú cuèchi núú Yá Ndiõxí, te ndéé andiú nì dátăsaⁿ-xi te ní dáyèhé-xi ñuyíú, te espíritú-áⁿ ío cùnuu-xi. ² Te níhi ní cáháⁿ-xi, te càchí-xi:

—Ní sáá nduu nàa ñuú cáhnú ñùú cùnùu nani Babiloniá, te xíaⁿ-nă natacá nchaa núú espíritú cùndihí yucu ñávăha cundecu-xi, te vá quée-gă-xi xíaⁿ, te diu-ni xíaⁿ natacá nchaa quiti ndàva núú tàchí nchaa quiti ndehe quide, quiti ñá túú tnàhá iní ñáyiú te xíaⁿ-nă cundecu-güedi. ³ Te ducaⁿ chi ñáyiú ñuú-áⁿ sánú ìchí-yu nchaa ñáyiú ñihí ñuyíú ichi cuèhé ichi duha, te ducaⁿ-ni xĩnchícúⁿ ñihnu nchaa ñáyiú ñuyíú xĩquidé-yu, te nchaa cue tée cùnuu yìndaha ñaha xii ñáyiú, cue tée-áⁿ cúú ñnuu-güedé ndihí nchaa ñáyiú ñuú-áⁿ quidé-güedě ndihí-yu nândi sá cuèhé sá dúhá. Te nchaa ñáyiú dìco nândi sá dícó quèheⁿ ñáyiú ñuú-áⁿ ío cùu cuicá-yu, te ducaⁿ quèheⁿ nchaa ñáyiú ñuú Babiloniá-áⁿ nchaa sá dícó ñáyiú-áⁿ cuëndá xíaⁿ cãnehé-yu ndécú-yu ichi cuèhé ichi duha —duha càchí espíritú-áⁿ.

⁴ Te sá tá dúcáⁿ te ní tecú dóho-í ní cáháⁿ ñⁿ sá ñí cáháⁿ andi^u, te càchí-xi:

—Nchaa nchòhó ñáyi^u cùu cuendá-í quee-ndo ñùú Babilonía cuendá sá vǎ cùndècu-ndo tnahá-ndó ìchi cuehé ìchi duha dàtná ndécú ñáyi^u ñuú-áⁿ, te ducaⁿ te vǎ quìní-ndó tnùndòho tnúhu ndàhú sá quíxí cùu xii ñáyi^u-áⁿ. ⁵ Chi ío cuéhé cuèchi-yu ní cuu ndècu núú Yǎ Ndiǒxí, te mee-gǎ náhá-gǎ nàcuáa ndùu nchaa sá quidè-yu. ⁶ Te nchòhó ñáyi^u cùu cuendá-í, chí nánchòcáva dandòho-ndo ñáyi^u-áⁿ dàtná quidé mèé-yu dándohó-yu cue ñáyi^u, te úú xito nanchòcáva-ndo dándoho-ndó-yu, te ducaⁿ càda-ndo cuendá ío-gá ndohó-yu. ⁷ Te ío quide cahnú-yu mèé-yu, te ío cùdíí iní-yu quidé-yu nchaa núú sǎ cuéhé sá dúhá, te sá dúcáⁿ xidó-yu quidé-yu nchaa sá cuéhé sá dúhá nùu xǎⁿ nchòhó ío dandòho-ndó-yu, te ducaⁿ chi ñáyi^u ñuú-áⁿ sání iní-yu, te càchí-yu: “Nchúhú cúú-ndǐ dàtná ñⁿ ñadìhí ñǎ túú quèé, ñaha ío cùnuu yindaha ñaha xii ñáyi^u. Te ducaⁿ sǎtnahá-xi cùu-ndí chi nchaa-ni nduu ío váha cùu iní-ndí ndécú-ndǐ, te ni vǎ sàà ñⁿ nduu te ndíhú iní-ndí”, duha càchí ñáyi^u ñuú-áⁿ. ⁸ Te sá cuendá nchaa sá quidè-yu-áⁿ nùu xǎⁿ ñⁿ-ni ndùu sáá tnùndòho sá cúú-xí-yu, te ío ndohó-yu chi ñuú-yu coo tnamá, te coo cuéhé cahni ñaha-xi xí-yu, te ío ndíhú iní-yu, te cáyú ñuú-yu, te ducaⁿ ndòhó-yu chi Dútú Ndiǒxí ío cùnuu-gá, te ñuú-gá ducaⁿ dándoho ñaha-gá xí-yu —duha càchí sá ñí cáháⁿ àndi^u-áⁿ.

⁹ Te nchaa cue téé cùnuu yindaha ñaha xii ñáyi^u ío ndáhyú-güedé sá ndíhú iní-güedé òré ná quìní-güedé quene ñúhmá cáyú ñuú cue ñáyi^u

Babìloniá, chi ðiu cue téé-án cúú-güedě cue téé cùu ñⁿnuu ndihí-yu quide-güedé nchaa núú sǎ cuèhé sá dúhá ndihí-yu, te ducaⁿ chi ío tnàhá iní-güedé cundecu-güedé ndihí-yu ichi ðíí iní. ¹⁰ Te cue téé-án xica-nǎ cundecu-güedé cundehe-güedě nàcuáa ndoho nchaa ñáyu ñúú-án sǎ yùhú-güedé nchaa tnúndòho-án, te cachí-güedé:

—|Ndàhú nchòhó ñáyu ñúú cáhnú ñúú cúnùu nani Babìloniá! Chi uuⁿni ní sáá nchaa tnúndòho tnúhu ndàhú sá cúú-xí-ndó —duha cachí-güedé.

¹¹ Te nchaa ñáyu ðìco nchaa sá nándíhi ñáyu ñúú Babìloniá tnàhá-yu ío ndáhyú-yu sá ndihú iní-yu chi vá yǒo-gá cuaaⁿ nchaa sá dícǒ-yu. ¹² Te ðìcǒ-yu nchaa sá ñí cuáha mee-ni ðíhúⁿ cuááⁿ, ndihí nchaa sá ñí cuáha mee-ni ðíhúⁿ cuixíⁿ, te ðìco tucú-yu sá ñí cuáha mee-ni yúú vǎha yúú nání pǎrlá, ndihí nchaa dava-gá sá ñí cuáha dava-gá yúú vǎha, te ðìcǒ-yu tnàhá dóó sèdá, ndihí ingá núú dǒó vǎha sá nání lǐnú, ndihí dóó muràdú, ndihí dóó tícuèhé te mee-ni dǒó vǎha cùu-xi, te ðìco tucú-yu tnàhá yutnu sá sàháⁿ tnámí, te ðìco tucú-yu sá ñí cuáha sá nání màrfíl, te ðìco tucú-yu sá ñí cuáha mee-ni yùtnu vǎha sá ío ndèyáhu, te ðìco tucú-yu sá ñí cuáha mee-ni càá, ndihí sá ñí cuáha mee-ni sǎ nání bròncé, ndihí sá ñí cuáha mee-ni yúú vǎha yúú nání màrmól. ¹³ Te ðìco tucú-yu canèlá, ndihí yúcu sǎ sàháⁿ tnámí, ndihí dùsa sá sàháⁿ tnámí, ndihí yúcu sǎ nání mìrrá, te ðìco tucú-yu ingá núú dùsa sá sàháⁿ tnámí nàni olivánú, te ðìco tucú-yu ndudí ndéhé yoho yàha stilé, ndihí acití yutnu nàni olívú, ndihí yuchi triú vǎha, te ðìco tucú-yu nchaa dava-gá núú triú, te ðìcǒ-yu tnàhá mběé,

ndihì cuàyú, ndihì nchaa dava-gá quiti tata, te dìco tucú-yu tnàhá carrètá, te dìco tucú-yu tnàhá ñáyiu xìnu cuechi, ñáyiu ñá túú tnàhí dàñá quee núú chíúⁿ pàtróóⁿ-xi. ¹⁴ Te nchaa ñáyiu dìco-áⁿ cùñàhá-yu xii ñáyiu ñuú Babiloniá:

—¡Nchaa sá ïo cùdíí ìní-ndó cùndecu ndihì-ndo ni cuu vá ndácú-gă-ndó ñihí-ndó vitna, te nchaa sá sání ìní-ndó sã ïo váha càa ndecu ndihì-ndo ndihì nchaa dava-gá sá ndécú ndihì-ndo ní ndihì nihnu-xi vitna, te ni ìⁿ nduu-gá vá ñihí-ndó ni ìⁿ xíãⁿ cundecu ndihì-ndo! —duha cúñaha ñáyiu-áⁿ xií-yu.

¹⁵ Te nchaa ñáyiu ní cuu cuica ñí xóo dico nándi nchaa sá ñí xóo dico ñí queheⁿ cue ñáyiu ñuú Babiloniá, nchaa ñáyiu-áⁿ xica-nã cundecú-yu cundèhé-yu sá yùhú-yu cuèndá nchaa tnúndòho sá yãha cue ñáyiu ñuú-áⁿ, te ío ndáhyú-yu sá ndihú ìní-yu sá dúcáⁿ ndòho ñáyiu-áⁿ. ¹⁶ Te cúñaha tùcú-yu:

—¡Ndàhú nchòhó ñáyiu xĩndecu ñuú cáhnú ñuú nání Babiloniá! Chi nchòhó cúú-ndó dàtná ìⁿ ñadìhí ñaha nihnu dóó vãha dóó muràdú, ndihì dóó tícuèhé, te mee-ni sã ñí cuáha díhúⁿ cuàáⁿ, ndihì mee-ni sã ñí cuáha yúú vãha yúú nání pèrlá, ndihì sá ñí cuáha dava-gá yúú vãha sá ïo vii ndãa mee-ni nchàa xíãⁿ ní cuáha sá yíhí lõho-aⁿ, ndihì sá ñúhú dǔcúⁿ-aⁿ, ndihì sá ñúhú dǔcúⁿ ndáhá-áⁿ. ¹⁷ ¡Te uuⁿni ní ndihì nihnu nchaandi túhú sá ndécú ndihì ñadìhí-áⁿ, te ducaⁿ sãtnahá-xi cùu nchohó ní cùu! —duha cúñàhá-yu xii cue ñáyiu ñuú Babiloniá.

Te nchaa cue tée dàcaça barcú ndihì nchaa cue tée tàxi tnuní bàrcú-áⁿ, ndihì nchaa ñáyiu

ñùhu xití bàrcú-án, ndìhi nchaa dava-gá cue téé nándi chiuⁿ quide ndecu lamár, nchaa ñáyi-án xica cùndecú-yu ¹⁸ te quiní-yu òré quene ñúhmá cáyú ñuú cue ñáyi Babiloniá, te níhi cáháⁿ-yu, te cachí-yu:

—Ni ñⁿ ñuú ñá túú nŭtnahá-xi ñuú Babiloniá — duha cáháⁿ-yu.

¹⁹ Te nchaa ñáyi-án chidó-yu ñuhu díqui-yu, te ngúita-yu ndáhí-yu sá ndihú iní-yu, te níhi cáháⁿ-yu, te cachí tucú-yu:

—¡Ndàhú nchòhó ñáyi xĩndecu ñuú cáhnú ñuú nání Babiloniá! Chi ío cuica-ndo ni cùu, te ñu-ndo ñi quide ní cuu cuica nchaa ñáyi ndècu ndìhi barcú, te vitna uuⁿni ní naa-ndo ndìhi ñuú-ndó — duha cachí-yu.

²⁰ Te nchaa nchòhó ñáyi ndècu andi-ño chí cúdŕí ñi sá dúcáⁿ dàndoho Yá Ndiõxí nchaa ñáyi ñuú Babiloniá-án, te ñu-ni ducaⁿ chí cúdŕí ñi nchaa nchòhó cue téé ní cachí Xitohó Jesucristú cáháⁿ tnúhu-gá, te ñu-ni ducaⁿ chí cúdŕí ñi nchaa nchòhó cue téé cáháⁿ tnúhu Yá Ndiõxí nàcuáa dàcahu ñi ñáhá-gá xii-ndo, te ñu-ni ducaⁿ chí cúdŕí ñi nchaa dava-gá nchòhó ñáyi cùu cuendá-gá cuendá sá dúcáⁿ dàndoho-gá nchaa ñáyi ñuú-án. Te ducaⁿ càda ñaha-gá xii cue ñáyi-án cuendá nchaa sá quidé ñáhá-yu xii-ndo.

²¹ Te sátá dúcáⁿ te ní xiní-í ñⁿ espíritú xínú cuèchi núú Yá Ndiõxí, te espíritú-án ño ndee-xi te ní queheⁿ-xi ñⁿ yúu cáhnú dàtná càhnu yódó te ní dáquẽ-xi xití ndute lamár, te càchí-xi:

—Dàtná ní quide-í ní dáquẽ-í yúu xití ndute ducaⁿ càda-xi ñuú cáhnú ñuú Babiloniá, chi ñáyi

te ducaⁿ ñí dáquìhíⁿ ñáhá-gă xii-aⁿ núú ùhú núú
ndàhú chi nàchinaa-gá sá ñí sahní-aⁿ cue
ñáyiú ní xinu cuechi núú-gă.

Duha càchí-yu.

³ Te càchí tucú-yu:

—jÍo càhnu cuu Yá Ndiöxí!, chi nchaa nduu nchaa
quíú ducaⁿ-ni quène ñúhmá núú ñúhú ñàha-áⁿ
càyú-aⁿ —duha càchí-yu.

⁴ Te ndí òcò cúmí cue téé cùu sacuéhé xĩndecu-áⁿ
ñí ngüíñí xítí-güedě núú Yă Ndiöxí núú núcõo-gá
táxí tnùní-gá, te tnàhá cue quiti cúmí xĩnutnĩ-áⁿ ñí
ngüíñí xítí-güèdì núú-gă, te cue téé-áⁿ càchí-güedé
ndihí cue quiti-áⁿ:

—Sá ndáá sá ïo càhnu cuu Yá Ndiöxí —duha
càchí-güedé ndihí cue quiti-áⁿ.

⁵ Te sátá dúcáⁿ te ní tecú dóho-í ní cáháⁿ ĩⁿ sá ñí
cáháⁿ mei núú nútñĩ xilé váha núcóo Yá Ndiöxí, te
càchí sá càháⁿ-áⁿ:

Nchaa nchòhó ñáyiú xinu cuechi núú Yă Ndiöxí,
diu-ni nchòhó ñáyiú nèhe sá yíñùhu núú-gă,
càháⁿ-ndó să ïo càhnu cuu-gá cuëi cùnuu-ndo àdi ñá
túú cùnuu-ndo.

Duha càchí sá càháⁿ-áⁿ.

Īⁿ vico cùu datná vico tnăndaha

⁶ Te sátá dúcáⁿ te ní tecú dóho-í ní cáháⁿ cuéhé
víhí ñáyiú andiú, te òré ducaⁿ ñí cáháⁿ-yu te ní
quide-xi dàtná quidé-xí núú xícá cuéhé víhí ndùte,
te ní quide tucu-xi dàtná quidé-xí òré càháⁿ níhi
vìhi ñúhu, te càchí-yu:

jÍo càhnu cuu Dútú Ndiöxí Yaá cúú Tătá-ó! Te ío
cùnuu-gá táxí tnùní-gá, te quide-gá nchaandi
túhú sá váha.

7 Te ío chí ná cùdíí ìní-ó, te chí ná càchí-ó sǎ ìo càhnu cuu Yá Ndiǒxí,

chi vitna ní sǎá nduu càda Yáá cáá dàtná cáá ìⁿ mbéé quiti ní dánicuèhé-güedé ìⁿ vico, te cùu-xi datná vico tnǎndaha.

Te nchaa ñáyiú cùu cuendá-gá sa ní ndihí-yu sa ndècu túha-yu cundecú-yu vico-áⁿ, te cada iní-ó sǎ ñáyiú-áⁿ cúu-yu dàtná ìⁿ ñadìhí xíchí tnǎndaha ndihí-gá,

8 te ñáyiú-áⁿ ñi nduu táhǔ-yu cuihnú-yu dóó vǎha dóó chàhnchí sǎ ìo vǎha càndoo.

Duha càchí-yu.

Te sǎ dúcáⁿ ñi nduu táhú ñáyiú cùu cuendá Yǎ Ndiǒxí dóó vǎha ñihnú-yu, xíǎⁿ cútnùní iní-ó sǎ cúu-yu ñáyiú quide ndáá núú-gǎ.

9 Te ìⁿ espíritú xínú cuèchi núú Yǎ Ndiǒxí ní cachí tnúhu-xi xii-í, te càchí-xi:

—Chido tnùnín-ⁿ ìⁿ núú tütú nàcuáa na càháⁿ-í-a: “Vǎha táhú nchaa ñáyiú ní cáháⁿ ñáhá Yáá cáá dàtná cáá ìⁿ mbéé quiti ní dánicuèhé-güedé cundecú-yu vico, te vico-áⁿ cúu-xi dàtná vico tnǎndaha cada-gá”, te duha chido tnùnín-ⁿ chi tnúhu-a cùu-xi tnúhu ndáá tnúhu Yá Ndiǒxí —duha càchí espíritú-áⁿ.

10 Te ní ngüíñí xítì-í núú espíritú-áⁿ cuendá chiñuhu-í-xi ñi cùu, te ní cachí-xi:

—Vǎ dúcáⁿ càda-n, chi tnàhá-í dícó xínú cuèchi-í núú Yǎ Ndiǒxí dàtná quidé-n xínu cuechi-n núú-gǎ ndihí nchaa dava-gá ñáyiú ndècu ndihí-n ichi-gá, ñáyiú nchìcúⁿ nihnu quide ñi yuhu ñi iní nchaa nàcuáa càháⁿ Xítóhó Jesucristú, te núú xíǎⁿ càchí-í sǎ vǎ dúcáⁿ càda-n, chi mee Yǎ Ndiǒxí chiñuhu-n —duha càchí espíritú-áⁿ.

Te nchaa cue téè càháⁿ tnúhu Yá Ndiǒxí càháⁿ-güedé nàcuáa ndùu tnúhu càháⁿ Xítóhó Jesucristú.

Cuèndá Yaá yódó ìⁿ cuayú cuìxíⁿ

¹¹ Te ní xiní-í nchì andi, te ní xiní-í ní quee ìⁿ Yaá yódó-gǎ ìⁿ cuayú cuìxíⁿ. Te Yaá-áⁿ nání-gǎ Yaá quidé ndáa cuiti, duha nàni-gá. Te quide-gá nchaa sá càháⁿ-gá, te ío váha quide ndáa-gá cuèchi nchaa ñáyi, te nchaa ñáyi nàa ndihì ñaha xìi-gá ío váha xìní-gá nàcuáa cada ñaha-gǎ xií-yu chí ío ndáa quidé-gǎ. ¹² Te tinùu-gá dáyèhé-xi dàtná dáyèhé ñuhú, te titní coróná ñuhú dǐquí-gǎ, te nèhe-gá ìⁿ sá ndèé diu-gá, te vá yǒo ìⁿ cùnuni iní-xi nása cuáháⁿ tnúhu-áⁿ, chí ìⁿdi díi-ni mee-gǎ náhá-gǎ nàcuáa càháⁿ-xi. ¹³ Te Yaá-áⁿ níhnú-gǎ ìⁿ dóo ní cuu mee-ni níí, te Yaá-áⁿ càchí tnúhu-gá nchaa nàcuáa sàni iní Yá Ndiǒxí, núu xiǎⁿ nání-gǎ Tnúhu Yá Ndiǒxí. ¹⁴ Te sátá-gǎ nchìcúⁿ nchaa espíritú xínú cuèchi núu Yá Ndiǒxí, te cue espíritú-áⁿ cúu-xí dàtná sandàdú, te xǐxíhnu-xi dóo cuìxíⁿ dóo vǎha sá cándò, te xǐxódó-xi cuayú cuìxíⁿ. ¹⁵ Te yuhu Yaá yódónùu-áⁿ quéné ìⁿ yuchí cáhnú, te ndihì yuchí-áⁿ dancuèhé-gá nchaa ñáyi xǐndecu ñuyú, te ío dandòho ñaha-gá xií-yu, te dàtná quidé téè quìhni ndéhé yoho yàha stilé ducaⁿ sàtnahá-xi cada ñaha-gǎ xií-yu, chí ío dandòho ñaha-gá xií-yu cuèndá sá ío cùdééⁿ-gǎ. Te mee-gǎ ío cùnùu-gá táxí tnùnì-gá, te quide-gá nchaandi túhú sá vǎha. ¹⁶ Te sátá dǒo níhnú Yaá-áⁿ ndihì núu ticácáⁿ-gǎ yódó tnùnì nàcuáa nàni-gá, te duha càháⁿ-xi: “Téè ío cùnùu taxi tnunì ñáhá xìi nchaa cue téè yǐndaha

ñaha xii ñáyiu ndihì nchaa dava-gá ñáyiu”, duha ndèé tnuní sátá dǒó-gǎ-áⁿ ndihì tícácáⁿ-gǎ-áⁿ.

17 Te dǎtnùnì ní xiní-í ìⁿ espíritú xínú cuèchi núú Yǎ Ndiǒxí nútnǐ-xi núú nchǐcanchii, te níhi ní cáháⁿ-xi, te xǎhaⁿ-xi xii nchaa quiti ndava núú tàchí:

—Nchaa nchòhó quiti ndàva, chí táquxi chi caxi-ndo nchàa sá ní quide túha Yá Ndiǒxí, 18 chi caxi-ndo cùñú nchaa cue téé yìndaha ñaha xii ñáyiu, ndihì cuñú nchaa cue téé tàxi tnuní ñáhá xii cue sandadú, ndihì cuñú nchaa cue téé ío ñǐ xǐndáa, ndihì cuñú nchaa cuàyú, ndihì cuñú nchaa cue téé ní xódó ñaha xii-güedi, ndihì cuñú nchaa dava-gá ñáyiu, ñáyiu ñá túú tnàhí ní dàñá quee núú chíúⁿ pàtróóⁿ-xi, ndihì cuñú nchaa ñáyiu ní dáñá ní quee núú chíúⁿ pàtróóⁿ-xi, ndihì cuñú nchaa ñáyiu cùnuu, ndihì cuñú nchaa ñáyiu ñá túú cùnuu, te nchaa cuñú-áⁿ caxi-ndo —càchí espíritú-áⁿ xǎhaⁿ-xi xii nchaa quiti-áⁿ.

19 Te sátá dúcáⁿ te ní xiní tucu-í quiti ní quene xiti làmár, ndihì nchaa cue téé yìndaha ñaha xii ñáyiu, ndihì nchaa cue téé cù sandadú-güedé ní naníhí tnáhá-güedě ndihì quiti-áⁿ cuendá cuu ìⁿnuu-güedě ndihì-dì nàá-güedé ndihì Yaá yódó cuàyú-áⁿ, ndihì nchaa cue espíritú cúú sàndadú ndihì-gá. 20 Te cue espíritú cúú sàndadú ndihì Yaá-áⁿ ní tnǐ-xi quiti-áⁿ, ndihì téé ío dándahú ñáhá xii ñáyiu càchí sá càháⁿ tnúhu Yá Ndiǒxí te ñá ndàá sá càháⁿ-dé tnúhu-gá, te diu-ni téé-áⁿ ní quide-dé tǐtní núú sǎ vǎ yǒo tnàhí ndàcu cada núú quiti-áⁿ. Te sá dúcáⁿ ní quide téé-áⁿ xǐǎⁿ ní dándàhú-dé ñáyiu ní sàndáa iní-yu ní quéě-yu tnuní quiti-áⁿ, te ní chiñùhú-yu

sá nǐ dándácú ñàhá-yu xii-di, te cue espíritú-án nǐ dáquēe-xi quití-án nǔú ñùhú núú ñùhú àzufré càyú-xi, ndihí téé ducaⁿ dándahú ñàhá xii ñáyíu-án, te xíaⁿ cuhuⁿ téé-án ndihí quití-án, te ío ndoho-dé ndihí-di. ²¹ Te ndihí yuchí cáhnú sǎ quéné yùhu Yaá yódó cuàyú-án nǐ sahní-gá nchaa dava-gá cue téé cùndihí quití-án, te nchaa cue quití ndàva ní chítú xìtí-güedi ní xexi-güedi cuñú nchaa cue téé-án.

20

Úxí cièndú cuía

¹ Te sátá dúcáⁿ te ní xiní-í ñⁿ espíritú xínu cuèchi núú Yǎ Ndiǒxí ní quee-xi andíu, te nùndaha-xi ndacaá nacaáⁿ-xi yèhe ñⁿ yaú cùnú víhí nǔú cùndècu sácúíhná, te nùndaha tucu-xi ñⁿ cadená cáhnú. ² Te espíritú-án nǐ tní-xi quití dééⁿ nání dràgón, te díu-ni quití-án cúú-dí mèi yucu ñávǎha sá nání sácúíhná, te díu xǐǎⁿ ní nduu-xi cóo ndéé sanaha. Te espíritú-án nǐ dácútú ñàha-xi xii-di, te ducaⁿ-ni cùndutu-di ndéé xínu úxí cièndú cuía. ³ Te sátá nǐ dácútú ñàha espíritú-án xii-di te ní dáquēe ñàha-xi xii-di yaú-án chí díu yaú-án tàú-di quée-di cundecu-di. Te ní nacadí-xi yuyèhe yaú-án, te ní tee-xi sèyú yuyèhe-án cuèndá sá và quéné-gǎ-di dandàhú-di cue ñáyíu ñuyíú, te xíaⁿ cundedí ni-hnu-di ndéé xínu úxí cièndú cuía. Te sátá ná yǎha úxí cièndú cuía-ǎⁿ te nandáxí-di te quene-di yaú núú ñùhú-dí-ǎⁿ caca cuu tnaa-di ñⁿ úú nduu.

⁴ Te dǎtnùní ní xiní-í xǐnutnǐ tǐtní xilé váha, te xíaⁿ xǐnucóo nchaa ñáyíu ní ngúndecu ndihí tnúhu ndee ìní cada ndáá cuéchi nchaa ñáyíu, te ní xiní-í xǐndecu tnàhá cue ñáyíu ní xehndé-güedé

dúcúⁿ-xi cuendá sá ñí cáháⁿ-yu tnúhu Yá Ndiöxí, ndihí cuendá sá ñí cáháⁿ váha-yu cuendá Xítohó Jesucrístú. Te ñiu-ni ñáyiu-áⁿ cúŷ-yu ñáyiu ñá túú ní chĩñuhú-yu quiti ní quene xití làmár-áⁿ, te ni ñà túú ní chĩñuhú-yu sá ñí dándácú ñáyiu ní natava ñàhá-yu xii-di, te ni ñà túú ní dàñá-yu mèe-yu quée-yu tnuní quiti-áⁿ chi ni tnée-yu te ni ndàhá-yu ñá túú ní dàñá-yu quée tnuní-di. Te ní xiní-í ní ndoto cue ñáyiu-áⁿ cuendá tnàhá-yu cunùú-yu taxi tnùn-í-yu ndihí Xítohó Jesucrístú úxí cièndú cuía. ⁵ Te ñava ñáyiu ní xihí ñá túú ní ndòtó-yu, chi ndée yáha úxí cièndú cuía te dàtnùn-í ndotó-yu. Te ñáyiu ní xiní-í ní ndoto-áⁿ cúŷ-yu ñáyiu ní ndoto díhna nuu. ⁶ ;Te ío váha ní tnahá nchaa ñáyiu ní nduu táhú ñí ndoto díhna nuu!, chi cue ñáyiu-áⁿ ío cùdú-yu núú Yá Ndiöxí, te nchaa ñáyiu-áⁿ vǎ quihíⁿ-yu núú ùhú núú ndàhú, te ñáyiu-áⁿ cúŷ-yu dútú ndécŷ-yu núú Yá Ndiöxí ndihí núú Xítohó Jesucrístú, te ñáyiu-áⁿ cùnùú-yu dàtná cùnù Xítohó Jesucrístú, te cunuu ndihí ñàhá-yu xii-gá úxí cièndú cuía.

⁷ Te sátá ná yáha úxí cièndú cuía-ǎⁿ te sácúíhná quee-xi núú yíndèdí nihnu-xi-áⁿ, ⁸ te ngúíta tucu-xi dandàhú-xi nchaa ñáyiu xĩndecu nihí ñuyíú, te cuèi ñáyiu ñuú Gög, te cuèi ñáyiu ñuú Mǎgóg ducaⁿ quihíⁿ-xi dandàhú ñàhá-xí xii-yu, te datàcá-xi nchaa ñáyiu cuendá nàá-yu, te cuéhé víhí-yu dàtná cuéhé ñuhu cúchí làmár. ⁹ Te nchaa ñáyiu-áⁿ tñí-yu ichi quihíⁿ-yu ìⁿ ichi sá cuàháⁿ núú cáá ìⁿ yodo cahnu vihi, te sáá-yu núú xĩndecu ñáyiu cùu cuendá Yá Ndiöxí, te ñáyiu-áⁿ chidòcò-yu cue

ñáyiú cùu cuendá-gá-áⁿ ndihí ñuú-yu, te ñuú-áⁿ ïo cùu iní-gá, dico mee Yă Ndiöxí dangòyo-gá ñuhú cahmi-gá nchaa ñáyiú ducaⁿ chidoco ñaha xii ñáyiú cùu cuendá-gá-áⁿ, te nchaa ñáyiú-áⁿ cuú. ¹⁰ Te sácuihná sã dúcáⁿ dándahú ñáhá xii ñáyiú chidoco ñaha xii ñáyiú cùu cuendá Yă Ndiöxí-áⁿ dàquée ñaha-gă xii-xi núú ñuhú núú ñuhú àzufré càyú-xi, te ñiú-ni xíaⁿ sa ñuhu quití ní quene xití làmár, ndihí téé ní dándahú ñáyiú ní xáhaⁿ-dě xii-yu sá cãháⁿ-dé tnúhu Yă Ndiöxí te ñá ndàá sá cãháⁿ-dé tnúhu-gá, te xíaⁿ cuhuⁿ-xi ndoho-xi ni caa ni quíhíⁿ ndihí quití ní quene xití làmár, ndihí téé cãhí sá cãháⁿ tnúhu Yă Ndiöxí te ñá ndàá sá cãháⁿ-dé tnúhu-gá.

Cùndáá cuéchi ñáyiú

¹¹ Te ní xiní-í nútñí ñⁿ xilé váha xilé cuixíⁿ, te núú xilé-áⁿ núcõo ñⁿ Yaá. Te ndèhe Yaá-áⁿ nì ndóñúhú àndiú ndihí ñuyíú-a, te ducaⁿ ñí ndóñúhú-xí chí vá cùndècu-gá-xi. ¹² Te sátá dúcáⁿ te ní xiní-í nchaa ñáyiú ní xihí ní cùu, ñáyiú cùnuu ndihí ñáyiú ñá túú cùnuu xínutñí-yu núú Yàá núcõo núú xilé váha-áⁿ, te Yaá-áⁿ cúú-gă Yă Ndiöxí, te òré-áⁿ ñí nandicá nchaa tutú núú yódó tnùní nchaa nàcuáa ndùu sá ñí quide ñⁿ ñⁿ ñáyiú-áⁿ, te ní nandicá tucu ingá tutú núú yódó tnùní nchaa ñáyiú ní naníhí tàhú, te nchaa ñáyiú ní xihí ní cùu xínutñí-yu núú Yă Ndiöxí cundáá cuéchi-yu, te nchaa nàcuáa ndùu nchaa cuéchi-yu yòdo tnuní núú nchaa tutú-áⁿ ducaⁿ cùndáá. ¹³ Te nchaa ñáyiú ní xihí xití ndute làmár, ndihí nchaa ñáyiú ní xihí núú ñuhu yìhí nchaa ñáyiú-áⁿ cundáá cuéchi-yu nàcuáa ní quidé-yu ñⁿ ñⁿ-yu. ¹⁴ Te vitna te vá cùú-gá ñáyiú chí ñá túú-gă

tnúhu xihí, te nchaa ñáyiú ñùhu núú ñùhú núú càyú ñáyiú-áⁿ cúŷ-yu ñáyiú ní xíta nihnu ni caa ni quíhíⁿ.
 15 Te ducaⁿ chi nchaa ñáyiú ñá túú yòdo tnuní núú tütú núú yódó tnùní nchaa ñáyiú naníhí tàhú ní dáquěe ñaha Yă Ndiöxí xií-yu núú ñùhú núú càyú.

21

Andiu sàa ndihí ñuyúú sáá

1 Te sátá dúcáⁿ te ní xiní-í andiu sàa ndihí ñuyúú sáá, te andiu sã ndécú dǐhna ndihí ñuyúú sà ndécú dǐhna ní ndóñúhú-xí, te tnàhá làmár ní ndóñúhú-xí.
 2 Te yúhú té Juàá ní xiní-í ñuú Jerusalén sáá ñǐ quee-xi núú ndécú Yă Ndiöxí, te ñuú-áⁿ cúú-xí ñuú méé-gă, te ío vii càa chi càa datná cáá ñⁿ ñadihí xíchí tnândaha. 3 Te ní tecú dóho-í níhi ní cáháⁿ ñⁿ sá ñǐ cáháⁿ andiu, te cächí-xi:

—Chí cündèdóho ñⁿ tnúhu na càháⁿ-í-a: Yă Ndiöxí ndécú ndihí-gá cue ñáyiú vitna, te ducaⁿ-nă cundecu ndihí ñaha-gă xií-yu, te diú-yu cùú-yu ñáyiú cùu cuendá-gá, te vá ñⁿ ndùu ñⁿ quíú-gă te dañá ñàha-gá xií-yu. 4 Te mee Yă Ndiöxí cada-gá sá ñà túú tnàhí-gá ná caní iní-yu cundecu-yu, te ni vǎ quìní-gá-yu tnúhu xihí, te ni vǎ quìní-gá-yu tnúhu ndàhyú, te ni vǎ quìní-gá-yu tnúhu ndihú iní-xi, te ni vǎ quìní-gá-yu tnúhu cùhú, chi nchaa sá ní xiní-yu ñuyúú dǐhna vá quìní-gá-yu vitna —duha cächí sá ñǐ cáháⁿ-áⁿ.

5 Te Yaá núcõo núú xilé váha-áⁿ ñǐ cachí tnúhu-gá xii-í, te cächí-gá:

—Yúhú quidè-í nàcuáa nduu saa nchàa sá cündècu vitna. Te vitna chido tnùní-n ñⁿ núú tütú

nchaa tnúhu sá nǐ cáháⁿ-í-a, chi nchaa tnúhu-a cùu-xi tnúhu ndáá cuiti —duha càchí-gá.

⁶ Te dǎtnùnǐ ní cachí tnúhu tucu-gá xii-í:

—Sa ní xínu cava nchaa chiuⁿ ní sani iní-í cada-í, te diu-ni yúhú cùu-í Yaá sa ndècu ndéé cùtnàhá ní ngáva ñuyíú, te diu-ni-í cundecu-í ni caa ni quíhíⁿ. Te nchaa ñáyiu cuiní tuha ñaha xì-í te cada iní-yu sá dàtná ndute cùu-xi sá cuǎñaha tǎhù-í xii-yu candeca-xi iní-yu ni caa ni quíhíⁿ. ⁷ Te nchaa ñáyiu na cùndee iní yáha nándi sá ná yáha-yu sá cuendá-í, te ñáyiu-áⁿ nduu tǎhù-yu cundecu váha-yu, te yúhú cuu-í Ndiǒxí-yu, te ducaⁿ mèe-yu cuú-yu déhe-í.

⁸ Te nchaa ñáyiu na yùhú ndoho cuendá-í quíhíⁿ-yu núú ñùhú núú càyú ndihí ñáyiu ñá túú sǎndáá iní ñáhá xì-í, ndihí ñáyiu quide nándi nchaa sá cuèhé sá dúhá, ndihí ñáyiu sàhni tnaha, ndihí ñáyiu ndècu ichi díí iní, ndihí ñáyiu quide nduu, ndihí ñáyiu chĩñuhu nchaa sá càchí-yu cùu ndiǒxí ní cadúha cue tée ñuyíú-a, ndihí ñáyiu dàcuandehnde, nchaa ñáyiu ducaⁿ xǐquide-áⁿ cuíta nihnú-yu chi quíhíⁿ-yu núú ñùhú núú ñùhú àzufré càyú-xi —duha ní cáháⁿ Yǎ Ndiǒxí ní cachí tnúhu-gá xii-í.

Ñuú Jerusàlén sáá

⁹ Te núú ùsá espíritú xǐnehe tícùú ñùhú tnúhu ndòho, te ìⁿ-xi ní quixi-xi te càchí-xi:

—Taqùxi, te na dǎnehé ñáhà-í xii-n nchàa ñáyiu cùu cuendá Yaá cáá dàtná cáá ìⁿ mbéé quiti ní dánícuèhé-güedé, ñáyiu-áⁿ cada iní-n sǎ cúu-yu dàtná ìⁿ xíchí cuéchí vìtna tnándaha, te ducaⁿ càda iní-n sǎ cúu-yu chi cundecú-yu ndihí-gá —duha ní cachí tnúhu espíritú-áⁿ xii-í.

10 Te òré quidé ñàha espíritú Yă Ndiõxí xii-í nàcuáa càchí iní-xi, te espíritú néhé tǐcuú-áⁿ ndéca ñàha-xi xii-í cuásaá ìⁿ tǐndúú dùcúⁿ, te xíaⁿ nǐ dánèhé núú ñàhá-xí xii-í ñuú Jerusàlén te ñuú-áⁿ nǐ quee-xi núú ndécú Yă Ndiõxí, te ñuú-áⁿ cúú-xí ñuú mée-gă. 11 Te ñuú-áⁿ ïo càhnu cuu-xi chi ducaⁿ ïo càhnu cuu mee-gă, te dàtásaⁿ-xi dàtná dàtásaⁿ yúú vâha sá nání jăspé yúú cáá dàtná cáá vǐdriú sá tũu ingá xio ndàa sàtá-xi. 12 Te nǐ cǎndéé yuhu ñuú-áⁿ sũúní dùcúⁿ nchaa sá ñũhú dòco, te nchií úxúú yuyèhe-xi, te ndi tnahá ìⁿ ìⁿ yuyèhe-áⁿ xǐndecu ìⁿ caa espíritú xínú cuèchi núú Yă Ndiõxí. Te ndi tnahá ìⁿ ìⁿ yuyèhe-áⁿ yódó tnùnǐ ðiú ìⁿ caa xichi cue ñáyiu isràél. 13 Te únǐ yuyèhe-xi nchií ndàa xio nacuáa quène nchícanchií, te únǐ tucu yuyèhe-xi nchií ndàa nacuáa quée nchícanchií, te únǐ tucu yuyèhe-xi nchií ndàa xio cuha nacuáa quène nchícanchií, te únǐ tucu yuyèhe-xi nchií ndàa xio datni nacuáa quène tucu nchícanchií. 14 Te sá ñũhú dòco-áⁿ chi úxúú tnahá yúú cúú cǐmientú-xi, te ndi tnahá ìⁿ ìⁿ yúú-ăⁿ ndéé ìⁿ caa ðiú cue téé ní cáháⁿ tnúhu Yaá cáá dàtná cáá ìⁿ mbéé quitǐ ní dánǐcuèhé-güedé, te ðiú mee-gă ní táuchíúⁿ-gă ní cáháⁿ-güedé tnúhu-gă.

15 Te espíritú sá càháⁿ ndihǐ ñaha xii-í-áⁿ néhé-xí ìⁿ sá cánǐ nǐ cuáha mee-ni ðǐhúⁿ cuááⁿ, te ndihǐ xǐáⁿ chícùhá-xi ñuú-áⁿ, ndihǐ sá ñũhú dòco ñuú-áⁿ, ndihǐ nchaa yuyèhe-xi. 16 Te ñuú-áⁿ ìⁿ-ni nèhe-xi cuendá quèhéⁿ-xi ndihǐ cuendá cǎni-xi, te espíritú-ăⁿ ní chícùhá-xi ndihǐ sá néhé-xí-ăⁿ ñuú-áⁿ, te nèhe-xi ócó úú cièndú mǐl mētrú sá cánǐ te ðiú-ni ducaⁿ nèhe-xi cuendá quèhéⁿ-xi, te ðiú-ni ducaⁿ nèhe-xi

sá dùcúⁿ nchaa vehe càa ñuú-áⁿ. ¹⁷ Te dǎtnùní ní chicùhá-xi sá ñúhú dòco ñuú-áⁿ, te xiǎⁿ néhé-xí ũnídico cúmí mètrú sá dùcúⁿ, te ní chicùhá-xi dàtná chicùhá cue ñáyiú ñuyúú-a.

¹⁸ Te sá ñúhú dòco-áⁿ ñí cuáha mee-ni yúú vǎha yúú sǎ nání jǎspé, te ñihì ñuú-áⁿ cúu-xí mèe-ni díhúⁿ cuááⁿ, te càa datná cáá vǐdriú sá ïo váha càndoo te túu ndàa ìngá xio. ¹⁹ Te ndi ùxúú yúú cúu cìmientú sá ñúhú dòco-áⁿ ndèé ndí dǐíⁿ núú yùú vii càa sátá-xi, te yúú díhna ndèé mee-ni yúú vǎha sá nání jǎspé sátá-xi, te yúú cúu ùú ndèé tucu ìngá núú yúú vǎha sá nání zàfirú sátá-xi, te yúú cúu ùní ndèé tucu ìngá núú yúú vǎha sá nání ǎgatá sátá-xi, te yúú cúu cùmí ndèé ìngá núú yúú vǎha sá nání èsmeraldá sátá-xi. ²⁰ Te yúú cúu ùhúⁿ ndèé tucu ìngá núú yúú vǎha sá nání ònicé sátá-xi, te yúú cúu ìnú ndèé tucu ìngá núú yúú vǎha sá nání còrnalíná sátá-xi, te yúú cúu ùsá ndèé tucu ìngá núú yúú vǎha sá nání crìsólitú sátá-xi, te yúú cúu ùná ndèé tucu ìngá núú yúú vǎha sá nání bèrilú sátá-xi, te yúú cúu ìíⁿ ndèé tucu ìngá núú yúú vǎha sá nání tòpacíú sátá-xi, te yúú cúu ùxí ndèé tucu ìngá núú yúú vǎha sá nání crìsopásá sátá-xi, te yúú cúu ùxí ìíⁿ ndèé tucu ìngá núú yúú vǎha sá nání jàcintú sátá-xi, te yúú cúu ùxúú ndèé tucu ìngá núú yúú vǎha sá nání àmatístá sátá-xi. ²¹ Te ndi ùxúú yuyèhe sá ñúhú dòco-áⁿ cúu-xí mèe-ni yúú vǎha sá nání pèrlá, te ndùu ñi yúú cúu ìíⁿ ìíⁿ yuyehe-áⁿ. Te tnuú cáhnú ndècu xití ñuú-áⁿ cúu-xí mèe-ni díhúⁿ cuááⁿ, te càa-xi datná cáá vǐdriú sá túu ndàa ìngá xio.

²² Te ní xiní-í sá ñà túú vèhe núú chíñùhu ñáyiú Dútú Ndiǒxí cáá ñùú-áⁿ, chi mee-ñǎ Dútú

Ndiõxí Yaá quidé nchàa-ndi túhú sá vǎha ndècu ñuú-áⁿ, ndihi Yaá cáá dàtná cáá ìⁿ mbéé quiti ní dánìcuèhé-güedé. ²³ Te ñuú-áⁿ ñà túú-gǎ xíní ñùhu-xi nchíanchii dayèhé-xi, te ni yóó ñà túú-gǎ xíní ñùhu-xi, chi mee-nǎ Yǎ Ndiõxí dáýèhé-gá ñuú-áⁿ ndihi Yaá cáá dàtná cáá ìⁿ mbéé quiti ní dánìcuèhé-güedé. ²⁴ Te cue ñáyiú nchaa ñuú cáá ñùyiú, ñáyiú ní naníhí tàhú xǐndecu ñuú-áⁿ dáýèhé-gá núǎ-yu, te nchaa cue téé yǐndaha ñaha xií-yu nèhe-güedé sá yǐñùhu sá cúú-xí ñùú-áⁿ, te quide cahnu ñaha-güedé xii-gá. ²⁵ Te yuyèhe ñuú-áⁿ ñà túú tnàhí nàndedí, te ñuú-áⁿ ñà túú tnàhí cùndiquiⁿ. ²⁶ Te nchaa ñáyiú nèhé-yu sá yǐñùhu sá cúú-xí ñùú-áⁿ te quide cahnú-yu Yá Ndiõxí. ²⁷ Te ñuú-áⁿ vǎ cúú cùndecu ni ìⁿ ñáyiú ndècu ichi cuehé ichi duha, te ni ìⁿ ñáyiú ndehnde, te ni ìⁿ ñáyiú quide sá ñà túú cùu váha iní Yǎ Ndiõxí vá cúú cùndecú-yu ñuú-áⁿ, chi mee-ni ñáyiú naníhí tàhú ñáyiú yòdo tnuní núú tütú Yaá cáá dàtná cáá ìⁿ mbéé quiti ní dánìcuèhé-güedé, mee-ni ñáyiú-áⁿ cundecú-yu ñuú-áⁿ.

22

¹ Te sátá dúcáⁿ te ðiu-ni espíritú-áⁿ nǐ dánèhé núú ñáhá-xí xì-í yúte núú ñúhú ndùte candoo canine, te ndute-áⁿ candeca-xi iní ñáyiú ni caa ni quíhíⁿ, te ndute-áⁿ quéé-xí mèi núú núcõo Yá Ndiõxí ndihi Yaá cáá dàtná cáá ìⁿ mbéé quiti ní dánìcuèhé-güedé. ² Te cuádava tnuú cáhnú yǎha xití ñuú-áⁿ cáá yùte-áⁿ, te xio xio yuhu yùte-áⁿ níhnú yùtnu cuuⁿ sávidí-xi, te sávidí nchaa yutnu-áⁿ cúú

tùcu-xi sá cándèca iní ñáyiu ni caa ni quíhíⁿ, te nchaa yutnu-áⁿ cúúⁿ sǎvidí-xi úxúú xito ìⁿ cuíá chi ndi tnahá yóó cúúⁿ sǎvidí-xi, te nchaa ndaha-xi cùu-xi tátna sá cúú-xí nchàa ñáyiu. ³ Te vá yǎo ìⁿ-gá cada ìⁿ sá ñà túú cùu váha iní Yǎ Ndiǒxí ñúú-áⁿ. Chi ñúú-áⁿ núcǎo mee Yǎ Ndiǒxí ndihí Yaá cáá dàtná cáá ìⁿ mbéé quití ní dánícuehé-güedé xítaxi tnùní-gá, te nchaa ñáyiu xínu cuechi núú-gǎ cada càhnu ñahá-yu xii-gá. ⁴ Te nchaa ñáyiu-áⁿ cundehe núú-yu Dútú Ndiǒxí, te tneé-yu cundee diú-gá. ⁵ Te ñúú-áⁿ vǎ quíní-gá-yu niú, te ni vǎ cánèhe chiuⁿ-gá-yu ñuhú cutnùní núú-yu, te ni nchícanchii ñá túú-gǎ xíní ñùhu-xi dayehé ñúú-áⁿ chi mee Dútú Ndiǒxí dáyèhé-gá, te ni caa ni quíhíⁿ cunúú-yu cundecú-yu ñúú-áⁿ.

Sa ta cùyatni nduu quixi tucu Xítóhó Jesucrístú

⁶ Te sátá dúcáⁿ te ní cachí tnúhu espíritú xínú cuèchi núú Yǎ Ndiǒxí-áⁿ xii-í:

—Nchaandi túhú tnúhu-a cùu-xi mee-ni tnúhu ndáá cuíti. Te Yǎ Ndiǒxí Yaá dácàhu iní nchaa cue téè càháⁿ tnúhu-gá nàcuáa cáháⁿ-güedé ní tendaha-gǎ ìⁿ espíritú xínú cuèchi núú-gǎ ní quixi-xi ní dánèhé-xi nchaa ñáyiu xínu cuechi núú-gǎ nchaa nàcuáa cada-gá, te vá cùyàa-gá ducaⁿ càda-gá —duha càchí espíritú-áⁿ.

⁷ Te ní cáháⁿ Xítóhó Jesucrístú, te càchí-gá:

—¡Ío ndihí quixi tucu-í!

¡Te ío váha tnahá nchaa ñáyiu tnè nchaa tnúhu càháⁿ Yǎ Ndiǒxí yódó tnùní núú tütú-a! —duha càchí-gá.

⁸ Te yúhú té Juáá ní tecú dóho-í nchaa nàcuáa ní ngódó tnùní núú tütú-a, te ní xíní núú-í nchaa

nàcuáa cada-xi ndéé cuèé-gá. Te sátá dúcáⁿ ñí cuu te ní ngüíñí xítí-í núú espíritú sá ñí dánèhé núú ñáhá ncháa xiáⁿ cuendá chiñuhu-í-xi ni cùu. ⁹ Te ní cachí-xi:

—Vá dúcáⁿ càda-n, chi yúhú dicó xínú cuèchi-í núú Yá Ndiöxí dàtná cúú yòhó ndihí nchaa dava-gá ñáyiu ndècu ndihí-n ichi-gá càháⁿ-ndó tnùhu-gá, ndihí nchaa ñáyiu tnì nchaa tnúhu ndéé núú tütú-a, te xiáⁿ càchí-í sá vǎ dúcáⁿ càda-n, chi mee Yá Ndiöxí ducaⁿ chiñuhu-n-gá —càchí espíritú-áⁿ xii-í.

¹⁰ Te ní cachí tnúhu tucu-xi xii-í, te càchí-xi:

—Vá chídǎhu-n ñí ìⁿ tnúhu Yá Ndiöxí ndéé núú tütú-a, chi sa ní cuyatni cada-xi nchaa nàcuáa ndéé tnuní. ¹¹ Te dañá sǎ ncháá ñáyiu ndècu ichi cuehé ichi duha na cùndecu-ní-yu ichi-áⁿ, te ducaⁿ-ni dàña-n nchaa ñáyiu quide nándi-gá nchaa sá cuèhé sá dúhá ná càda nahi-ní-yu nchaa sá cuèhé sá dúhá sàni iní-yu, te nchaa ñáyiu quide váha te ducaⁿ-ni na càda váha-yu cundecú-yu, te nchaa ñáyiu quide nchaa nacuáa cùu váha iní Yá Ndiöxí te ñíu-ni ducaⁿ na càdá-yu cundecú-yu —duha càchí espíritú-áⁿ.

¹² Te ní cachí Xítohó Jesucristú:

—Cundedóho-n tnùhu na càháⁿ-í-a. Ío ndihí quixi tucu-í, te canehe-í nchaa sá ndúú táhú ñáyiu quixi, te nàcuáa ndùu chiuⁿ ní quidé-yu ìⁿ ìⁿ-yu te ducaⁿ cùnduu sá cuñaha-í nduu táhü-yu. ¹³ Te yúhú cúu-í Yaá sa ndècu ndéé cùtnàhá ní ngáva ñuyíú, te ñíu-ni-í cundecu-í ñí caa ñí quíhíⁿ —duha càchí-gá.

¹⁴ Te váha táhü nchaa ñáyiu sa ní nduu ndoo ní nduu nine iní-xi, chi ñáyiu-áⁿ ñí nduu táhü-yu quíhu-yu xítí ñúú-áⁿ, te caxí-yu sávidí yutnu

nùtní-án te xǎⁿ candeca-xi iní-yu ni caa ni quíhíⁿ.
 15 Te ñuú-áⁿ vǎ cúú quǐhu ni ñⁿ ñáyiu ndècu ichi cuehé ichi duha, ni cuè ñáyiu quède nduu, te ni cuè ñáyiu ndècu ichi díí ìní, te ni cuè ñáyiu sàhni tnaha ñáyiu-xi, te ni cuè ñáyiu chìñuhu nchaa sá ñí cadúha cue téé ñuyúú-a cǎchí-yu cùu ndióxí, te ni cuè ñáyiu tnàhá iní dacuàndehnde, te ni ñⁿ ñáyiu ducaⁿ xǐquide vá ndúú tǎhǔ-yu quǐhu-yu xití ñuú-áⁿ.

16 Te ní cáháⁿ tucu Xítóhó Jesucrístú, te cǎchí-gá:

—Yúhú Xítóhó Jesucrístú ní tendaha-í espíritú xínú cuèchi núú-í cuendá cǎchí tnúhu-xi xii-n nàcuáa ndúu tnúhu cúñaha-n xii nchaa ñáyiu ndècu ndihí-n ichi-í dǎcuàha tnúhu-í ñⁿ ñⁿ ñuú. Te yúhú cúú-í mei ñàní tnàhá ndíi Dàvíí, te cada iní-n sǎ cúú-í dǎtná ñⁿ chódíní quití quène datneé —duha cǎchí-gá.

17 Te nchaa ñáyiu cùu cuendá Xítóhó Jesucrístú Yaá cáá dǎtná cáá ñⁿ mbéé quití ní dánícuèhé-güedé, díu-ni ñáyiu-áⁿ cúú-yu ñáyiu cada iní-ó sǎ cúú-yu ñⁿ ñadìhí xíchí tnǎndaha ndihí ñaha xii-gá, te ñáyiu-áⁿ ñⁿ-ni cǎháⁿ-yu ndihí Espíritú Yǎ Ndiǒxí, te xǎhǎⁿ-yu ndihí Espíritú-gá xii nchaa dava-gá ñáyiu:

—Chí táquixi —cǎchí-yu xǎhǎⁿ-yu ndihí Espíritú Yǎ Ndiǒxí.

Te nchaa ñáyiu ducaⁿ ndèdóho tnúhu-áⁿ vitna, te xini ñuhu-xi ducaⁿ cáháⁿ-yu tnàhá-yu cúñàhá-yu xii nchaa dava-gá ñáyiu-áⁿ, te nchaa ñáyiu cuení tuha ichi-gá te na quixí-yu, te dícó ducaⁿ cùu tǎhǔ-yu sá cándèca iní-yu ni caa ni quíhíⁿ.

18 Te nchaa nchòhó ñáyiu ndèdóho nchaa nàcuáa cǎháⁿ tnúhu Yá Ndiǒxí ndèé núú tütú-a cǎháⁿ-í

dóho-ndo. Te núu ìⁿ ñáyiú na còdo-gá tnúhu chido tnùnì-yu núú tütú-a, te Yá Ndiõxí ío dandòho ñaha-gá xíi-yu chí yáha-yu nchaa tnúndòho yodo tnuní núú tütú-a te núu ducaⁿ na càdá-yu. ¹⁹ Te núu ìⁿ ñáyiú na chidáhu dava tnúhu Yá Ndiõxí ndéé núú tütú-a te ñáyiú-áⁿ vǎ ndúú tǎhǔ-yu cundecú-yu ñuú-gá, te ní vǎ ndúú tǎhǔ-yu sá cándèca iní-yu ní caa ní quíhíⁿ dàtná yódó tnùnì núú tütú-a.

²⁰ Te Xítohó Jesucristú Yaá càháⁿ sá ncháá tnúhu-a cùu-xi tnúhu ndáá ní cáháⁿ-gá ní tecú dóho-í, te càchí-gá:

—Ndáá sá ío ndǎhí quixi tucu-í —duha càchí-gá.

Te yúhú ní xáhaⁿ-ǎ xii-gá:

—Ducaⁿ na cùnduu, taquìxi yohó Xítohó Jesucristú —duha ní xáhaⁿ-ǎ xii-gá.

²¹ Te Xítohó Jesucristú ío na chìndee chitúu ñaha-gǎ xii-ndo nchàa-ndo. Te ducaⁿ na cùnduu. Te ío chí cádá ndèe iní-nǎ vitna.

Tnúhu ní cáháⁿ yǎ ndiǒxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

872f7754-0986-5ecd-a059-925a708a6939